



Հայկական գիտահետազոտական հանգույց Armenian Research & Academic Repository



Սույն աշխատանքն արտոնագրված է «Ստեղծագործական համայնքներ
ոչ առևտրային իրավասություն 3.0» արտոնագրով

**This work is licensed under a Creative Commons Attribution-NonCommercial
3.0 Unported (CC BY-NC 3.0) license.**

Դու կարող ես.

պատճենել և տարածել նյութը ցանկացած ձևաչափով կամ կրիչով
ձևափոխել կամ օգտագործել առկա նյութը ստեղծելու համար նորը

You are free to:

Share — copy and redistribute the material in any medium or format

Adapt — remix, transform, and build upon the material

91(075)
u-19

91(075)
u-19

1910

91(075)

Ա-19

ԱՇԽԱՐՀԱԳՐՈՒԹԵԱՆ

ԴԱՍԱԳԻՐՔ

ԵՐՐՈՐԻ ՄԱՍ

Ե Ի Ր Ո Պ Ա

(6-րդ տարւայ դասընթաց)

52 ՆԿԱՐՈՎ

Փոխադրեց

ԱՐՏԱՅԷՍ ԱՐԵՂԵԱՆ

(ըստ Խանովի, Կրուքերի եւ ուր.)

Գինն է՝ 70 կոպ.



Թ Ի Ֆ Լ Ի Ս

Տպար. Ի. Յ. Շապուտի Դժոբց. փ. տ. Վրաց Ազնւականների

1910

Հոյս է տեսել եւ վաճառուած՝ է նոյն կազմողի

ՈՒՂՂԱԳՐԱԿԱՆ ԲԱՌԳՐՔՈՅԿ

Պարունակում է 1) մօտ 10,000 բառերի ցանկ, 2) Ուղղագրական կանոններ: Օժանդակ ձեռնարկ հայոց լեզւի ուղղագրութիւնը սովորելու համար. 191 երես: Գինն է 20 կոպէկ:

Պ. Ղազարոս Աղայեանը «Սուրհանդակ»-ի

1909 թ. № 27-ի մէջ գրում է այս գրքոյկի մասին. «Պ. Ա. Արեղեանի այս գրքոյկը շատ գեղեցիկ է կազմւած և շատ պիտանի կարող է լինել թէ ուսուցիչների և թէ մանաւանդ ուսանողների համար: Ցանկալի է, որ մեր ուսուցիչները ձեռքի տակ ունենան և իրենց աշակերտներին էլ ոչ միայն խորհուրդ տան, այլ և պարտաւորեցնեն գնել և օգուտ քաղել թէ բառարանից և թէ ուղղագրական կանոններից... Իր մատչելի գնով, յոյս ունենք, հեշտութեամբ կտարածւի և շուտով կունենայ իր երկրորդ տպագրութիւնը աւելի ընդարձակ... Ի վերջոյ յաջողութիւն եմ ցանկանում պ. Արեղեանին իր նոր ձեռնարկութան մէջ, որ ըստ ամենայնի ուղիղ շաւղի վրայ է կանգնած մայրենի լեզւի ուսուցման վերաբերմամբ»

Պ. Մ. Մատենճեանը «Նոր Դպրոցի»

1909 թ. № 11-ի մէջ գրում է. «Հայոց լեզւի ուսուցիչներն արդէն նկատած կլինեն, որ աշակերտները յաճախ տառասխալներ են անում լոկ այն պատճառով, որ տանը ոչ ուսուցիչ ունեն, ոչ էլ հայերէն յարմար բառարան, որպէսզի կասկածելի համարւող բառերն ստուգեն և այգպիսով աստիճանաբար սովորեն ուղիղ գրել: Պ. Արտ. Արեղեանի ձեռնարկը գալիս է այս մեծ պակասը լրացնելու: Աւելացնենք նաև այն, որ գրքոյկի ձևը գործածութեան համար շատ յարմար է, տպագրութիւնը մաքուր, ուղղագրական էական կանոններն էլ, իբրև յաւելւած, կցւած բառարանին, ու վերջապէս, գինը մատչելի բոլորին, — այսպէս կատանանք, որ հեղինակի ձեռնարկութիւնը արժանի է գովեստի»:

2004

81890-ան
1411-890

3208 5353 91(075)
Ա-13

ԱՇԽԱՐՀԱԳՐՈՒԹԵԱՆ

ԴԱՍԱԳԻՐՔ*



ԵՐԵՎԱՆԻ ՄԱՍ

Ե Ի Ր Ո Պ Ա

(6-րդ տարւայ դասընթաց)

52 ՆԿԱՐՈՎ

Փոխադրեց

ԱՐՏԱՇԷՍ ԱՐԵՂԵԱՆ

(ըստ Իւանովի, Կրուքերի եւ ուր.)



Թ Ի Յ Լ Ի Ս

Տպար. Ի. Յ. Շապուճի ԴՎՈՐԵՅ. փ. ա. Վրաց Ազնւականների

1910



17927

Գինն է՝ 70 կոպ.

Յ Ա Ռ Ա Ջ Ա Բ Ա Ն

Երեք տարի առաջ, 1907 թւականին, մենք լոյս ընծայեցինք «Աշխարհագրութեան դասագրքի» Ա. մասը,—տարրական աշխարհագրութիւնը: Դասագրքի այդ մասը համապատասխանում է մեր դպրոցական ծրագրի 4-րդ և մասամբ 3-րդ տարուն: Հետեւեալ տարին, 1908-ին, լոյս ընծայեցինք մենք դասագրքի Բ. մասը—Ասիա, Աֆրիկա, Ամերիկա և Աւստրալիա: Դասագրքի այդ մասը պարունակում է 5-րդ ուս. տարւայ գասընթացը:

Դասագրքի յիշած երկու մասերի համար ևս մեր ուղղեցոյցը եղել է Գ. Իւանովի Աշխարհագրութեան յայտնի ձեռնարկը, որից և գլխաւորապէս փոխադրել ենք. օգտել ենք նաև Կրուբերի, Գրիգորի, Չեֆրանովի և Բարկովի նմանապէս յայտնի ձեռնարկից: Լրացումների և ստուգումների համար դիմել ենք նաև գերմանական յայտնի աղբիւրների—Ջայզլիցին, Դանիէլին և Կիրխօֆին:

Դպրոցական պրակտիկան ցոյց տւեց, որ չենք սխալւել մեր աղբիւրների, յատկապէս գլխաւոր աղբիւրի՝ Իւանովի դասագրքի ընտրութեամբ: Մեր դասագրքի երկու մասերն ևս կարճ ժամանակայ ընթացքում լոյս տեսան երկրորդ տպագրութեամբ: Այժմ ահա մենք լոյս ենք ընծայում «Աշխարհագրութեան դասագրքի» Գ. մասը—«Եւրոպան», որ կազմում է 6-րդ ուս. տարւայ կամ Գ. դասարանի գասընթաց: Մեր աղբիւրները նոյնն են, վերև յիշատակածները: Դասագրքի այս մասում մենք աւելի ենք հետեւել Իւանովին, համարեա ամբողջապէս փոխադրելով այդ դասագիրքը. միւս աղբիւրները միայն որոշ լրացումների համար են ի նկատի առնւած:

Իւանովի դասագրքի Գ. մասը, որից փոխադրւած է ներկայ հատորը, ունի այն եզակի առանձնայատկութիւնը, որ նրա հեղինակը իր դասագիրքը պատրաստել է ոչ թէ միայն կարիքատային աշխատանքների և ուսումնասիրութիւնների վրայ հիմնւած, այլ և իր հաւաքած ու մշակած նիւթը ստուգման է եսթարկել անմիջական դիտողութիւնների հիման վրայ: Այդ նպատակով նա ձեռնարկել է մի շարք էքսկուրսիաների դէպի Եւրոպայի զանազան կողմերը. նա եղել է համարեա եւրոպական բոլոր երկիրներում, անմիջական տպաւորութիւններ ստանալով այն վայրերից, որոնք ծառայել են ներկայ դասագրքի նըկարագրութեան առարկան: Դասագրքի մէջ գետեղած պատկերների մի մասն էլ հեղինակն ինքն է լուսանկարել իր էքսկուրսիաների միջոցին: Իսկ թէ ինչ նշանակութիւն ունի մանաւանդ դասագրքի հա-

մար յիշած հանգամանքը, այդ արդէն հասկանալի է ամեն մի դասատուի համար:

Ինչ վերաբերում է դասագրքի գիտական-մանկավարժական սկզբունքներին,—դրանք իհարկէ նոյնն են, ինչ որ նրա Ա. և Բ. մասերում, որ աւելորդ չենք համարում այստեղ ևս համառօտակի ուրևագծել:

Այս դասագիրքը նպատակադրել է. նախ՝ որ աշխարհագրութեան դասընթացը լինի ժամանակակից գիտութեան համապատասխան. երկրորդ՝ որ նիւթի բացատրութիւնը լինի պարզ և տրամաբանական—աշակերտը իւրացնի այն պատճառական կապը, որ կայ աշխարհագրական զանազան երևոյթներին—մի երկրի դիրքի, մակերևոյթի կազմութեան և ուղղման, կլիմայի և բուսականութեան, բուսական և կենդանական աշխարհների, մի երկրի բնութեան և նրա ազգաբնակչութեան կիսանքի, զբաղմունքների ու կուլտուրական առաջադիմութեան մէջ, և այլն:

Այս բոլոր սկզբունքները բղխում են մէկը միւսից և կիրառուում են նաև նիւթի դասաւորութեան մէջ: Ամբողջ Եւրոպային վերաբերող «ընդհանուր նկարագրութիւնից» յետոյ գալիս է առանձին երկրամասերի աշխարհագրութիւնը: Ամեն տեղ էլ պահպանւած է համեմատական աշխարհագրութեան սկզբունքը, պատճառական կապի անհրաժեշտութիւնը: Ըստ այդմ՝ ուսուցման նիւթը դասաւորւած է համաձայն բնագաւառների, մի երկրի և նրա մասերի բնական պայմանների: Եթէ դասատուն աշակերտներին սկզբից լաւ իւրացնել տայ աւանդելի նիւթի պլանն և, այդ ղէպքում կղերանայ նրա գործը:

Յոմնակատուրան կամ աշխարհագրական անունների անւանակարգութիւնը, իբրև այդպիսին, վտարւած է ներկայ դասագրքի միջից: Անցած պիտի համարել այն ժամանակները, երբ «Աշխարհագրութիւն» ասելով հասկանում էին մի կամ բոլոր երկիրների լեռների, գետերի, կղզիների և այլ աշխարհագրական վայրերի անկապ դասաւորութիւնը, որ աշակերտները ստիպւած էին թութակի նման անգիր սովորել: Գիտական-համեմատական աշխարհագրութիւնը նոր սկզբունքներ մշակեց, նոր հեռանկարներ պարզեց դպրոցական աշխարհագրութեան առջև: Ահա այդ սկզբունքին է, որ պէտք է գոհացում տալ: Համաձայ նորա՝ աշխարհագրութիւնը պիտի ձգտէ դառնալ կուլտուրական աշխարհագրութիւն. մի երկրի բնական և պատմական պայմաններից պիտի հետևեցնել նրա քաղաքակրթական վիճակը. և այս սկզբունքն է, որ պիտի իւրացնէ աշակերտող սերունդը*):

*) Աշխարհագրութեան և մասնաւորապէս հայրենագիտութեան դասաւանդմամբ հետաքրքրւողներին առաջարկում ենք կարգաւ մեր «Հայրենագիտութեան ուսուցումը»:

Անշուշտ՝ աշխարհագրական անուններ բոլորովին չյիշատակել կամ չափազանց սահմանափակել, — այդ կլինէր միւս ծայրայեղութիւնը. աշխարհագրութիւնը առանց անունների — դա արսուրդ է: Սակայն հարցի էութիւնն այն է, որ աշխարհագրական անունները չյիշատակեն հենց իբրև անուններ, անկապ կերպով, — այլ՝ տրամաբանական կապակցութեան մէջ, դասաւանդման ամբողջ նիւթի բովանդակութեան հետ շարկապէս: Ահա հենց այդ սկզբունքով էլ տեղի է ունեցած ներկայ դասագրքի մէջ աշխարհագրական անունների յիշատակումը:

Դասագրքի ծաւալը աշխատել ենք համաձայնեցնել մեր դպրոցներում ընդունւած շաբաթական դասերի թւին: Աշխատել ենք տալ այն ամենը, ինչ անհրաժեշտ է աշխարհագրութեան ուսուցման համար դպրոցում: Համեմատաբար ոչ-կարևորագոյն հատւածները տպագրել ենք տեւ մանր տառերով. ժամանակը սուղ եղած դէպքում դասատուն ըստ իր հայեցողութեան կարող է կրճատել այն: Ինչպէս ամեն մի առարկայ, այնպէս և աշխարհագրութիւն ուսուցանելիս պէտք է դասատուն աշխատէ աշակերտների ինքնագործունէութիւնը առաջ քաշել, նրանց ներգործական աշխատանքի սովորեցնել: Քարտէսի գործածութիւնը աշխարհագրութեան ուսուցման համար առաջնակարգ պայմանն է: Նիւթը չժանրաբեւոնելու համար մենք աւելորդ համարեցինք ամեն մի երկրի սահմանները յիշատակել. դասի սկզբում աշակերտները իրենք պէտք է իւրացնեն այդ՝ ուսուցչի և քարտէսի օգնութեամբ:

Դասագրքի այս մասում ևս զետեղել ենք բաւական թւով նկարներ ու զանազան դիագրամներ: Դրանց անհրաժեշտութիւնն ևս հասկանալի է:


Մենք յոյս ունենք, որ դասագրքի ներկայ հատորն ևս կունենայ այն ընդունելութիւնը, որ ունեցան Ա. և Բ. մասերը: Ամեն մի նկատողութիւն դասատուների և բարեացակամ քննադատութեան կողմից, որ կարելի դասագրքի այս մասի, նաև երկրորդի և մանաւանդ Ա. մասի վերաբերմամբ, — կընդունենք սիրով և կօգտենք նրանից շնորհակալութեամբ:

Ա. Ա. Բ.

Ե Ի Ր Ո Պ Ա

Ը Ն Գ Է Ա Ն Ո Ւ Բ Ն Կ Ա Ր Ա Գ Ի Ո Ւ Թ Ի Ի Ն

ԵԻՐՈՊԱՅԻ ԴԻՐԳԸ, ՄԵԾՈՒԹԻԻՆԸ ԵՒ ԱՓԵՐԻ ԳԾԱԳՐՈՒԹԻԻՆԸ:—Երկրագունդը հասարակածով բաժանւում է երկու կիսագնդերի—հիւսիսային և հարաւային: Ամեն մի միջօրէականով նա բաժանւում է արևելեան և արևմտեան կիսագնդերի: Երկրագունդը կարելի է բաժանել նաև մայր-ցամաքային և ովկիանոսային կիսագնդերի (տես նկ. 2): Մայր-ցամաքային կիսագնդում է կենտրոնացած համարեա ամբողջ ցամաքը, իսկ



Նկ. 2. Մայր-ցամաքային և ովկիանոսային կիսագնդեր:

ովկիանոսային կիսագունդը համարեա ամբողջովին ջրով է լցւած: Եւրոպան գտնւում մայր-ցամաքային կիսագնդի մէջ տեղում: Աշխարհագրական այս յարմար դիրքը նպաստաւոր է եւրոպացիներին համար. սրանք հեշտութեամբ են հաղորդակ-

ցուծիւն պահպանում միւս աշխարհամասերի բնակիչներին հետ, բացի Աւստրալիայից. սա շատ հեռու է գտնուում Եւրոպայից,— երկրագնդի հակառակ կողմում*):

Եւրոպայի հիւսիսային ծայրն է՝ Նորդկլին հրլանդանը. սա գտնուում է հիւսիսային լայնութեան 71° տակ: Հարաւային ծայրերն են՝ Տարիֆ հրլանդանը—հարաւային լայնութեան 36° և Մատապան հրլանդանը— $36\frac{1}{2}^{\circ}$ տակ:

Եւրոպայի արեւմտեան ծայրն է՝ Դա-Ռոկա հրլանդանը—Գրինիչի (Լոնդոնի մօտ) միջօրէականից $9\frac{1}{2}^{\circ}$ արեւմուտք: Արեւելեան կողմում Եւրոպան հասնում է, Ուրալեան լեռնաշղթայի հիւսիսային մասում, արեւելեան երկայնութեան $65\frac{1}{2}^{\circ}$ -ին: Այն միջոցին, երբ Եւրոպայի ամենաարեւելեան մասում կէսօր է, ամենաարեւմտեան մասում դեռևս առաւօտեան ժամի 7-ն է (ինչին):

Իր մեծութեամբ Եւրոպան բռնում է ամբողջ ցամաքի մի փոքրիկ ($\frac{1}{13}$) մասը միայն: Նա համարեա 5 անգամ փոքր է Ասիայից, բաւական փոքր է թէ Հիւսիսային և թէ Հարաւային Ամերիկայից: Եւրոպան միայն Աւստրալիայից մի քիչ մեծ է: Եւրոպայի մակերևոյթը բռնում է մօտաւորապէս $8\frac{1}{2}$ միլիոն քառակուսի վերստ տարածութիւն (որի կէսից աւելին հենց Եւրոպական Ռուսաստանն է կազմում):

Արեւելեան կողմում Եւրոպան կպած է Ասիային. այնպէս որ կարելի է ասել, թէ Եւրոպան Ասիայի մեծ թերակղզիներից մէկն է: Անկարելի է ճշտութեամբ ցոյց տալ, թէ որտեղ է վերջանում այդ աշխարհամասերից մէկը և որտեղ սկսում—միւսը: Ասիայի և Եւրոպայի սահմաններն են համարում սովորաբար—Ուրալեան լեռները, Ուրալ գետը և Կովկասեան լեռները (Ուրալեան լեռները ընկնում են Եւրոպայի մէջ, իսկ Կովկասեան լեռները—Ասիայի մէջ):

Հիսիսային կողմից Եւրոպայի ափերը ողողում են՝ Հիւս. Սառուցեալ Ովկիանոսը և Սպիտակ ծովը: Սառուցեալ ով-

* Այն միջոցին, երբ Եւրոպայում ցերեկ է, Աւստրալիայում գիշեր է: Երբ Եւրոպայում ամառ է, Աւստրալիայում ձմեռ է և ընդհակառակը:

կիանսում գտնուում են Եւրոպային պատկանող Նոր Երկիր և Շպիցբերգէն կղզիները:

Արեւմտացից Եւրոպայի ավերը ողողում է Ատլանտեան ովկիանոսը: Ատլանտեան ովկիանոսի մասերն են կազմում Եւրոպայի ավերի մօտ—Բիսկայեան ծոցը, Գերմանական (կամ Հիւսիսային) և Բալտիկ ծովերը: Բալտիկ ծովը շատ խորն է մտնում մայր ցամաքի մէջ և կազմում է Ռիգայի, Փիննական և Բոտնիկ ծոցերը: Բալտիկ ծովից դէպի արեւմուտք իրար դիմաց տարածւում են Սկանդինաւիա և Իւտլանդիա թերակղզիները: Եւրոպային են պատկանում Ատլանտեան ովկիանոսում գտնուող հետեւեալ կղզիները—Իսլանդիա, Իրլանդիա և Մեծ-Բրիտանիա: Վերջինս մայր ցամաքից բաժանուում է Պա-դը-Կալէ նեղուցով (32 վերստ լայնութեամբ):

Հարաւային կողմից Եւրոպայի ավերը ողողում է Միջերկրական ծովը, որ Ատլանտեան ովկիանոսի մի մասն է կազմում և սրա հետ միացած է Ջիբրալտարի նեղուցով (14 վ.): Միջերկրական ծովը ողողում է Եւրոպային պատկանող հետեւեալ թերակղզիների ավերը—Պիրենէեան, Ապեննինեան և Բալկանեան: Միջերկրական ծովում են գտնուում՝ Կորսիկա, Սարդինիա, Սիցիլիա և Կրետէ կղզիները: Միջերկրական ծովի մասերն են կազմում հետեւեալ չորս ծոցերը, սրանք ծով էլ են կոչւում—Տիւրենեան, Ադրիատիկ, Յոնիական և Էգէեան: Էգէեան ծովը Դարդանելի նեղուցով միացած է Մարմարա ծովի հետ. իսկ այս ծովն էլ Բոսֆորի կամ Կոստանդնուպոլսի նեղուցով (2 վերստ լայնութեամբ) միացած է Սև ծովի հետ: Սև ծովը և նրա մեծ ծոցը, որ կոչւում է Ազովի ծով, ողողում են Արիւմ թերակղզու ավերը:

Այսպէս ուրեմն՝ մի շարք ծովեր, ծոցեր և նեղուցներ երեք կողմից ողողում և այնչափ կտրտում են Եւրոպայի ավերը, որ առաջ են բերում շատ կղզիներ և թերակղզիներ: Այդ կղզիները և թերակղզիները բռնում են Եւրոպայի ամբողջ տարածութեան $\frac{1}{3}$ մասը: Ոչ մի աշխարհամասի ավերը այնչափ կտրտած չեն, որչափ Եւրոպայի ավերը. իսկ այս հանպամանքը Եւրոպայի համար մեծ նշանակուլթիւն ունի. ծովային գո-

լորշինները մայր ցամաքի ներսն են բերում խոնաւութիւն. բացի դրանից՝ ծովերը ծառայում են հաղորդակցութեան համար իբրև շատ լաւ և ամենաէժան միջոցներ: Եւրոպայի արևելեան կէսը, այսինքն Եւրոպական Ռուսաստանը, աւելի քիչ է կըտրուած ծովերով, քան արևելեան կէսը:

ԵՒՐՈՊԱՅԻ ՀԵՏԱԶՕՏՈՒՄԸ:—Առևտրական շահերն են եղել այն գլխաւոր պատճառներից մէկը, որ դրդել են մարդկանց ձեռնարկել հեռաւոր և վտանգաւոր ճանապարհորդութիւնների ու այդպիսով նաև նորանոր երկիրներ յայտնագործել: Այսպէս՝ Քրիստոսից զեռ 1,000 տարի առաջ փինիկեցիները, որոնք ապրում էին Միջերկրական ծովի արևելեան ափին, նաւերով անցնում էին Զիբբալտարի նեղուցը և հասնում մինչև Մեծ-Բրիտանիայի ափերը, որտեղ նրանք ձեռք էին բերում անագ և սաթ: Յոյները գաղութներ հիմնեցին Միջերկրական և Սև ծովի հիւս. ափերին. նրանք թափանցեցին նաև այժմեան Իսպանիայի և Փրանսիայի խորքերը:

Հռոմայեցիներին, որոնց տիրապետութիւնը տարածւել էր Ապենինեան թերակղզու մօտերքը գտնուող երկիրների վրայ, ծանօթ էին Գերմանիան, մինչև Վիսլա գետը և Բալկանեան թերակղզին, մինչև Դանուբ գետը: Նրանք նաևեցին այժմեան Փրանսիան և Մեծ-Բրիտանիայի հարաւային մասը:

Սկսած 5-րդ դարուց Ք. յ. քրիստոնէութիւնը տարածւելու հետ միասին հետզհետէ յայտնի դարձաւ Եւրոպայի նաև հիւսիսային մասը — Սկանդինաւեան թերակղզին և Բալթիկ ծովի շուրջը գտնուող երկիրները: Այս վայրերի մասին շատ տեղեկութիւններ էին բերում այն քարոզիչ վարդապետները, որոնք գնում էին այնտեղի հեթանոս ժողովուրդներին քրիստոնեայ դարձնելու համար: 9-րդ դարում տեղի ունեցաւ առաջին նաւագնացութիւնը — Ատլանտեան ովկիանոսից գէպի Սպիտակ ծովը՝ Եւրոպայի հիւսիսային ծայրում գտնուող Նորգլապ հրաւանդանի մօտով: Եւրոպայի արևելեան մասը յայտնի դարձաւ համեմատաբար ուշ ժամանակներում. առաջին տեղեկութիւնները այդ կողմերի մասին իմացուում են 10-րդ դարում:

ՄԱԿԵՐԵԻՈՅԹԻ ԿԱԶՄՈՒԹԻՒՆԸ:—Միւս աշխարհամասերի հետ համեմատած՝ Եւրոպան ցածր մակերևոյթ ունի: Նրա միջին բարձրութիւնը հազիւ $\frac{1}{3}$ վերստի է հասնում: Ասիայի միջին բարձրութիւնը երեք անգամ աւելի է քան Եւրոպայինը: Եւրոպայի մակերևոյթի $\frac{2}{3}$ -ը հարթութիւններ են և միայն $\frac{1}{3}$ -ը՝ բարձրութիւններ. այն ինչ Ասիայի $\frac{1}{3}$ մասը միայն հար-

թուփիւններ են, $\frac{2}{3}$ -ը՝ բարձրութիւններ: Եւրոպայի ամենաբարձր լեռները՝ Ալպերը թէպէտ յաւիտենական ձիւնով են ծածկւած, բայց և այնպէս աւելի ցածր են, քան օրինակ՝ Մասիսը և Էլբրուսը. մինչև իսկ երկու անգամ ցածր են Հիմալայեան լեռներից:

Ասիայի բարձրութիւնները մեծ մասով տարածոււմ են կենտրոնում, իսկ Եւրոպայի բարձրութիւնները՝ մեծ մասով հարաւ-արեւմուտքում: Այս պատճառով էլ Եւրոպան, մակերևոյթի կազմութեանը նայելով, կարելի է բաժանել երկու մասի. 1) հարաւ-արեւմտեան, որ բարձր է և 2) հիւսիս-արեւելեան, որ հարթ է:



Նկ. 3. Էւոնուսարբի սեսարան (Բերնեան Ալպեր). ասամնաւոր կասարներ (առաջինը, աջ կողմից, Իւնգֆրաուն է), անհարթ, ձեղւած լանջեր:

Եւրոպայի լեռները երկու ձևի են: Իրանցից շատերը ձգոււմ են շարքերով, լեռնաշղթաներ են, շատերն էլ զանգւածային կերպարանք ունեն, լեռնախմբներ են:

Լեռնաշղթաների թւին են պատկանում Եւրոպայի ամենաբարձր սարերը. դրանք են՝ Ալպերը, որոնց Մոնբլան գագա-

Թը 4¹/₂ վերտա բարձրութիւն ունի, Պիրենէեան, Ապեննի-
նեան, Իրնարեան, Կարսլատեան և Բալկանեան լեռները:

Իրենց ամբողջ տարածութեան վրայ այդ լեռնաշղթաները
բաղկացած են զուգահեռական երկայն շարքերից, որոնք իրարից
բաժանուում են երկայնաձիգ հովիտներով: Նրանց բարձունքները
ատամնաւոր են, գագաթները՝ սրածայր. լանջերը կտրուած են
խոր, լայնաձիգ հովիտներով: Լեռնաշղթաների այս բազմազան
ձևերը առաջ են դալիս այն լեռնային տեսակների բազմազան-



Նկ. 4. Զտնգւնձային (մասսիւ) լեռների օճառան (Շւարցվալդ): Կլոր, քեֆ
լանջեր:

նութիւնից, որոնցից բաղկացած են լեռնաշարքերը. նրանց մէջ
պատահում են թէ՛ փխրուն տեսակներ, —ինչպէս օրինակ՝ կա-
ւը և մերգելը (կրախառն և կաւային հող), թէ՛ համեմատաբար
աւելի ամուր տեսակներ, օրինակ՝ աւազաքար, կրաքար, և թէ՛
վերջապէս, ամենամուր տեսակներ. օրինակ՝ գրանիտ և զրդ-
ձաքար (գնէյս): Հոսող ջրերը լեռնային փխրուն տեսակները
հեշտութեամբ են ողողում և քշում-տանում, իսկ ամուր տեսակ-
ները մնում են վեր՝ իբրև բարձունքներ և լեռնազագագաթներ:

Եւրոպայի զանգւածային (մասսիւ) լեռնախմբերից նշանաւոր են՝ Միջին-Գերմանական, Կենտրոնական-Ֆրանսիական, Շոտլանդական և Սկանդինաւեան լեռները։ Սրանք իրենց բարձրութեամբ յետ են մնում լեռնաշարքերից. իսկ իրենց ձևով ներկայացնում են ընդարձակ ժայռակոյտեր՝ թեք լանջերով և կլոր, երբեմն նոյն իսկ տափարակ գագաթներով։ Այս լեռները բաղկացած են լեռնային ամենամուր, բերեղացած տեսակներից. դրանք են՝ գրանիտ, գղձաքար, փայլարային թերթաքար և այլն։ Լեռնային այս տեսակները ողողում, ժամանակի ընթացքում մաշում են դանդաղ, համաչափ կերպով. դրանից էլ առաջ է գալիս զանգւածային լեռների լանջերի և գագաթների միաձևութիւնը։

Եւրոպայի արևելեան կէսը բռնում է Ռուսական հարթութիւնը։ Սա տարածւում է Կարպատեան լեռներից մինչև Ուրալ և Հիւսիսային Սառուցեալ ովկիանոսի ափերից մինչև Կովկասեան և Ղրիմի լեռների ստորոտները։ Ռուսական հարթութիւնը չնչին բարձրութիւն ունի. նրա մեծ մասը դաշտավայր է, իսկ Կասպից ծովի մօտերը ովկիանոսից նոյնիսկ 12 սաժէն ցածր է։ Բարձրութիւններ գտնւում են՝ զլխաւորապէս նրա միջին մասում, ծովերից հեռու։ Դրանցից նշանաւորներն են—Միջին-Ռուսական, (որ հիւսիսային մասում կոչւում է Վալդայեան), Մերձ-Վոլգեան և Հիւսիսային Ուվալներ։

Արևմտեան Եւրոպայի հարթութիւններից ամենամեծը կազմում է շարունակութիւն Ռուսական հարթութեան. նա տարածւում է Բալտիկ և Գերմանական ծովերի ափերի երկայնութեամբ և աւելի հեռու՝ դէպի հարաւ-արևմուտք, մինչև Բիսկայեան ծոցը։ Այս հարթութեան արևելեան մասը կոչւում է Գերմանական, իսկ արևմտեանը՝ Ֆրանսիական դաշտավայր։ Գերմանական դաշտավայրը շարունակւում է Իւտլանդիա թերակղզու վրայ, իսկ Ֆրանսիականը՝ Մեծ-Բրիտանիա կղզու վրայ։ Մնացած դաշտավայրերից նշանաւոր են—Լոմբարդական, Միջին-Դանուբեան (կամ Ունգարական) և Ստորին-Դանուբեան դաշտավայրերը։ Սրանք շատ հնումը ծովածոցեր են եղել, որոնք ժամանակի ընթացքում լցել


են գետերի բերած աւազով, տիրմով, կաւով և ցամաքել են։
 Հրարուիւններ Եւրոպայում շատ կան, բայց նրանց մեծ մասը հանգած է։ Գործող հրաբուխներ կան Միջերկրականի մի քանի ծովափերին և կղզիների վրայ, նաև Իսլանդիա կղզու վրայ։ Միջերկրականի ամենամեծ հրաբուխներն են՝ Հտնա—Սիցիլիա կղզու վրայ և Վեզուվ—Ապեննինեան թերակղզու վրայ։ Իսլանդիայում հաշոււմ են 25 գործող հրաբուխներ. սրանցից շատերը, օրինակ Հեկլան շատ աւելի ուժգին կերպով են ժայթքում, քան Հտնան և Վեզուվը։

Երկրաշարժներ Եւրոպայում տեղի են ունենում ամենուրեք. Ռուսական հարթութեան վրայ հազւադէպ անգամ է երկրաշարժ լինում, այն էլ ոչ գորեղ կերպով։ Իսկ Արևմտեան Եւրոպայում—աւելի յաճախ։ Ամենագորեղ երկրաշարժներ տեղի են ունենում Բալկանեան, Ապեննինեան և Պիրենէեան թերակղզիների հարաւային մասերում և մեծամեծ աւերումների պատճառ են դառնում։

Հին ՍԱՌՅԱՒԱՇՏՏԵՐԻ ՀԵՏՔԵՐ։—Պիրենէեան և Ալպեան բարձր լեռնաշղթաները, Սկանդինաւիայի և բևեռային մի քանի կղզիների բարձրադիր լեռնախմբերը (մասսիւնները) ծածկւած են յաւիտենական ձիւնով և սառցադաշտերով։ Սառցադաշտերը դանդաղօրէն շարժւում են դէպի հովիտները։ Ալպերում նրանք վերջանում են անտառների մէջ, իսկ Շպիցբերգէնում թափւում են ուղղակի ովկիանոս և կազմում են սառցասարեր։ Իրենց ամբողջ հոսանքի ընթացքում սառցադաշտերը հարթում են իրենց տաշտը, կլորացնում են պոկոտած քարերը և տրորելով ու մաշելով նրանց՝ դարձնում են աւազ և կաւ։ Այս բոլորը նրանք առաջ են քշում իրենց հոսանքով. սառցադաշտերը թողնում են իրենց եզրերին անկանոն ձևով ցրւած քարաժայռեր, որոնք կոչւում են մորեններ։

Ներկայումս Եւրոպայում սառցադաշտեր շատ չկան։ Սակայն կար ժամանակ—շատ դարեր մեզինից առաջ,—որ Եւրոպայի կլիման աւելի ցուրտ էր, քան այժմ, և երբ ամբողջ Եւրոպայի համարեա կէսը ծածկւած էր սառույցով։ Այդ անցած ժամանակը կոչւում է սառցադաշտային դարաշրջան։ Մի հսկայական սառցադաշտ, որ մի քանի վերստ հաստութիւն ունէր, այն ժամանակները ծածկում էր Եւրոպայի ամբողջ հիւսիսային մասը։ Սկանդինաւեան լեռնաշխարհից ցած գալով՝ նա շարժւում էր դէպի հարաւ, այժմեան Բալտիկ ծովի ուղղութեամբ, ծածկելով Ռուսական հարթութեան կէսից աւելին և ամբողջ Գերմանական դաշտավայրը։

Այդպիսի հսկայական սառցադաշտ գոյութիւն ունի այժմ Գրենլանդիայում և Շպիցբերգէնում: Եւրոպայում շատ վաղուց է, ինչ նա հալել է, իսկ նրա հետքերը մնացել են ամեն տեղ, ուր նա եղել է: Սկանդինաւեան լեռնաշխարհը շնորհիւ սառցադաշտի ցածացել է և ուղորկել: Ֆինլանդիայում և Կոլեան թերակղզու վրայ եղած նախկին բաւական բարձր սարերը սառցադաշտից ձևափոխել են և դարձել կլոր բլուրներ:



Նկ. 5. Հին սառցադաշտերի տարածումը Եւրոպայում (Սլաքները ցոյց են տալիս, թէ ինչ ուղղութեամբ են շարժւել սառցադաշտերը):

Բոլոր փխրուն լեռնային տեսակները և ահագին քանակութեամբ գրանիտ ու փղձաքարեր սառոյցը քշել տարել է հեռու՝ դէպի հարաւ և հարաւ-արեւելք: Ռուսական հարթութեան հիւսիսային մասը և ամբողջ Գերմանական դաշտավայրը ծածկւած են սառցադաշտային (այսինքն սառցադաշտերի բերած) կաւով և աւազով: Մմենուրեք այնտեղ դաշտերում և անտառներում ցրւած են սառցադաշտային կլոր քարեր, սրունք կոչուած են վալուններ. այդպիսի քարեր կան ցրւած նաև Բալտիկ ծովի ու նրա ծոցերի յատակում:

Շատ տեղ սառցադաշտային շեղջերից կազմւել են ըլրաշարքեր.

օրինակ՝ վալդայեան բարձրութեան բլուրները: Ուրիշ տեղեր, ընդհակառակը, սառույցը գետինը փորելով գոյացրել է գոգաւորութիւններ. դրանցից շատերը այժմ լցւած են ջրով և ներկայացնում են լճեր: Սառցադաշտերն են փորել կամ գոնէ խորացրել օրինակ՝ Փինլանդիայի բազմաթիւ լճերի, Լադոզա, Օնեգա լճերի տաշտերը:

ԿԼԻՄԱՆ.—Ամբողջ Եւրոպան, չհաշւած նրա միայն հիւսիսային ծայրերը, գտնուում է բարեխառն գօտում, որ ամենից աւելի առողջարար է և յարմար՝ մարդկային բնակութեան համար (հնչո՞ւ):

(Յիշել, թէ որ գօտիներում են գտնուում միւս աշխարհամասերը— Ասիան, Աֆրիկան, Ամերիկան և Աւստրալիան):


Եւրոպայի կլիմայի համար մեծ նշանակութիւն ունի Գոլֆշտրոմը, որ երկրագնդի ամենագօրեղ տաք հոսանքն է: Գոլֆշտրոմը Ատլանտեան ովկիանոսի՝ այրեցեալ գօտում գլտնւող մասից դէպի Եւրոպայի ափերն է բերում այն քանակութեամբ տաքացած ջուր, որ ծովը ձմեռ ժամանակ էլ Եւրոպայի հիւսիս-արևմտեան ափերի մօտ նոյն իսկ 70° լայնութեան տակ չէ սառչում:

Գոլֆշտրոմի շնորհիւ Եւրոպայի կլիման աւելի տաք է, քան Ամերիկայի և Ասիայի՝ նոյն զուգահեռականների վրայ գտնւող վայրերի կլիման: Այսպէս, մինչ Գրենլանդիա կղզին (Ամերիկա) ծածկւած է սառցադաշտերով, Սկանդինաւեան թերակղզու (Եւրոպա) վրայ, նոյն լայնութեան տակ, աճում են փշատերև ծառերի խիտ անտառներ. այդտեղ կան գիւղեր և քաղաքներ: Լաբրադոր թերակղզին (Ամերիկա), որ նոյն լայնութեան տակ է գտնւում ինչ Մեծ-Բրիտանիա կղզին (Եւրոպա) և Բալտիկ ծովի հարաւային ափերը, ցուրտ հոսանքի շնորհիւ ներկայացնում է մի սառը անապատ: Լաբրադորում տարածւում են տունդրաներ. այդ ամբողջ թերակղզու վրայ անկարելի է զբաղել երկրագործութեամբ, մինչդեռ Եւրոպայում այդ նոյն լայնութեան տակ (սկսած 50-ից մինչև 90-րդ զուգահեռականը) ամենուրեք լաւ աճում են հացաբոյսեր և պտղատու ծառեր:

Ասիայում 50-րդ զուգահեռականը անցնում է Սախալին կղզու վրայով. այնտեղ, ինչպէս և Լաբրադորում, անկարելի է երկրագործութեամբ պարապել. տարւայ եղանակի միջին աստիճանը մօտաւորա-

պէս 0-ի է հաւասար. այն ինչ Եւրոպայում այդ լայնութեան տակ (օրինակ Հիւս. Ֆրանսիա, Միջին Գերմանիա) ամենուրեք ցանում են ցորեն, իսկ մի քանի տեղ մշակում են նոյնիսկ խաղողի որթ. տարւայ միջին եղանակն է այստեղ մօտաւորապէս 10⁰ տաք:

Սակայն այս բոլորի պատճառը միայն Գոլֆշտրոմը չէ: Նրան օգնում են Եւրոպայում գերիշխող արեւմտեան քամիները:



Նկ. 6. Մթնոլորտային ճեղումների բաշխումը Եւրոպայում*)

(Ինչո՞ւ Սկանդինավիայի, Մեծ Բրիտանիայի և Պրենէէեան թերակղզու արեւմտեան ծովափերին աւելի շատ մթնոլորտային տեղումներ են թափւում, քան արևելեան ծովափերին. ինչո՞ւ Եւրոպայի լեռների վրայ աւելի շատ, քան հարթավայրերում):

Արեւմտեան Եւրոպայի լեռները այդ քամիների համար մեծ խոչընդոտներ չեն հանդիսանում, որովհետեւ այդ լեռները ընկնում են Ատլանտեան ովկիանոսի եւրոպական ափերի վերաբերմամբ ոչ թէ զուգահեռական ուղղութեամբ, այլ արևելքից—արևմուտք. ուստի և արեւմտեան քամիները Գոլֆշտրոմից ստացած տաք օդը և մթնոլորտային տեղումները անարգել կերպով տանում, տարածում են մայր ցամաքի ներքը և մեղմացնում նրա կլիման:

Արեւմտեան և Հիւսիս-Արեւմտեան Եւրոպայում յիշած քա-

*) Նկարի մէջ, ներքե աջ կողմում, նշանակւած 0—25 և միւս թւերը ցոյց են տալիս, թէ այս կամ այն վայրում ամբողջ տարւայ մէջ թափւած մթնոլորտային բոլոր տեղումները միասին քանի՞ սանտիմետր բարձրութեան են հասնում, յատուկ այդ նպատակի համար պատրաստած որոշ ձևի դոյլի մէջ հաւաքելով մթնոլորտային տեղումները և չափելով:

միները փչում են թէ՛ ամառը և թէ՛ ձմեռը. իսկ Արևելեան Եւրոպայում՝ միայն ամառը, ձմեռը այդտեղ նրանց փոխարինում են Ասիայից փչող ցուրտ և չոր քամիները: Այս պատճառով էլ ահա՛ Արևմտեան և Արևելեան Եւրոպայի կլիմայի մէջ զգալի տարբերութիւն կայ: Տարւայ եղանակի միջին աստիճանը Արևմտեան Եւրոպայում աւելի բարձր է, քան նոյն լայնութեան տակ՝ Արևելեան Եւրոպայում. արևմտեան Եւրոպայում աւելի շատ մթնոլորտային տեղումներ են թափուում, քան արևելեան Եւրոպայում (ինչո՞ւ):

Արևմտեան Եւրոպայում, յատկապէս Ատլանտեան ովկիանոսի ծովափնեայ երկիրներում, կլիման ծովային է, — համաչափ, մեղմ: Այնտեղ ձմեռը շատ ցուրտ չէ լինում, ոչ էլ ամառը շատ շոգ: Արևելեան Եւրոպայում (Ռուսաստան) կլիման խիստ ցամաքային է. ձմեռը լինում է շատ ցուրտ, ամառը՝ շատ շոգ. մթնոլորտային տեղումներ էլ քիչ են թափուում:

Եւրոպայի հարաւում, Միջերկրական ծովի ափերին տարածւող երկիրները կլիմայի կողմից կազմում են առանձին շրջան: Կլիման այդտեղ մերձարևադարձային է: Ենորհիւ այդ երկիրների հարաւային դիրքի՝ ձմեռն այնտեղ աւելի է տաք, իսկ ամառը աւելի շոգ, քան Եւրոպայի մնացած մասերում. այդ երկիրների արևելեան և արևմտեան մասերում կլիմայի տարբերութիւնը մեծ չէ: Ամառը քամիները փչում են մայր ցամաքից դէպի Միջերկրական ծովը, ուստի և տարւայ այդ եղանակին համարեա բոլորովին անձրև չէ գալիս. ամառը անցնում է չոր և շոգ: Անձրևներ թափուում են ուշ աշնանը և ձմեռը, երբ քամիները փչում են Միջերկրականից դէպի մայր ցամաք: Չմեռը անցնում է մեղմ և անձրևային, այնպէս որ երկիրը ձիւնով չէ ծածկուում:

Չնայելով այս բոլոր տարբերութիւններին՝ Եւրոպայի կլիման չունի այնպիսի հակադրութիւններ, ինչպէս Ասիայի և Ամերիկայի կլիման: Եւրոպայում չկան ջրագուրկ վայրեր, անապատներ. բայց այնտեղ չկան նաև այնպիսի վայրեր, ուր չափից աւելի մթնոլորտային տեղումներ թափուէին: Չհաշւած Սառուցեալ ովկիանոսի ափերը՝ Եւրոպայում չկան չափազանց

ցուրտ, ոչ էլ չափազանց շոգ կլիմայ ունեցող վայրեր: Տար-
ւայ միջին եղանակը ամբողջ Եւրոպայում, չհաշւած հիւսիսային
և հարաւային ծայրերը, 0⁰-ից ցածր չէ և ոչ էլ +15⁰-ից
բարձր: Եւրոպայի բոլոր մասերում էլ լինում են տարւայ չորս
եղանակները, որոնք իրար յաջորդելով թարմացնում են մար-
դուն, զւարթացնում և եռանդ են ներշնչում նրան՝ նոր աշ-
խատանքի համար:

ԳԵՏԵՐԸ և ԼՃԵՐԸ:—Արեւմտեան քամիների միջոցով Ատ-
լանտեան ովկիանոսից բերւող գոլորշիները իբրև մթնոլորտա-
յին տեղումներ թափւում են ամբողջ Եւրոպայի վրայ և թա-
ցութիւն տալիս նրա մակերևոյթին: Թափւած ջրի մի մասը
կրկին գոլորշիանում է, իսկ աւելացածից գոյանում են գետեր
և հոսում դէպի ծովերը:

Որովհետև Եւրոպան ինքը մեծ չէ, ուստի և նրա գետերը
փոքր են՝ համեմատած Ասիայի և Ամերիկայի գետերի հետ:
Բայց Եւրոպայի գետերի հոսանքը շատ յարմար է. նրանք
սկսւում են մայր ցամաքի միջին մասում և հոսում են դէպի
ամեն կողմ. նրանց վերին հոսանքները իրար շատ մօտ են
գտնւում, այնպէս որ ջրանցքների միջոցով հեշտութեամբ կա-
րող են կապել իրար հետ:

Արեւելեան Եւրոպայում Միջին Ռուսական բարձրութիւնն
է այն գլխաւոր վայրը, որտեղից գետեր են սկիզբ առնում և
դէպի զանազան կողմեր հոսում: Այգաեղ, ծովի մակերևոյթից
ընդամենը 100 սաժէն բարձրութեան վրայ գտնւող ճահիճնե-
րից է իր սկիզբը առնում Եւրոպայի ամենամեծ գետը—Վոլ-
գան (3,200 վերստ երկայնութեամբ): Վոլգան ընդունում է իր
մէջ Օկա, Կամա և շատ ուրիշ վտակներ: Նոյն Միջին-Ռուսա-
կան բարձրութիւնից են սկիզբ առնում նաև Դոն, Դնեպր,
Արեւմտեան Դւինա գետերը, Նևայի վտակները, և այլն:

Այս բոլոր գետերը հոսում են դանդաղ, որովհետև սկիզբ
են առնում ինչպէս ասացինք, փոքրիկ բարձրութիւններից և
հոսում են հարթութիւններով: Շատ քիչ տեղերում, օրինակ
Դնեպրը իր միջին հոսանքում, նրանք հանդիպում են սահանք-
ների: Որովհետև արեւելեան Եւրոպայում (Եւրոպ. Ռուսաստան)

կլիման ցամաքային է, ձմեռը խիստ է լինում, ուստի և գետերը տարւայ այդ եղանակին երկար ժամանակով սառչում են. Հիւսիսային Դւինան 6 ամիս շարունակ սառոյցով է պատած լինում, Վոլգան իր միջին հոսանքում՝ 5 ամիս, Դոնը՝ 4 ամիս, Դնեպրը՝ 3 ամիս:



Նկ. 7. Եւրոպ. գետերի համեմ. մեծ. (1 կիլոմետրը—մօտ 1 վերստի):

և սառցադաշտերի տակից են սկսւում Հոնեսոս, Ռոմա, Պո գետերը և Դանուբի վտակները—Իհն, Դրաւա և Սաւա: Ինքը Դանուբը, որ իր երկայնութեամբ Եւրոպայի 2-րդ գետն է (2,800 վ.) սկիզբ է առնում Շւարցվալդից, բայց ջրերի մեծ մասը ստանում է իր ալպեան վտակներից:

Արեւմտեան Եւրոպայի գետերը իրենց հոսանքի բնոյթով տարբերում են Արեւելեան Եւրոպայի գետերից: Նրանք, սկիզբ առնելով բարձր լեռներից, իրենց վերին մասում հոսում են արագ, խորը հովիտների միջով, գոյացնում են սահանքներ և ջրվէժներ: Միջին և ստորին մասերում նրանք հոսում են հանդարտ, բայց էլի աւելի արագ, քան ուսսական գետերը, որովհետեւ նրանց տաշտը աւելի թեք է: Ձմեռը Արեւմ. Եւրոպայի

Գարնանը ձեան հալչելուց արեւելեան Եւրոպայի գետերը այնպէս ջրառատ են դառնում, որ յիշեցնում են Հարաւային Ամերիկայի գետերը: Իսկ ամառը, երբ ցամաքում են ճահիճները և իսպառկարւում աղբիւրները,—այդ նոյն գետերը այնչափ փոքրանում են, որ շատ տեղերում նրանց ծանծաղուտներով կարելի է մինչև իսկ մի ավից միւսը ոտով անցնել:

Արեւմտեան Եւրոպայի գետերը սկիզբ են առնում լեռներից, շատերը — Ալպերից: Այստեղ, յաւիտենական ձեան

գետերը սառչում են կարծ ժամանակով միայն, իսկ նրանցից համեմատաբար աւելի արեւմտեանները (Հոենոս, Սենա, Լուարա, Գարոննա) նոյն իսկ ամեն տարի չեն սառչում: Գարնանը նրանք չափից աւելի չեն վարարում, ոչ էլ ամառը չափից աւելի փոքրանում. դրա պատճառը այն է, որ արեւմտեան Եւրոպայում աւելի շատ մթնոլորտային տեղումներ են թափւում, քան Արեւելեան Եւրոպայում. բացի դրանից՝ Արեւմտեան Եւրոպայի շատ գետերի մէջ ջրեր են թափւում սարերում հալչող ձիւնից և սառցադաշտերից:

Նաւարկութեան համար Արեւմտեան Եւրոպայի գետերը աւելի յարմար են, քան ուղւսական գետերը, որովհետև ձմեռը համարեա չեն սառչում, ամառն էլ չեն փոքրանում: Բացի դրանից՝ նրանք թափւում են բաց ծովեր, որոնցից ազատ կերպով կարելի է ովկիանոս մտնել: Նաւարկութեան համար յարմար են մանաւանդ այն գետերը, որոնք թափւում են Գերմանական ծովը և Լամանշ ու Պա-դը-Կալէ նեղուցները: Նրանց գետաբերանները լայնացել են՝ շնորհիւ ծովի մակընթացութեան և տեղատուութեան: Այդ գետաբերաններն էլ հանդիսանում են ծովային նաւերի համար իբրև առաջնակարգ նաւահանգիստներ:

Լճեր Եւրոպայում շատ կան, որոնց թւում նաև՝ բաւական մեծերը. Լադոգա լիճ (16,000 քառ. վերստ), Օնեգա լիճ (8,000 քառ. վ.)—Ռուսաստանում. Մայմա (Ֆինլանդիա), Վենեք (Սկանդինաւիա): Այս լճերը իրենց մեծութեամբ չեն կարող հաւասարել Ամերիկայի և Աֆրիկայի լճերին: Ընդհանրապէս լճեր շատ կան Եւրոպայի այն մասերում, որոնք հնումը ռառոյցով են ծածկւած եղել—Սկանդինաւիան, Ֆինլանդիան, Ռուսական հարթութեան հիւսիսային մասը, Գերմանական դաշտավայրը, Ալպեան լեռները (վերջինում նշանաւոր են՝ Ժընևեի և Բողէնի լճերը):

Եւրոպայի համարեա բոլոր լճերը հոսող են, նրանց ջուրն էլ անուշ է: Զհոսող աղի լճեր կան միայն Եւրոպական Ռուսաստանի հարաւ-արեւելեան կողմում, որտեղ մթնոլորտային տեղումներ քիչ են թափւում, և շատ ջուր է գոլորշիանում: Այդտեղ հենց, ովկիանոսի մակերեսային 12 սաժէն ցածր, զը-

տնւում է Կասպից լիճը, որ ամենամեծն է երկրագնդի վրայ եղած բոլոր աղի լճերից: Այդ և նրա մօտ գտնուող ուրիշ լճեր մնացորդներ են ցամաքած մի ծովի, որ հնումը տարածւած է եղել դէպի հիւսիս-արեւելք՝ մինչև Սառուցեալ ովկիանոս և արևմուտքում միացած եղել Սև ծովի հետ: Իր մեծութեան և դառն-աղի ջուր ունենալու համար Կասպից լիճը կոչւում է նաև ծով:

(Ինչ՞ու Վոլգան, որ Կասպից լիճն է բերում ահագին քանակութեամբ ջուր, չէ բարձրացնում այդ լճի մակերևոյթը):

ԲՈՒՍՍԿԱՆՈՒԹԻԻՆԸ:— Եւրոպայում աճում են ամեն տեսակ բոյսեր, բացի այրեցեալ գօտու բոյսերից:

Եւրոպայում, ինչպէս և Ասիայում ու Հիւս. Ամերիկայում, տունդրաները բռնում են միայն այնպիսի տեղեր, ուր տարւայ միջին եղանակը 0⁰-ից ցածր է, ձմեռն էլ տևում է 7—8 ամիս, իսկ ամառը՝ 2 ամսից ոչ աւելի: Այսպէս է Եւրոպայի ամենահիւսիսային մասը միայն,— Սառուցեալ ովկիանոսի ափերը: Տունդրաներում աճում են գլխաւորապէս մամուռ և ճահճային բոյսեր. այնտեղ երկրագործութեամբ պարապել անկարելի է:

Եւրոպայի բարեխառն կլիման նպաստաւոր է անտառներ աճեցնելու համար: Եւրոպայի կէսից աւելին ծածկւած է անտառներով:

Հնումը ամբողջ արևմտեան, միջին և արևելեան Եւրոպան ծածկւած է եղել անանցանելի, խիտ անտառներով՝ Փամանակի ընթացքում, քաղաքակրթութեան զարգացման և ազգաբնակչութեան շատանալու հետ զուգընթացաբար, մարդիկ կտրտել են այդ անտառները: Շատ տարածութիւններ այժմ, որոնք առաջ անտառապատ են եղել, ծածկւած են արտերով և արօտատեղիներով, յատկապէս Արևմտեան Եւրոպայում: Այստեղ երկրագործութիւնը աւելի վաղ զարգացաւ, քան Արևելեան Եւրոպայում: Արևմ. Եւրոպայում ներկայումս անտառները բռնում են ամբողջ տարածութեան հազիւ ¹/₅ մասը, այն էլ գլխաւորապէս լեռներում: Աւելի սակաւաբնակ Արևելեան Եւրոպայի (Ռուսաստան) և Սկանդինաւիա թերակղզու ամբողջ տարածութեան ²/₃-ը անտառապատ է:

Եւրոպայի անտառապատ մասի հիւսիսային կողմում, Ուրալեան լեռներից մինչև Սկանդինաւեան լեռները, տարած-

ւում են փշատերև ծառերի ընդարձակ և խիտ անտառներ: Այդ-
տեղ գերակշռում են եղևնի և մայրի ծառերը: Եղևնու խիտ
և մթին անտառները աճում են գլխաւորապէս խոնաւ, կաւա-
յին տեղերում. իսկ մայրի անտառները, որոնք աւելի նօսը են
լինում և բացգոյն, աճում են համեմատաբար չոր, աւազոտ
տեղերում: Սակայն ընդհանրապէս առած՝ փշատերև ծառերի
անտառներում աճում են թէ՛ եղևնի և թէ՛ մայրի, նրանց հետ
նաև՝ կեչի (թղթենի) ծառ, որ սաղարթաւոր է: Այս բոլոր ծառե-
րը շատ տաքութիւն չեն պահանջում, խիստ ցրտերին էլ դի-
մանում են:



Նկ. 8. Բուսականութեան սահմանը Եւրոպայում:

Եղևնին և մայրին ձմեռը չեն թափում իրենց փշերը և կոնները. վերջիններիս մէջ պահւում են մէկ ամառայ ընթացքում դեռ չհասած սերմերը: Կեչին ունի նուրբ տերևներ, որոնք աշնանը թափում են. բայց այդ ծառը շատ քիչ ժամանակ է պահանջում, ընդամենը 3 ամիս, որ իր կողոններից կրկին տերևներ արձակի:

Փշատերև անտառների շրջանից հարաւ, որտեղ տաք եղանակները աւելի երկարատև են լինում, աճում են խառն անտառներ: Եղևնու և մայրի ծառերի կողքին այնտեղ աճում են ոչ միայն կեչի, այլ նաև սաղարթաւոր ուրիշ բազմազան ծառեր— կաղնի, կաղամախի, հացի, թղկի, լաստենի և այլն: Քանի աւելի հարաւ և արևմուտք երթանք, այնչափ էլ աւելի կշատանան սաղարթաւոր ծառերը և կպակասեն փշատերևները: Արևմտեան Եւրոպայի հարթ տեղերում գերակշռում են սաղարթաւոր ծառերի երկու տեսակը— կաղնիին և աճարին. վերջինս պահանջում է երկու անգամ աւելի տաք եղանակ, քան կեչին. նա խիստ ցրտերի էլ չի կարող դիմանալ:

Արևմտեան Եւրոպայի լեռների բուսականութիւնը բազմազան է. ստորոտներում աճում են սաղարթաւոր, իսկ վերևում՝ փշատերև ծառեր:

Եւրոպայի հարաւ-արեւելեան մասում, որտեղ աւելի քիչ մթնոլորտային տեղումներ են թափւում, որտեղ ամառը շոգ է լինում, իսկ ձմեռը ցուրտ, —տարածւում են ընդարձակ տափաստաններ (ստեպ): Այդ տափաստանները բռնում են հարաւ-արեւելեան Ռուսաստանը, միջին և ստորին Գանուբի դաշտավայրերը: Այդտեղ ոչ-ընդարձակ անտառներ պատահում են միայն գետերի խոնաւաշատ հովիտներում:

Տափաստաններում աճում են զանազան տեսակ խոտեր, որոնք գարնանը, ձիւնը հալչելուց յետոյ, արագ կերպով բսնում են, ծաղկում և պտուղ տալիս: Սակայն ամառայ հենց սկզբում տափաստանի խոտերը դեղնում են և չորանում: Համեմատած Ասիայի տափաստանների հետ՝ հարաւ-ուղևակաւ տափաստանները աւելի խոտաւէտ են, այնտեղ խոտը աւելի բարձր է աճում. կայ նաև այն կարևոր հանգամանքը, որ (չհաշւած մերձկասպեան չոր տափաստանները)—ուղևակաւ տափաստանները յարմար են երկրագործութեան համար: Այդ տափաստանների մեծ մասը արդէն հերկած է, խոտերի տեղ այնտեղ ծածանւում են հացարոյսեր:

Միջերկրականի ծովափնեայ երկիրներում, որտեղ ամառը տաք է լինում ու չոր, իսկ ձմեռը համարեա սառնամանիք չի լինում, աճում են մշտադալար սաղարթաւոր ծառեր:¹⁾ Ձի-

¹⁾ Այդ ծառերը ունենում են կոշտ, հաստ կլեպով (կեղև) պատած

թենին այդ շրջանի ամենաբնորոշ ծառն է: Մշտադալար ծառերից յիշենք նաև՝ մրտենի, դավինի, օլէանդր կային: Փշատերև ծառերից այդ շրջանում բնորոշ է—նոճին (կիպարիս): Բացի մշտադալար սաղարթաւոր ծառերից, այդտեղ աճում են նաև մի քանի ուրիշ, սաղարթաւոր ծառեր, որոնց տերևները ձմեռը թափւում են. օրինակ՝ շագանակենի:

Կլիմայից և բուսականութիւնից է կախած մի երկրի գետնի յատկութիւնները: Տունդրայում գետնի մէջ շատ քիչ բուսահող կայ, որովհետև այնտեղ բուսականութիւնը աղքատ է, իսկ կլիման՝ խիստ ցուրտ: Անառապատ շրջանում թէպէտ բուսականութիւնը հարուստ է, բայց և այնպէս գետինը շատ բուսահող չէ պարունակում. պատճառը այն է, որ անտառում ջուր շատ կայ. իսկ սա քշում-տանում է բուսահողը դէպի գետեր և գետակներ:

Հարաւ-Ռուսական տափաստանները, նաև Ունգարիայի և Ստորին Դանուբեան գաշտավայրերը ծածկւած են երկրագնդի ամենաբերրի վերնաշերտով, որ կոչւում է սեւարող: Սրա գոյնը մուգ է, իսկ անձրևից յետոյ՝ սև: Այդ գոյնը կախած է բուսահողից: Թէպէտ տափաստաններում բուսականութիւնը այնչափ հարուստ չէ, որչափ անտառներում, բայց դրա փոխարէն՝ բուսահողը չէ ողողւում տարւում, ինչպէս այդ լինում է անտառներում: Տափաստանների կլիման չորային է, ուստի և համարեա ամբողջ բուսահողը, որ գոյանում է խոտից, մնում է գետնի մէջ: Դարերի ընթացքում այնչափ շատ բուսահող է կիտել այդտեղ, որ սևահողը երբեմն ունենում է մի քանի արշին հաստութիւն:

Վերջապէս՝ Եւրոպայի հարաւային երեք թերակղզիների վերին շերտը բաղկացած է գլխաւորապէս կարմրարողից, որ գոյացել է այնտեղ տարածւած լեռնային տեսակներից—կրաքարերից: Բուսահող այնտեղ շատ չկայ. ձմեռւայ յորդ անձրևները քշում տանում են բուսահողը: Բայց կարմրահողն էլ, եթէ պարարտացնեն, լաւ բերք է տալիս¹⁾:

Մշակովի բոյսերի համար Եւրոպայի կլիման և հողը շատ յարմար են, յատկապէս հացաբոյսերի համար: Սրանցից գարին հասնելու համար ամենաքիչ ժամանակ է պահանջում (50—

տերևներ. այդ հաստ կլեպները չեն թողնում, որ տերևների մէջ եղած թացութիւնը գոլորշիանայ: Նրանք դիմանում են չորային օդին, ձմեռն էլ դիմանում են թեթև սառնամանիքների, ուստի և տերևները չեն թափւում:

¹⁾ Կարմրահողի գոյնը (կարմիր) առաջ է գալիս այն երկաթային նիւթերից, որ պարունակւում են թէ կրաքարերի մէջ և թէ գետնում, որ առաջ է եկել նրանցից:

60 օր): Գարինն աճում է նոյն իսկ համարեա մինչև 70⁰ լայն. տակ: Աւելի հարաւ՝ դրա վրայ աւելանում են վարսակը և հաճարը: Սրանք ևս հասնում են շատ արագ: Այնուհետև գալիս է ցորենը: Թէպէտ սա աճել կարող է խառն անտառների ամբողջ տարածութեան վրայ, բայց լաւ հունձ տալիս է այն գետինը միայն, որ հարուստ է բուսահողով, և որտեղ ամառը տաք է լինում: Այդ պատճառով էլ մեծ քանակութեամբ ցորեն է մշակւում Ռուսաստանում՝ գլխաւորապէս սևահողի շրջանում, իսկ Արևմտ. Եւրոպայում՝ 55-րդ զուգահեռականից հարաւ: Դանուբեան դաշտավայրերում ցորենի հետ միասին մեծ նշանակութիւն ունի եգիպտացորենի մշակութիւնը, որ աւելի տաք կլիմայ է պահանջում, քան նոյնիսկ ցորենը: Լոմբարդիայի դաշտավայրում (Ապենինեան թերակղզու հիւս. մասում) և Միջերկրականի ծովափնեայ ճահճային տեղերում աճում է նաև բրինձ, որ այստեղ արևեստական ոռոգում է պահանջում:

Մշակովի ուրիշ բոյսերից Եւրոպան հարուստ է յատկապէս պտղատու ծառերով: Սրանցից կեռասենին, խնձորենին և տանձենին աճում են Եւրոպայում ամենուրեք, բացի տունդրաների և փշատերև անտառների շրջանից: Արևմտեան և Հարաւ-Արևմտեան Եւրոպայում այս ծառերը յաճախ պատահում են վայրի դրութեան մէջ:

Աւելի շատ տաքութիւն և լոյս է պահանջում խաղողի որթը: Համեմատաբար պակաս դիմացկուն են՝ դեղձի, նշենի, և թզենի ծառերը: Սրանք աճում են գլխաւորապէս Միջերկրականի ափերին՝ մշտադալար ձիթենու հետ: Վերջապէս նարնջենին (ապելսին) և կիտրոնի (լիմոն) ծառերը. սրանք Եւրոպայի ամենաքնքոյշ ծառերն են, բերած հարաւ-արևելեան Ասիայից. աճում են Միջերկրական ծովի ափերին ամեն տեղ, բայց լաւ բերք տալիս են 40-րդ զուգահեռականից հարաւ միայն: Միջերկրականի ափերին, ձենովայի ծոցից դէպի արևմուտք և Պիրենէեան թերակղզու հարաւ-արևելեան մասում մշակւում է փիւնիկեան արմաւենի:

Բացի հացաբոյսերից և պտղատու ծառերից՝ Եւրոպայում

մշակում են նաև շատ ուրիշ բոյսեր: Սրանցից նշանաւոր են տակոխները և ցանովի խոտերը: Կարտոֆիլը Եւրոպա է բերել Ամերիկայից և աճում է ամենուրեք (նոյնիսկ տունգրանների շրջանում): Սովորական ճակնդեղը («տակ») աճում է նմանապէս ամեն տեղ, իսկ շաքարի ճակնդեղը՝ միայն այն տեղում, որ պարունակում է իր մէջ շատ բուսահող, այն էլ այն երկիրներում, ուր ամառը շոգ է լինում: Ցանովի խոտ մշակում և առատ հունձ է տալիս ամեն տեղ, յատկապէս արևմտեան Եւրոպայում. այդտեղ խոտացանքսի վրայ մեծուշադրութիւն են դարձնում (այն դաշտերը, ուր խոտ է ցանած եղել, դրանից յետոյ հացաբոյսերի աւելի լաւ բերք են տալիս):

ԿԵՆՒՄԵՍԱԿԱՆ ԱՇԽԱՐՀԸ: — Եւրոպայի կենդանիները պատկանում են երկու՝ Եւրոպական-Ասիական և Բևեռային շրջաններին: Եւրոպական-Ասիական շրջանը բռնում է համարեա ամբողջ Եւրոպան, իսկ բևեռային շրջանը՝ միայն մայր ցամաքի հիւսիսային մասը և Սառուցեալ ովկիանոսում գրտնուղ կղզիները (Իսլանդիա, Շպիցբերգէն, Նոր երկիր):

Վայրենի կենդանիների կեանքի համար երկու գլխաւոր պայման կայ — առատ սնունդ և հնարաւորութիւն՝ պաշտպանւելու թշնամիներից, որոնցից նբանց համար ամենավտանգաւորն է մարդը:

Եւրոպայի հիւսիսային շրջանի կլիման թէպէտ շատ խիստ է, բայց և այնպէս այնտեղի կենդանական աշխարհը հարուստ է:

Տունգրաններում, յատկապէս Նոր Երկիր և Շպիցբերգէն կղզիներէ վրայ թափառում են հիւսիսային վայրի եղջերուներ: Գիշատիչներից յաճախ պատահում են բևեռային աղւէսներ և սպիտակ արջեր.

Այդ շրջանում շատ կան նաև սպիտակ կաքաւներ և բևեռային մկներ:

Սառուցեալ ովկիանոսի ափերին բուն են դրել միլիոնաւոր ճայեր: Ովկիանոսի մէջ շատ կան ձկներ, որոնք ծառայում են իբրև սնունդի միջոց թռչունների և կետերի, փոկերի (ծովաշուն) և ծովացուլերի համար:

Փշատերեւ ծառերի անտառներում ապրում են եղջերուի զանազան տեսակները, մոյգ-կարմրաւուն արջ, գայլ, աղւէս, սկիւռ, նապաստակ: Թռչուններից բնորոշ են այս շրջանի համար մայրահաւի տեսակները:

Այս բոլոր կենդանիները փշատերեւ անտառներում գտնում են իրենց համար բաւականաչափ սնունդ: Նրանք հեշտութեամբ կարողանում են պաշտպանել իրենց ամենավտանգաւոր թշնամուց՝ մարդուց, որովհետեւ այդ անտառները դեռ ևս սակասաքանակ են: Այնտեղ այնչափ շատ գազան և թռչուն կայ, որ որսորդութիւնը մինչև այժմ էլ կարևոր զբաղմունք է համարւում այնտեղ:



Նկ. 9. Գարայծ:

Ներքին կտրուած են, եղած գայլերը և արջերը միանգամայն բնաջինջ են արւած: Բարձր լեռներում այստեղ-այնտեղ թափառում են բազմաթիւ քարայծեր և սարի այծեր:

Ռուսաստանի և Արևմտեան Եւրոպայի խառն անտառների շրջանում ապրում են նոյն կենդանիները, ինչ որ փշատերեւ անտառների շրջանում, միայն թէ աւելի պակաս թույլ, որովհետեւ այդ անտառները շատ են կտրուած: Արևմտեան Եւրոպայի անտառներում վայրենի կենդանիներ քիչ կան մնացած. մեծ քանակութեամբ միայն սկիւռներ և նապաստակներ կան: Գայլ, արջ մնացել են միայն ամենախուլ անտառներում, գլխաւորապէս Ալպերում, Կարպատեան լեռներում և Բալկաններում: Մեծ-Բրիտանիա և Իրլանդիա կղզիներում, որտեղ համարեա բոլոր անտառ-

Այս բոլոր կենդանիներից սակաւ թւով կան, այն էլ նրա համար, որովհետեւ արգելւած է նրանց որսալ որոշ ժամանակ: Այդ կենդանիները որսալն էլ յատուկ զբաղմունքի աւարկայ չէ, այլ հարուստ մարդկանց համար սոսկ զւաճութիւն, որոնք այդ բանի համար անտառների տէրերին մեծ վարձատրութիւն են տալիս:


Տափաստաններում խոշոր կենդանիներ չկան: Նրանց համար բնորոշ են մանր կրծողները (դաշտային գանազան տեսակ մկնէր), որոնք հացաբոյսերով են կերակրուում: Նրանք մեծամեծ փնտաներ են հասցնում, ուստի և մարդիկ աշխատում են ոչնչացնել այդ կենդանիներին: Սակայն այս բանը այնչափ էլ հեշտ չէ, որովհետեւ նրանք ապրում են խորը որջերում: Վերջին ժամանակներս նրանք տարածւել են նոյն իսկ Արևմտեան Եւրոպայում՝ մինչև Հոենոս: Թռչուններից տափաստաններում կան արօսներ,—այն էլ փոքր թւով:

Միջերկրականի ծովափնեայ երկիրներում մարդիկ սկսել են բնաջինջ անել վայրենի կենդանիներին աւելի վաղ, քան այլ տեղ Եւրոպայում, որովհետեւ Քրիստոսի ծննդից զեռ տուաջ այս երկիրները բաւական խիտ ազգաբնակութիւն ունէին: Ներկայումս այնտեղ հազաւազիւտ բան է որևէ վայրենի կենդանի: Գարնանը այնտեղ երևում են չւողթուչունների երամներ, որոնք դիմում են Եւրոպայից դէպի Աֆրիկա, իսկ աշնանը—ընդհակառակը: Գարնանը այդ երամները Միջերկրական ծովի վրայով թռչելիս երբ յոգնում են, նստում են ծովափին ուր որ պատահում է և այդպիսով յաճախ որսորդների բաժին են դառնում:

Բնաջինջ անելով վայրենի կենդանիներին, եւրոպացիները պահում են ընտանի կենդանիներ: Հիւսիսում, տունդրաների շրջանում, որ ծածկւած է մամռով, կարելի է պահել միայն հիւսիսային եղջերու և լծկան շներ: Եւրոպայի մնացած մասերում ընտանի կենդանիներից զլիսաւորներն են—եղջիւրաւոր խոշոր կենդանիները (եգ, կով, են), ձին և ոչխարը: Հացահատիկների և խոտի առատութիւնը հնարաւորութիւն է տալիս եւրոպացիներին այդ կենդանիներից պահել անազին քանակութեամբ: Միջերկրականի ափերին, որտեղ ամառը չափազանց չորային լինելու պատճառով փարթամ արօտատեղի-

ներ չկան, ձիու փոխարէն պահում են էջ, իսկ կովի փոխարէն—այծ:

ԱԶԳԱՒՆԱԿՈՒԹԻՒՆԸ.—Ազգաբնակչութեան թուով Եւրոպան երկրորդ տեղն է բռնում բոլոր աշխարհամասերի մէջ. ունի 425 միլիոնից աւելի բնակիչ, այսինքն՝ ամբողջ մարդկութեան մօտաւորապէս քառորդ մասը: Թէպէտ Եւրոպայի բնակիչները թիւը երկու անգամ պակաս է Ասիայի բնակիչներին թւից, բայց երկու անգամից էլ աւելի խիտ ազգաբնակչութիւն ունի, քան Ասիան:



Նկ. 10. Եւրոպայի ազգաբնակչութեան խտութեան քարտէս:

Մէկ քառակուսի վերստի վրայ Եւրոպայում միջին հաշուով ապրում են 50 հոգի, իսկ Ասիայում՝ 20 հոգի: Ասիայում անազխն տարածութիւններ են բռնում տունդրաները, չոր տափաստանները և անապատները: Եւրոպայում տունդրաները և չոր տափաստանները քիչ տեղ են բռնում, իսկ անապատ բոլորովին չկայ:

Եւրոպայի տունդրաներում մշտապէս ապրել կարող են միմիայն թափառաշրջիկ-եղջերուապահները: Այս պատճառով էլ այնտեղ չկան հաստատուն բնակչութիւններ և ճանապարհներ: Եւրոպայի փշատերեւ անտառների շրջանի կլիման բաւական

խիստ է. երկրագործութեամբ այնտեղ թէպէտ պարապել կարելի է, բայց հողը արգաւանդ չէ, քիչ բերք է տալիս: Ուստի այդ շրջանի ազգաբնակութիւնն էլ խիտ չէ: Գիւղեր շատ քիչ կան, այն էլ մեծ մասով գետերի ափին. այս գետերը ծառայում են իբրև հաղորդակցութեան գլխաւոր միջոցներ: Մարդիկ զբաղւում են այնտեղ որսորդութեամբ և փայտահատութեամբ:

Այսպիսով ուրեմն, Հիւսիսային Եւրոպան, որտեղ տարածւում են տունդրաներ և փշատերև ծառերի անտառներ, նոսր ազգաբնակութիւն ունի:

Եւրոպայի միջին մասը, որտեղ տարածւում են խառն անտառներ և սևահողի տափաստաններ, խիտ ազգաբնակութիւն ունի: Անտառները այս մասում շատ են կտրուած. նրանց տեղ այժմ տարածւում են մշակւած դաշտեր. տափաստանները համարեա բոլորը հերկած են: Ամեն տեղ ճանապարհներ և բնակութիւններ են զցւած: Մեծ տարբերութիւն կայ այդ կողմից Արևմտեան և Արևելեան Եւրոպայի մէջ:

Արևելքում, այսինքն Եւրոպական Ռուսաստանում, բնակութիւնները կենտրոնացած են գլխաւորապէս գիւղերում և աւաններում: Այդտեղ է ապրում Ռուսաստանի ազգաբնակութեան մեծագոյն ($7/8$) մասը, որովհետև նրա գլխաւոր զբաղմունքն է գիւղատնտեսութիւնը: Թէպէտ Ռուսաստանում քիչ քաղաքներ չկան, բայց նրանք ընկած են իրարից հեռու:

Արևմտեան Եւրոպայում էլ պակաս թւով գիւղեր և աւաններ չկան, քան Ռուսաստանում, որովհետև այնտեղ ևս շատ բնակիչներ զբաղւում են գիւղատնտեսութեամբ: Սակայն բացի դրանից՝ այնտեղ կան նաև շատ քաղաքներ, որոնք իրարից հեռու չեն գտնւում և միացած են երկաթուղիների ցանցով: Ըաղաքների ազգաբնակութիւնը խիտ է, մարդիկ ապրում են բազմաշարի տներում: Շատ քաղաքների ծայրերում գտնւում են գործարաններ, իսկ մէջը՝ բազմաթիւ խանութներ: Առևտուրը և գործարանային արդիւնագործութիւնը այնտեղ կազմում են քաղաքացի բնակիչների գլխաւոր զբաղմունքները: Արևմտ. Եւրոպայում այնքան շատ քաղաքներ կան, և սրանք այնչափ

շատ բնակիչներ ունեն, որ մարդկանց թիւը քաղաքներում աւելի է, քան գիւղերում: Այսպէս ուրեմն՝ Արևմտեան Եւրոպան աւելի խիտ ազգաբնակիչութիւն ունի, քան Արևելեան Եւրոպան:

Եւրոպայի հարաւում, մերձարևադարձային կլիմայի տակ, ազգաբնակիչութիւնը կենտրոնացած է գլխաւորապէս ծովափերին և ծովափնեայ դաշտավայրերում, որտեղ կլիման նպաստաւոր է պտղատու քնքոյշ ծառերի համար, և որտեղ կարելի է այգիները արեւստական կերպով ոռոգել: Այդ տեղերում հացի և մրգի բերքը առատ է, զրա համար էլ ազգաբնակիչութիւնը խիտ է. ապրում են գլխաւորապէս գիւղերում՝ և աւաններում: Շատ գիւղացիներ պարապում են միմիայն այգեգործութեամբ:

ԵՒՐՈՊԱՅԻ ԺՈՂՈՎՈՒՐԴՆԵՐԸ ԵՒ ՊԵՏՈՒԹԻՒՆՆԵՐԸ,—Եւրոպայի ժողովուրդների (թւով 50-ից աւելի) ամենամեծ մասը պատկանում է սպիտակ ցեղին: Ամբողջ ազգաբնակիչութեան $\frac{1}{20}$ մասը միայն գեղին ցեղին է պատկանում:

Սպիտակ ցեղին պատկանող բոլոր ժողովուրդները պատկանում են երեք տարբեր ճիւղերի—սլաւոնական, գերմանական և ռոմանական: Թւով նրանք մօտաւորապէս հաւասար են միմեանց:

Սլաւոնական ժողովուրդները, համաձայն իրենց բնակութեան տեղի, բաժանւում են—արևելեան, արևմտեան և հարաւային սլաւոնների: Արևելեան սլաւոնները—ռուսներն են. արևմտեան սլաւոններն են՝ լեհացիները և չեխերը. հարաւային սլաւոնները՝ սերբերը, բուլղարները և չերնօգորցիները:

Գերման ժողովուրդներ են—գերմանացիները, շվեդները, նորվեգացիները, դանիացիները, հոլլանդացիները և անգլիացիները: Ռոմանական ժողովուրդներ են—ֆրանսիացիները, իտալացիները, իսպանացիները, պորտուգալացիները և ռումինացիները:

Սլաւոն ժողովուրդների լեզուները իրար նման են: Օրինակ, ուսը կարող է որոշ բառեր հասկանալ լեհերէն, չեխերէն,—առանց սովորած լինելու այդ լեզուները. և ընդհակառակը: Այդ լեզուների նմանութիւնը ցոյց է տալիս, որ սլաւոնական բոլոր ժողովուրդները ծագում են մի հին ժողովրդից (սլաւոն), որ խօսում էր դեռ ճիւղերի չբաժանւած



Նկ. 11. Հիւսիսային եւրոպացի (գերման ց.): Հարուստային եւրոպացի (ուսման ց.)


հին-սլաւոնական լեզուով: Այսպէս նաև ուսմանական ժողովուրդները, ինչպէս սլաւոնները, իսուսում են նման լեզուներով, որոնք ծագել են մէկ լեզուից—լատիներէնից: Գերման ժողովուրդների լեզուներն էլ իրար նման են, միայն անգլիերէնի մէջ շատ բառեր կան փոխ առած ուսմանական լեզուներից,

Սլաւոն, գերման և ուսման ժողովուրդները, թէպէտ իրար լեզու հասկանալ չեն կարող, բայց և այնպէս նրանց լեզուները ազգակից են իրար, բոլորն էլ շատ հին ժամանակներում ծագել են մէկ լեզուից—հին հնդկերէնից. զբա համար էլ նրանք կոչուում են հնդկա-եւրոպական լեզուներ (Հայերէնն էլ զբանց թւին է պատկանում): Շատ բառերի արմատներն ունեն են այդ տարբեր լեզուների մէջ¹⁾:

Սպիտակ ցեղին են պատկանում նաև, յիշած ժողովուրդներից դուրս, յոյները, լիւսացիները և լատիշները: Եւրոպայում բաւական շատ հրէաներ ևս կան, որոնք ցրւած են համարեա ամբողջ Եւրոպայի զանազան կողմերում: Նրանց մեծ մասը սակայն ապրում է Եւրոպ. Ռուսաստանի արևմտեան մասում:

¹⁾ Օրինակ, ուսներէն—мать (матери), գերմաներէն—Mutter, ֆրանսերէն mère իտալերէն madre հայերէն—մայր, (հին ձեռ—մատր) բառերը նոյն արմատն ունեն: Ռուսերէն—братъ, գերմաներէն—Bruder, ֆրանս. frère, իտալերէն—fratre; ուսներէն три, գերմաներէն—drei, իտալերէն—tre, ֆրանսերէն—trois. Այս բոլոր և ուրիշ շատ բառերի արմատները նոյնն են հնդ-եւրոպական բոլոր լեզուների մէջ:

Վերոյիշեալ բոլոր ժողովուրդները թէպէտ սպիտակ ցեղին են պատկանում, բայց նրանց արտաքին տեսքի մէջ էլի տարբերութիւն կայ: Այսպէս օրինակ, ումանական ժողովուրդները (Հարաւ. Եւրոպա) աւելի ցածրահասակ մարդիկ են, քան գերմանները և սլաւոնները (Հիւս. և Միջին Եւրոպա): Նրանց կաշւի գոյնը աւելի մուգ է, մազերը և աչքերը՝ սև: Իսկ գերմանները և սլաւոնները շիկահեր են, մոխրագոյն աչքերով կամ կապտաչեայ և բաց-գոյն կաշւով: Հիւսիսային և հարաւային եւրոպացու բնաւորութեան մէջ էլ տարբերութիւն կայ: Առաջինները աւելի հանդարտ են, եռանդուն և դիմացկուն. վերջինները՝ յուզուող են, դիւրաշարժ և անհաստատ:



Նկ. 12. Կրօնների և դաւանութիւնների տարածումը Եւրոպայում:

Դեղին ցեղին պատկանող ժողովուրդներ կան Եւրոպայում, բայց սակաւաթիւ: Նրանցից նշանաւորներն են—Ֆինները, ուրոնք ապրում Ֆիննական ծովի շուրջը, թաթարները (Կազանի) Եւրոպ. Ռուսաստանում. իսկ արեւմտեան Եւրոպայում—մաշարներ (ուկրաինացիներ) և թիւրքեր (տաճիկներ):

Սպիտակ ցեղին պատկանող ժողովուրդների ամենամեծ մասը, բացառութեամբ հրէաների, հետևում է քրիստոնէական կրօնին, սակայն տարբեր դաւանութիւններով: Սլաւոնները մեծ մասով ուղղափոս (պրաւօսլաւ) են, ումանական

ժողովուրդները՝ կաթողիկ, գերման ժողովուրդները՝ ըողողա-
կան: Գեղին ցեղին պատկանող ժողովուրդների մեծ մասը
քրիստոնեայ է. թիւրքերը և թաթարները մահմեդական կրօնին
են հետևում:

Եւրոպական պետութիւնների թիւն է 22¹⁾: Սրանց մէջ
միայն Ռուսաստանին է պատկանում ամբողջ Եւրոպայի կէսից
աւելին: Բնակիչների թւով էլ Եւրոպական Ռուսաստանը բար-
ձրը է Եւրոպայի մնացած պետութիւններից՝ առանձին-առան-
ձին վերցրած:

Եւրոպական պետութիւններից վեցը համարւում են մեծ
պետութիւններ: Դրանք են՝ Ռուսաստանը, Գերմանիան,
Աւստրո-Ունգարիան, Անգլիան, Ֆրանսիան և Իտալիան:
Մնացած պետութիւնները համարւում են երկրորդական, որով-
հետև իրենց բնակիչների թւով և ոյժով շատ յետ են մնում
մեծ պետութիւններից:

Կառավարութեան ձևին նայելով՝ Եւրոպայի համարեա բո-
լոր պետութիւնները սահմանադրական միապետութիւններ են,
որտեղ բարձրագոյն իշխանութիւնը բաժանւած է միապետի և
ժողովրդական ներկայացուցիչների մէջ: Միայն Ֆրանսիան և
Շւէյցարիան հասարակապետութիւններ են:

¹⁾ Եթէ չհաշւենք 4 շատ փոքր պետութիւններ՝ ընդամենը մի
քանի վերստ երկայնութեամբ և լայնութեամբ ու 5--15 հազար բնա-
կիչներով:

Եւրոպական պետութիւնները, նրանց տարածութիւնը և
ազգաբնակչութեան թիւը.

Պետութիւն	Տարածութ. (քառ. վեր.)	ազգաբնակչութիւնը
1. Եւրոպ. Ռուսաստան ¹⁾	4.732.000	123.000.000
2. Աւստրո-Ունգարիա	583.000	50.000.000
3. Գերմանիա	475.000	63.000.000
4. Ֆրանսիա	471.000	39.000.000
5. Իսպանիա	437.000	19.000.000
6. Շեքիիա	394.000	5.300.000
7. Նորեգիա	282.000	2.500.000
8. Անգլիա	277.600	45.000.000
9. Իտալիա	252.000	34.000.000
10. Եւրոպ. Թիւրքիա	149.000	6.000.000
11. Ռումինիա	115.000	7.000.000
12. Բուլգարիա	83.000	4.000.000
13. Պորտուգալիա	80.000	5.000.000
14. Յունաստան	57.000	2.700.000
15. Սերբիա	42.000	2.700.000
16. Շեյնցարիա	36.000	3.500.000
17. Դանիա	35.000	2.700.000
18. Հոլլանդիա	29.000	5.700.000
19. Բելգիա	26.000	7.300.000
20. Չեռնոգորիա	8.000	230.000
21. Կրետէ	8.000	300.000
22. Լուքսեմբուրգ	2.500	250.000

¹⁾ Կովկասի տարածութիւնն է 415.000 քառ. վերստ, իսկ բնակիչները թիւը՝ մօտ 10 միլիոն:

ԲԱԼԿԱՆԵԱՆ ԹԵՐԵԿՂՋԻ

Ը Ն Փ Հ Ա Ն Ո Ր Ի Ն Կ Ա Ր Ա Գ Ի Ր Ո Ւ Թ Ի Ւ Ն

Բալկանեան թերակղզու հիւսիսային սահման են ընդունում սովորաբար այն կոր գիծը; որ ձգուած է Ֆիուլմէ ծոցից՝ (Սգրիատիկ ծովում) Սաւա գետի վրայով դէպի Կարպատեան լեռների հարաւային ստորոտները, իսկ այնտեղից՝ դէպի Դանուբի գետաբերանը:

Հիւսիսային կողմում Բալկանեան թերակղզին լայն է: Հարաւ գնալով նա աւելի ու աւելի նեղ է դառնում, ափերը չափազանց կտրտում են: Հարաւային կողմում Բալկանեան թերակղզին շրջապատւած է բազմաթիւ կղզիներով, որոնք է՛գէյեան ծովում կազմում են մի արշիպելագ՝ Յունական (Յոնիական) անուանով: Ամբողջ երկրագնդի վրայ դժւար է գտնել մի ուրիշ վայր, ուր ցամաքը այդչափ շատ թերակղզիների և կղզիների, իսկ ծովը՝ այդչափ շատ ծոցերի և նեղուցների բաժանւած լինէր:

Բալկանեան թերակղզու մակերևոյթը լեռնոտ է: Միայն հիւսիս-արևելեան մասում տարածւում է Ստորին Դանուբեան ընդարձակ դաշտավայրը, իսկ մնացած տարածութիւնը համարեաւ ծածկւած է լեռներով. դրանք են՝ Բալկանեան, Սերը-Մակեդոնական և Դինարեան լեռները:

Ստորին Դանուբեան դաշտավայրը տարածւում Կարպատեան և Բալկանեան լեռների մէջ: Հիւսիս-արևելեան կողմում այդ հարթութիւնը միանում է հարաւ-ուստական հարթութեան հետ: Այդ երկու հարթութիւնները իրենց ընութեամբ շատ նման կողմեր ունեն. երկուսն էլ ծածկւած են նոյն սեւահողի շերտով, նման տափաստաններով:

Ջրառատ Դանուբ գետը ճեղքում-անցնում է Բալկանների և Կարպատների մէջ ընկած «Երկաթի դարպաս» կոչւող կիրճը. այդտեղից նա մտնում է Ստորին-Դանուբեան դաշտավայրը, որտեղ շատ հանդարտ է հոսում: Դանուբի աջ ափը այդտեղ բարձր է, իսկ ձախը՝ ցածր. երբ գարնանը գետը վարարում է, ձախ ափին ընկնող տարածութիւնը տասնեակ վերստերով ջրի տակ է մնում: Դանուբ գետը իր ընթացքի վրայ դէպի Սև ծովը՝ հանդիպում է Դորըուջա կոչւող լեռ-

նախմբին, որ փոքր տարածութիւն է բռնում և բաղկացած է գրանիտից: Այդ լեռների սահմանը մտնելիս գետը թեքում է դէպի հիւսիս, ապա բազուկների բաժանելով կազմում է ընդարձակ, ճահճային դելտայ և յետոյ թափում Սև ծովը:

Բալկանեան լեռները, որոնցից և ամբողջ թերակղզին ստացել է իր անունը, մեծ տարածութիւն չեն բռնում թերակղզու վրայ: Այդ լեռները հիւսիսում մօտենում են Կարպատեան լեռներին. սրանցից բաժանում են «Երկաթէ դարպաս» կոչւած կիրճով: Այդ տեղից Բալկանները աղեղի ձևով տարածում են մինչև Սև ծովը՝ 600 վերտ երկայնութեամբ: Այդ լեռների լայնութիւնն է՝ 25—40 վերստ. ամենաբարձր գագաթները $2\frac{1}{4}$ վերստից աւելի չեն: Բալկանները ձգւած են շարքերով, բաղկացած են երկայնաձիգ, 2 վերստից բարձր, լեռնաշղթաներից: Այդ լեռնաշղթաների վրայով, բաւական բարձր անցնում են լեռնուղիներ: Դրանցից ամենանշանաւորն է Շիպկայի լեռնուղին, 1 վերստ բարձրութեան վրայ: Չմեռը, երբ Բալկանները ձիւնով են ծածկւած լինում, հեշտ չէ երթեկել այդ լեռնուղիներով: Բալկանների լանջերի վրայ կանաչին են տալիս մարգագետիններ և աճում խիտ անտառներ: Այդ անտառներում մինչև օրս էլ ապրում են սարի այծեր, վայրի խոզեր (վարազ) և նոյն իսկ արջեր:



Նկ. 13. Տեսարան Գինարեան լեռների վրայ:

(Նկարի առջևի մասում և հեռում՝ կրաքարային անպտուղ լեռներ. ներքև, լեռնագոգում, երևում են չերնօգորցիների դաշտեր (քարեայ ցանկապատերով):

Սերը-Մակեդոնական լեռները տարբերում են Բալկաններից նրանով, որ լեռնաշարքերից չեն բաղկացած, այլ լեռնախմբերից. նրանք

անկանոն ձևով ցրւած ժայռակոյտերի նմանութիւն ունեն, բաժանւած են իրարից կաթսայանման խոր ցածրութիւններով: Այդ լեռները անտառապատ են (կաղնի, աճաբի և փշատերև ծառեր):

Հարաւային կողմում, Էգէեան ծովի ափերի մօտ բարձրանում են Ոլիմպոս (մօտ 3 վ.) և Աֆոն (մօտ 2 վ.) սարերը: Սրանց լանջերին աճում են մշտադալար ծառեր—մրտենի, դափնի, օլէանդր. ստորոտներում՝ ձիթենի: Այդտեղ արդէն կլիման մերձարեւադարձային է—ամառը չորային, իսկ ձմեռը՝ մեղմ, անձրևային: Ձիւն դալիս է միայն սարերի գագաթներին: Թերակղզու ներսում, նոյնիսկ կաթսայանման ցածրութիւններում, ձմեռ ժամանակ սառնամանիքներ և ձիւնաբեր մրրիկներ (բուք) են լինում:

Դինարեան լեռները ձգւում են Բալկանեան թերակղզու արևմտեան մասի ամբողջ երկայնութեամբ՝ 1,500 վերստ տարածութեան վրայ: Հիւսիսում Դինարեան լեռները միանում են Ալպերին. այդ (հիւսիսային) մասում նրանք կոչւում են Դինարեան Ալպեր. իսկ հարաւում կոչւում են Պինդոս և շարունակւում են մինչև թերակղզու ծայրը: Այս մասում նշանաւոր է Պառնաս գագաթը (մօտ 2 $\frac{1}{2}$ վ.): Դինարեան լեռները բարձրութեամբ յետ չեն մնում Բալկաններից, իսկ լայնութեամբ և երկայնութեամբ երկու անգամ աւելի են նրանցից. այնպէս որ Դինարեան լեռները բռնում են ամբողջ թերակղզու համարեա կէսը: Իրենց ամբողջ տարածութեան վրայ այդ լեռները բաղկացած են բազմաթիւ գուգահեռական շարքերից: Ադրիատիկ և Յոնիական ծովերի ափերին այդ լեռնաշարքերը շատ են մօտենում իրար և այնպէս ուղղաձիգ կերպով իջնում են ծով, որ համարեա կտրում են Բալկանեան թերակղզու հազորդակցութիւնը՝ յիշած ծովերի հետ:

Դինարեան լեռները տխուր տեսք ունեն: Հազադէպ բան է այնտեղ հանդիպել անտառների, աւելի ևս հազադէպ՝ տեսնել կանաչ մարգագետիններ: Ամեն տեղ բարձրանում են լերկ, մոխրագոյն ապառաժներ, տեղ-տեղ միայն նօսր թփերով ծածկւած: Այս բոլորը նրանից է, որ Դինարեան սարերում լեռնային տեսակներից գերակշռում է կրաքարը, որից հեշտութեամբ է ջուրը ներս անցնում: Ուստի և Դինարեան լեռների մակերևոյթը ջրազուրկ է: Այնտեղով անցնող ճանապարհորդը չէ տեսնում ո՛չ փոքր ի շատէ մեծ գետեր, ո՛չ գետակներ, ո՛չ էլ աղբիւրներ:

Գարնանը միայն, երբ սարերում ձիւնը արագ հալւում է և ժամանակ չի լինում, որ ամբողջ ջուրը գետինը ծծի, գոյանում են գետակներ: Դինարեան լեռներում երբեմն պատահում են ընդարձակ լեռնագոգեր՝ ամեն կողմից լերկ կողերով շրջապատւած. (նրանք այնտեղ «դաշտ» են կոչւում). գարնանը լցւում են ջրով և լճեր գոյաց-

նում: Ամառուայ սկզբին այդ լճերի ջուրը հետզհետէ գետին է ծծուում, և լճերն էլ չորանում են:

Այսպէս է օրինակ «Պոպի դաշտը» (Հերցոգովինայում): Գարնանը այդ «դաշտը» ներկայացնում է մի խոր լիճ, 40 վերստ երկայնութեամբ և 5—10 վերստ լայնութեամբ: Ամառը, երբ ջուրը ցամաքում է, լճի յատակը ծածկւած է լինում տիղմով. այդ ժամանակ էլ «դաշտը» վարում են և հացահատիկներ ցանում:

Այսպէս ուրեմն՝ Դինարեան լեռները ընդհանրապէս լերկ են, ամայի: Բայց որոշ տեղերում, ուր այդ լեռները բաղկացած են ոչ թէ կրաքարերից, այլ կաւային թերթաքարերից¹⁾, այնտեղ նրանք ծածկւած են փշատերև և սաղարթաւոր ծառերի խառն, խիտ անտառներով: Ծովափերին, լեռների ստորոտներում, ամենուրեք աճում են մշտադալար թփեր և ծառեր:

Էգէեան ծովի կղզիները—Էւբէան, Կիկլադները և Կրետէն—բոլորն էլ լեռնոտ են, բայց ծովափերին ունեն մերձարևադարձային կլիմայ և մշտադալար բուսականութիւն: Իրենց ծագման նայելով՝ այդ կղզիները ներկայացնում են մնացորդներ մի ցամաքի, որ շատ հնումը միացնելիս է եղել Բալկանեան թերակղզին Փոքր Ասիայի հետ:

Ստորերկրեայ ոյժերը, որ պատճառ դարձան Բալկանեան թերակղզին Փոքր Ասիայից բաժանելուն, շարունակում են գործել նաև ներկայումս: Այս բանը երևում է թերակղզու վրայ յաճախակի կրկնող և աւերիչ երկրաշարժներից, մանաւանդ հարաւում: Կիկլադեան խմբին պատկանող կղզիներից մի քանիսը հրաբխային ծագում ունեն: Սանտորին կղզին հրաբխային է:

Բալկանեան թերակղզու ազգաբնակիւթիւնը բաղկացած է բազմազան ժողովուրդներից. զբանք են՝ բոլգարներ, սերբեր, չերնօգորցիներ, ռումիներ, յոյներ, այլբանացիներ, լիւրքեր (տաճիկներ), կան նաև հայեր: Բուլգարները, սերբերը և չերնօգորցիները սլաւոններ են, ռումիները խօսում են ռումանական լեզուով, որի բառերի կէսը սակայն սլաւոնական է: Տաճիկները կամ լիւրքերը գեղին ցեղին պատկանող ժողովուրդ են, բայց դարերի ընթացքում նրանք այնչափ են խառնել սպիտակ ցեղին պատկանող ժողովուրդների հետ, որ այժմ նրանց, արտաքին տեսքով, դժւար է բալկանեան միւս ժողովուրդներից ջոկել:

Դաւանութեան նայելով՝ ռումիները, բոլգարները և յոյները ուղղափառ (օրթօգոքս, պրաւօսլաւ) են. սերբերի մի

1) Կաւը շատ ջուր է կլանում, նրա միջով ջուրը ներքև չէ անցնում:

մասը ուղղափառ է, միևս մասը՝ կաթոյիկ. թիւրքերը և ալբանացիների մեծ մասը՝ մահմեդական: Մահմեդականներ կան նաև սլաւոնական ժողովուրդների մէջ, որոնց թիւրքերը առաջ ուժով են մահմեդական դարձրել:

Տաճիկները 14-րդ դարում եկան Փոքր Ասիայից և հետըզհետէ նւաճեցին Բալիանեան ամբողջ թերակղզին, բացառութեամբ փոքրիկ Չերնօզորիայի: Նրանց տիրապետութիւնը տևեց մի քանի դար. անցած 19-րդ դարում միայն, Ռուսաստանի ու եւրոպական մի քանի ուրիշ պետութիւնների օգնութեամբ, հետզհետէ ազգային անկախութիւն ձեռք բերին—Յունաստանը, Սերբիան, Ռումինիան և վերջապէս Բոլղարիան:

ԵՐՐՈՊԵԱԿԱՆ ԹԻՒՐՔԻՆ

Եւրոպական թիւրքիան կազմում է ամբողջ թիւրքիայի տարածութեան $\frac{1}{12}$ մասը միայն, իսկ բնակիչները՝ $\frac{1}{4}$ մասը:

(Յիշել, թէ թիւրքիան Ասիայում լինչ երկիրների է տիրապետում):

Եւրոպական թիւրքիան բաղկացած է երեք գլխաւոր մասերից. դրանք են՝ Ալբանիա, Մակեդոնիա և Թրակիա: Ալբանիան մի վայրի, անսպառաքէր երկիր է. այնտեղով են անցնում կրաքարից բաղկացած Դինարեան լեռները: Մակեդոնիան և Թրակիան բնութեամբ հարուստ երկիրներ են: Այդտեղ գտնւող լեռնախմբերը հարուստ են անտառներով և արօտատեղիներով. կաթսայանման ցածրութիւնները յարմար են երկրագործութեան համար. իսկ ծովափերը, շնորհիւ իրենց մեղմ կլիմայի, յարմար են այգեգործութեան համար:

Եւրոպական թիւրքիան խառն ազգաբնակչութիւն ունի (6 միլ.). նրա $\frac{1}{4}$ մասը միայն ($1\frac{1}{2}$ միլ.) թիւրքեր են. մնացած մասը բաղկացած է՝ սլաւոններից (բոլղարներ և սերբեր), ալբանացիներից, յոյներից. կան նաև հայեր:

Այս բոլոր ժողովուրդները զբաղւում են գլխաւորապէս գիւղական տնտեսութեամբ, հերկում են բերրի ցածրութիւնները և ցանում են եգիպտացորեն, ցորեն, ծխախոտ: Լեռնային արօտատեղիներում արածեցնում են ոչխար և այծ. էգէեան ծովի ափերին մշակում են՝ ձիթենի, խաղողի որթ և պտղատու ծառեր:

Թիւրքիայի գանազան ժողովուրդները դարեր շարունակ անընդհատ կռիւ և անհաշտութեան մէջ են եղել իրար հետ: Գարերի ընթացքում մահմեդականները—թիւրքերը և ալբանացիները—արհամարհանքով են վերաբերել քրիստոնեաներին, նրանց համարել են իրաւազուրկ, ամեն կերպ ճնշել և կողոպտել են նրանց. միայն վերջերս, սահմանադրութիւնից յետոյ, վերացած է համարուում այս դրութիւնը:

Ժողովրդական կրթութիւնը Թիւրքիայում գտնուում է ամենախղճալի դրութեան մէջ. դպրոցներ շատ քիչ կան, ժողովրդի մեծ մասը խարխափում է տգիտութեան մէջ (յետամնաց են մանաւանդ, վայրենութեան չափ, ալբանացիները):

Այս ամենի պատճառով տնտեսութեան բոլոր ճիւղերը Եւրոպական Թիւրքիայում չեն զարգացել, այլ կանգ են առել: Եղած արդիւնաբերական ձեռնարկութիւններն էլ օտար երկրացիների ձեռքում են գտնուում: Պետութեան եկամուտներից շատերը, օրինակ ծխախոտի հարկը, օտար պետութիւններին են տրուում, իհաշիւ նրանցից վերցրած պարտքի: Թիւրքիայի պետական պարտքը ահագին չափերի է հասնում:

Կառավարութեան ձեւին նայելով՝ Թիւրքիան կայսրութիւն է, որի գլուխ է կանգնած փազիշահը կամ սուլթանը. Սա համարուում է միաժամանակ երկրագնդիս բոլոր սիւննի-մահմեդականների կրօնապետ:

Սուլթանները մինչև 1908 թւականը ինքնակալ միապետներ էին. բայց այդ թւականի յուլիս ամսին յեղաշրջում տեղի ունեցաւ Թիւրքիայում, հաստատուեց սահմանադրութիւն. այժմ սուլթանը սահմանադրական միապետ է:

Թիւրքիայի մայրաքաղաքն է՝ Կոստանդնուպոլիսը, որ գտնուում է Բոսֆորի ափին—Ասիայի ու Եւրոպայի սահմանում: Կ. Պոլսի դիրքը շատ յարմար է. այս պատճառով էլ նա դեռ հին ժամանակներում աչքի ընկնող դեր էր խաղում առևտրի մէջ: Ներկայումս էլ Կ. Պոլիսը առևտրական նշանաւոր կենտրոն է և նաւահանգիստ ոչ միայն Թիւրքիայի, այլ նաև ամբողջ հարաւ-արևելեան Եւրոպայի համար: Նրա բնակիչների թիւը մէկ միլիոնից աւելի է, որից մօտաւորապէս $\frac{1}{3}$ -ը թիւր-

քեր են, իսկ մնացածները՝ յոյներ, հայեր (մօտ 150,000) և ծառերկրացիներ:

Կոստանդնուպոլիսը թիւրքահայերի մտաւոր կենտրոնն է: Այնտեղ հայերը ունեն բազմաթիւ տարրական և երկու միջնակարգ դպրոցներ: Այդտեղ լոյս են տեսնում բաւական թւով հայերէն օրաթերթեր, հանդէսներ և զրքեր: Այդ քաղաքում կան նաև հայկական հիւանդանոց, բարեգործական և ազգային ուրիշ հաստատութիւններ: Թիւրքահայերը իրենց ազգային գործերը կառավարում են ինքնավար կերպով, համաձայն առանձին սահմանադրութեան: Ազգային գործերը կառավարելու համար ընտրւում է «ազգային վարչութիւնը», որի գլուխ է համարւում թիւրքահայերի պատրիարքը. նա նստում է Պոլսում, որտեղ է գտնւում նաև ազգային վարչութիւնը:



Նկ. 14. Կոստանդնուպոլիս: Յեկեւում երեւում է Բոսֆորը (որտեղ նաև են կանգնած), իսկ ձախ կողմում Ոսկեղ ջիւրը (որի վրայ կամուրջ կայ):

Կ. Պոլիսը գտնւում է աշխարհիս ամենալաւ նաւահանգստներից մէկի՝ Ոսկեղջիւրի ափերին: Բոսֆորն է գոյացրել այդ ծովախորշ-նաւահանգիստը (Եւրոպ. ցամաքի վրայ): Ոսկեղջիւրը բաժանում է քաղաքը երկու մասի—հարաւային և հիւսիսային: Ամեն մէկն էլ բաժան-

ւում է շատ թաղերի: Հարաւային մասը գլխաւորապէս թիւրքարնակ է. նշանաւոր քաղաքամասն է Ստամբուլը: Այստեղ են գտնուում մեծ մզկիթներ, որոնցից ամենանշանաւորն է «Այա-Սոֆիա» (Սուրբ Սոֆիա) մզկիթը, որ առաջ քրիստոնէական (յունական) եկեղեցի է եղել: Մի շարժական կամուրջ միացնում է Ստամբուլը քաղաքի հիւսիսային մասի հետ, որի ընակիչները մեծ մասամբ քրիստոնեաներ են: Այդտեղ է գտնուում Գալատա քաղաքամասը, ուր կետրոնացած է առևտուրը և և գլխաւորապէս յոյների, հայերի ու եւրոպացիների ձեռքում է գտնուում: Քաղաքի հիւսիսային մասում է գտնուում նաև Պերա անունով քաղաքամասը, որի ընակիչները գլխաւորապէս եւրոպացիներ և այլ քրիստոնեաներ են:



Նկ. 15. Այա-Սոֆիա մզկիթը և Պոլսում:

Հոյակապ է Կ. Պոլսի ընդհանուր տեսարանը ծովից՝ իր բազմաթիւ մզկիթներով և բարձր մինարէթներով, ընդարձակ նաւահանգստով, ուր կանգնում և շարժւում են բազմաթիւ նաւեր: Սակայն քաղաքի ներսը շատ կեղտոտ է, մանաւանդ Ստամբուլը. փողոցները նեղ են, ծուռ-մուռ, աղբոտ. բազմաթիւ շներ էլ թափառում են փողոցներում:

Եւրոպական թիւրքիայում ընակիչներին թուով (130 հազ.) երկրորդ քաղաքն է Սալոնիկ, ամենալաւ նաւահանգիստը էգէտան ծովի ափին: Սալոնիկը երկաթուղու գծով միացած է Կ. Պոլսի և Սերբիայի մայրաքաղաք Բելգրադի հետ: Մնացած քաղաքներից նշանաւոր են—Ադրիանապոլիս՝ Թրակիայում,

Մոնաստիր՝ Մակեդոնիայում, Եանինա՝ Ալբանիայում: Սրանք մեծ քաղաքներ չեն, — իւրաքանչիւրը հազիւ մի քանի տասնեակ հազար բնակիչ ունի:

Բ Ո Ւ Գ Ա Ր Ի Ա

Բողաբրիան բռնում է Ստորին-Պանուբեան դաշտա-վայրի հարաւային ծայրերը, Բալկանեան լեռները (բացի նրանց արևմտեան ծայրերից) և Բալկաններից դէպի հարաւ տարածւող ցածրութիւնը, որ կոչւում է Արևելեան Ռումելիա:

Բողաբրիայի հար-թութիւնները թէպէտ ընդարձակ չեն, բայց արգաւանդ են: Լեռները անտառներով են ծածկւած և հարուստ են զանազան տեսակ մետաղահանքերով, մանաւանդ պղնձի հանքերով:

Ազգաբնակիչութեան ահագին մեծամասնութիւնը ($\frac{3}{4}$ -ից աւելին) ըղզարներ են: Կան նաև բաւական թւով տաճիկներ (500 հազ.) իսկ փոքր թւով՝ ուղմիներ, յոյներ, գընչուներ, հրէաներ և հայեր:



Նկ. 16. Վարդափաղ Տունժայի գետափում:

Փողովըղի մեծ մասը պարապում է երկրագործութեամբ: Հիւսիսային Բողաբրիայում ցանում են՝ ցորեն և եգիպտացորեն: Արևելեան Ռումելիայում բացի դրանցից ցանում են նաև բրինձ և բամբակ: Հիւսիսում մշակում են սալորի ծառ, իսկ հարաւում, Տունժա և Մարիցա գետերի հովիտներում, շատ է

տարածւած վարդի մշակութիւնը, վարդից պատրաստում են թանգարժէք «վարդի իւղ»:

Բացի գիւղական տնտեսութիւնից՝ Բոլզարիայում հնուց սկսած զարգացած է տնայնագործութիւնը (տնային մանր արդիւնագործութիւնը, արհեստները): Տներում պատրաստում են՝ կտաւ, մահուդ, մորթ գորգ, որոնք յայտնի են ամեն տեղ Բալկանեան թերակղզում:

Բոլզարները բարեկեցիկ կեանք ունեն. գիւղացիների մեծ մասը սեփական հող ունի և նրա մշակութիւնից բաւական չափով եկամուտ է ստանում:

Ժողովրդական կրթութեան կողմից Բոլզարիան մեծ առաջադիմութիւն է ցոյց տւել, համեմատած բալկանեան միւս պետութիւնների հետ, թէպէտ ամենից ուշ է ազատւել տաճկական լծի տակից (1878 թ.): Բոլզարները շատ թւով դպրոցներ ունեն: Տարրական կրթութիւնը ձրի է և պարտադիր՝ ամենքի համար. բայց որովհետև դպրոցները շատ վաղուց չէ որ հիմնւել են, ուստի և անգրագէտ մարդիկ բոլզարների մէջ դեռ ևս շատ կան:

Բոլզարիան սահմանադրական թագաւորութիւն է. թագաւորի իշխանութիւնը սահմանափակւած է ժողովրդական ներկայացուցչութեամբ, պարլամենտով, որ բոլզարները «Ազգային ժողով» են կոչում:

Բոլզարիայի մայրաքաղաքն է՝ Սոֆիա. սա գտնւում է երկրի արեւմտեան մասում, Բալկաններից հարաւ՝ մի լեռնագոգի մէջ: Սոֆիան երկաթուղով միացած է կոստանդնուպոլսի ու Եւրոպական ուրիշ կենտրոնների հետ: Սոֆիայում կայ համալսարան: Մնացած քաղաքներից նշանաւոր են. Ֆիլիպպոպոլ՝ Մարիցա գետի վրայ: Սա Արևելեան Ռումելիայի գլխաւոր քաղաքն է և առևտրական կենտրոնը: Ռուջչուկ—նաւահանգիստ է Դանուբի վրայ. Վառնա և Բուրգաս—նաւահանգիստներ են Սև ծովի վրայ:

Ս Ե Ր Բ Ի Ա

Սերբիան լեռնոտ երկիր է: Միայն հիւսիսային մասում, Դանուբի և նրա վտակ Սաւայի ափերին, տարածւում են բլրաշատ հարթութիւններ:

Հիախալային հարթութիւնը Սերբիայի շտեմարանն է: Այդ ամբողջ հարթութիւնը մշակւած է: Այդտեղ ամենուրեք տարածւում են ցորենի և եգիպտացորենի արտեր, խաղողի և այլ պտղատու ծառերի այգիներ: Այդ այգիներում մշակում են մանաւանդ սալորենի, որ շատ առատ բերք է տալիս Սերբիայում:

Որքան աւելի դէպի հարաւ ենք դնում, այնքան աւելի էլ Սերբիական հարթութիւնը բլրաշատ է դառնում, իսկ աւելի ևս հարաւ արդէն տարածւում են լեռներ: Այդ մասում արտերի և այգիների փոխարէն տարածւում են կաղնու խիտ անտառներ և լեռնային կանաչ արօտատեղիներ: Այդ արօտատեղիներում արածում են ոչխարի և այծի հօտեր ու խոզի երամակներ: Անասնապահութիւնը սերբերի գլխաւոր զբաղմունքն է. պահում են շատ խոզ:

Սերբիայի լեռները հարուստ են մետաղներով. չնայած դրան, հանքագործութիւնը և արդիւնագործութիւնը զարգացած չեն այդ երկրում:

Սերբերն ևս բողբոջների նման քարեկեցիկ կեանք են անց կացնում: Նրանք մեծ քանակութեամբ հացահատիկ և անասուն (մանաւանդ խոզ) են արտահանում, գլխաւորապէս դէպի Աւստրո-Ունգարիա:

Ժողովրդական կրթութեան կողմից սակայն, սերբերը յետ են մնացել բողբոջներից, անգրագէտների թիւը նրանց մէջ շատ է:

Կառավարութեան ձեռն նայելով՝ Սերբիան սահմանադրական միապետութիւն է. թագաւորի իշխանութիւնը սահմանափակւած է պարլամենտով («սկուպշչինա»):

Սերբերը 15-րդ դարի կեսից ընկան թիւրքական լծի տակ. նրանք անընդհատ կռիւներ մղեցին իրենց ազատութեան համար, որ և ձեռք բերին 1815 թւականին:

Ազգաբնակչութեան մեծ մասը ապրում է այգեշատ գիւղերում: Քաղաքներ շատ քիչ կան Սերբիայում: Սերբիայի ամենամեծ (70 հազար բնակիչ) և ամենանշանաւոր քաղաքն է՝ պետութեան մայրաքաղաք Բելգրադը: Բելգրադի դիրքը գեղեցիկ է. գտնւում է Դանուբ գետի բարձրագիւր ափին, —

այնտեղ ուր Սաւա վտակը թափւում է Դանուբ գետը: Բել-գրադով է անցնում Վեննա քաղաքից դէպի Սոֆիա և Կոստանդնուպոլիս տանող երկաթուղային գիծը:

Բելգրադում կայ համալսարան:



Նկ. 17. Բելգրադ:

Սերբիայի միւս նշանաւոր քաղաքն է՝ Նիշ, որ գտնւում Մորաւա գետի և յիշած երկաթուղային գծի վրայ: Այդտեղից երկաթուղու մի ճիւղ է գցած մինչև Սալոնիկ քաղաքը (Եւրոպ. Թիւրքիայում):

Չ Ե Ր Ն Յ Փ Ո Ր Ի Ա

Չերնօգորիան բռնում է Դինարեան Ալպերի հարաւային մասը: Այդ լեռները Չերնօգորիայում հասնում են մինչև $2\frac{1}{2}$ վերստ բարձրութեան: Չերնօգորիան Բալկանեան թերակղզու ամենաանմատչելի, վայրի և ոչ-բերրի մասերից մէկն է: Ամբողջ երկիրը լեռնոտ է. համարեա բոլոր լեռներն էլ կրաքարերից են բաղկացած և զուրկ են բուսականութիւնից: Չերնօգորիայի միայն արևելեան կողմում գտնւում են կաւային թերթաքարերից բաղկացած լեռներ, որոնք ծածկւած են կաղնու և աճարի անտառներով:

Չերնօգորիայի բնակիչները՝ չերնօգորցիները՝ բարձրահասակ, ամրակազմ ժողովուրդ են, խօսում են սերբերէն: Նրանք շատ խեղճ կեանք են անց կացնում, որովհետև երկիրը աղքատ է: Զբաղւում են անասնապահութեամբ:

Երկրագործութեամբ պարապել կարելի է միայն լեռնագոգերում և գետակների հովիտներում: Արևելեան մասում, որտեղ հողը մի փոքր բերրի է, չերնօգորցիները պահում են եղներ և ձիեր, որոնց օգնութեամբ մշակում են հողը: Այնտեղ, բացի գրանից, մըշակում են պողատու ծառերի այգիներ: Արհեստներով չերնօգորցիները համարեա բոլորովին չեն պարապում:

Կառավարութեան ձևին նայելով՝ Չերնօգորիան մինչև 1910 թւականի օգոստոս ամիսը իշխանութիւն էր. իսկ այդ ժամանակահատից սկսած Չերնօգորիայի պետը թագաւոր տիտղոսն է կրում:

Չերնօգորցիները ազատասէր և պատերազմասէր ժողովուրդ են: Դարերի ընթացքում այս փոքրիկ ժողովուրդը (230 հազ.) ալբանացիների, իտալացիների և մանաւանդ թիւրքերի յարձակումներից քաջաբար պաշտպանել է իր հայրենիքը, որ բնութիւնից կարծէք մի անառիկ բերդ լինի: Չերնօգորցիները ապրում են ցրւած, իրարից հեռու գտնուող գիւղերում. քաղաքներ չկան այնտեղ: Նոյն իսկ պետութեան կենտրոնը և մայրաքաղաքը Յետինիէ—ընդամենը 3 հազար բնակիչ ունի:

Չերնօգորիային է պատկանում նաև Ադրիատիկ ծովի ափի մի նեղ շերտը՝ Անտիվարի նաւահանգստով:



Նկ. 18. Չերնօգորցիներ:

Յ Ո Ւ Ն Ա Ս Տ Ա Ն

Յունաստանը բռնում է Բալկանեան թերակղզու հարաւային մասը, Մորէա թերակղզին ու Էւրէա, Կիլիկագեան և Յոնիական կղզիները:

Յունաստանի քնութիւնը բաւական աղքատ է: Հիւսիսային ծայրից մինչև հարաւային ծայրը տարածւում է Դինարեան լեռների շարունակութիւնը կազմող Պինդոս լեռնաշղթան, որ կրաքարերից է բաղկացած և բերրի չէ:

Արգամանդ վայրեր Յունաստանում քիչ կան. զրանք գտնւում են կաթսայանման լեռնագոգերում, օրինակ Թեսալիայում. արգամանդ են նաև ծովափերը, որտեղ լեռները չեն հասնում մինչև ծով:

Ծովափերը Յունաստանի ամենալաւ մասերն են:

Այդ վայրերի կլիման մեղմ և յարմար է պտղատու նուրբ ծառեր աճեցնելու համար, այդտեղ մօտ է նաև ծովը. իսկ վերջինս ծառայում է իբրև հաղորդակցութեան գլխաւոր միջոց Յունաստանի համար:

Այս է պատճառը, որ յոյները ապրում են գլխաւորապէս ծովափերին: Նրանց գլխաւոր զբաղմունքն է այգեգործութիւնը:

Ամենից աւելի մշակում են նրանք ձիթենի և խաղողի որթ, ապա նաև թղենի, նոնենի, նարնջենի և այլն: Ձիթենու այգիները նրանք վարում են և ծառերի տակ ցանում են հացահատիկներ, կամ բանջարանոցներ են պոյում:

Նրկրագործութեան համար քիչ տեղ կայ Յունաստանում:

Այդ զբաղմունքը ծաղկած է միայն Թեսալիայում. այդտեղ յոյները ցանում են՝ ցորեն, ծխախոտ և եգիպտացորեն: Սակայն յոյներին չեն բաւականացնում իրենց երկրից ստացւող հացահատիկները, ուստի և նրանք հացահատիկի մի մասը գնում են օտարներից:

Յոյների համար ահագին նշանակութիւն ունի ծովը. Այդտեղ նրանք որսում են ձուկ և ձեռք են բերում սպունգ: Սակայն ծովի գլխաւոր նշանակութիւնը կղզիներում և ծովափերում ապրող յոյների համար այն է, որ նրանք ծովով հաղորդակցութիւն են պահպանում իրար հետ: Հին ժամանակներում արդէն յոյները յայտնի ծովագնացներ էին:

Ներկայումս էլ յոյները շատ շոգենաւեր և, մանաւանդ,

մեծ թւով առագաստանաւեր ունեն, որոնցով նրանք երթևեկում են ամբողջ Միջերկրական ծովի վրայ և առեստրով զբաղւում: Առևտրի մէջ յոյները բնածին ընդունակութիւններ ունեն:

Յոյները առանձնապէս մեծ ծառայութիւն են մատուցել ժողովրդական կրթութեան ասպարիզում: Յունաստանում են սկիզբ առել համարեա եւրոպական բոլոր գիտութիւնները (որոնց թւում և աշխարհագրութիւնը): Յունաստանն է եղել նաև գեղարեստների որրանը: Ներկայումս էլ ժողովրդական կրթութիւնը Յունաստանում աւելի է տարածւած, քան բալկանեան միւս ժողովուրդների մէջ:

Գիտութիւնները և գեղարեստները պատմութեան հին շրջանում իրենց զարգացման գագաթնակէտին հասան յոյն ժողովրդի մէջ: Յունական կրթութիւնը յետոյ Հռոմի վրայով անցաւ Արևմտեան Եւրոպայի ազգերին, իսկ Բիզանդիոնի (Կ. Պոլիս) վրայով՝ արևելեան ազգերին, որոնց թւում նաև մեզ, հայերիս: Հայոց գրերի գիւտը, մեր գրականութեան և գպրոցների ծաղկումը 5-րդ դարում (Թարգմանչացօրով) գլխաւորապէս յունական կրթութեան արդիւնք էին:

Հին Յունաստանում բարձրագոյն ծաղկման հասաւ մանաւանդ քանդակագործութիւնը, որի համար իբրև լաւ նիւթ ծառայում էր Յունաստանի զանազան վայրերից ձեռք բերւող ընտիր մարմարը: Հին յոյների կառուցած մարմարեայ տաճարները և արձանները մինչև օրս էլ համարւում են սքանչելի գործեր և ընդօրինակելու արժանի:

Յեսապայում, երբ տեղի ունեցան բազմաթիւ աւերիչ պատերազմներ, երբ յոյները տաճիկների իշխանութեան տակ ընկան, յունական կրթութիւնն էլ ընկաւ. բազմաթիւ տաճարներ և արձաններ կործանւեցին և ոչնչացան. սրանց մի մասն էլ կողոպտւեց և այժմ պահւում է եւրոպական թանգարաններում (գլխաւորապէս Լոնդոնում):

Մօտ 80 տարի մեզնից առաջ (1829 թ.) յոյները թօթափեցին թիւրքական լուծը և ձեռք բերին անկախութիւն:

Յունաստանը սահմանադրական թագաւորութիւն է: Թագաւորի իշխանութիւնը սահմանափակւած է պարլամենտով: Երկրի մայրաքաղաքն է՝ Աթէնք (140 հազար բն.): Աթէնքը շատ հին քաղաք է: Այգտեղ, մի բարձր բլրի վրայ, պահպանւել են քաղաքի Ակրօպոլ կոչւող հինաւուրց ամրոցի աւերակները՝ հեթանոսական ժամանակից մնացած մարմարեայ տաճարների բեկորներով:

Աթէնքի նաւահանգիստն է՝ Պիրէյ, — Էգէեան ծոցի վրայ: Պիրէյը կարևոր նշանակութիւն ունի իբրև կայան՝ Միջերկրանից դէպի Սև Ծով գնացող նաւերի համար: Միւս նշանաւոր նաւահանգիստներն են՝ Պատրաս (Պատրասի ծոցի վրայ) և Կորֆու (Կորֆու կղզու վրայ): Այս երկու նաւահանգիստներն էլ գտնոււմ են արգաւանդ ծովափերի վրայ, խաղողի այգիների և ձիթենու պուրակների մէջ: Այդ նաւահանգիստներով են արտահանոււմ ձիթենու իւղ և չամիչ: Այդ նաւահանգիստներից մինչև Պիրէյ ճանապարհը կարճացնելու նպատակով յոյները Կորնթոսի ճանապարհի վրայ փորել են ջրանցք:



Նկ. 19. Աթէնի ակրօպօլը:

ԿրեՏէ Կղզին իր բնութեամբ նման է Յունաստանի հարաւային մասին՝ Մօրէա թերակղզուն: Կրետէի վրայ շարունակոււմ են Յունաստանի յոյն անպտուղ լեռները: Արգաւանդ են կղզու միայն ծովափնեայ մասերը, մանաւանդ հիւսիսային կողմոււմ: Ազգաբնակիւթեան ամենամեծ մասը յոյներ են: Կառավարութեան ձևին նայելով՝ Կրետէն մի ինքնավար երկիր է, որ գտնոււմ է թիւրքաց սուլթանի գերիշխանութեան տակ: Կղզու յոյն բնակիչները ձգտոււմ են վերջնականապէս և բոլորովին ազատել թիւրքական գերիշխանութիւնից և իրենց հայրենիքը միացնել Յունաստանին:

Ռուսիներին¹⁾ բռնում է Կարպատեան լեռների հարաւարեւելեան լանջերը և Ստորին-Դանուբեան հարթութիւնը: Ռուսիներին բաղկացած է երեք մասերից. 1. Վալախիա, որ տարածւում է Ստորին-Դանուբեան հարթութեան վրայ, 2. Մոլդաւիա, որ բռնում է Կարպատների և Դանուբի միջև ընկնող տարածութիւնը (Ռուսական հարթութեան ծայրը), և 3. Դոբրուջի, որ բռնում է Դանուբի և Սև ծովի միջև ընկնող տարածութիւնը:

Ռուսիների մեծ մասը հարթ է, որ սևահողով է ծածկւած և շատ արգաւանդ է: Կարպատների լանջերին աճում են անտառներ: Այդ լեռների փէշերը հարուստ են աղով և նաւթով, Դանուբ գետը՝ ձկներով:

Ազգաբնակչութեան ամենամեծ մասը (⁹/₁₀) ռումիներ են: Ռումիները զբաղւում են գլխաւորապէս գիղական անտեսութեամբ. ցանում են ցորեն և եգիպտացորեն, պահում են եզներ՝ հող մշակելու համար, նաև ոչխար և խոզ: Շատերը պարապում են այգեգործութեամբ: Մշակում են խաղողի որթ և սալորենի:

Կարպատեան լեռների փէշերը հարուստ են անտառներով, որոնցից փայտ են կտրում և վաճառում. նոյն լեռներում կան



Նկ. 20. Ռումին:

¹⁾ Ռումիներին ևս շատերը Բալկանեան պետութիւնների շարքումն են դասում:

նաև աղահանքեր ու նաւթահանքեր: Դանուբ գետից բռնում են ձուկ և լաւ ձկնկիրթ են պատրաստում:

Սակայն, բացի երկրագործութիւնից և այգեգործութիւնից՝ մնացած զբաղմունքները չեն զարգացած Ռումինիայում: Ռումինները մեծ մասով զիւղացիներ են, ապրում են աղքատ: Հողի մեծ մասը պատկանում է խոշոր կալւածատէրերին, իսկ գիւղացիները շատ քիչ հող ունեն, ուստի և հողը կապալով են վերցնում կալւածատէրերից: Բացի դրանից՝ գիւղացիները վատ են մշակում հողը, երբ երաշտ է լինում՝ գիւղացիները միանգամայն զուրկ են մնում: Նրանք ուտում են գլխաւորապէս բուսեղէն կերակուրներ, որոնցից ամենատարածւածն է «մամալիգա» կոչւած կերակուրը (եգիպտացորենից պատրաստւած ջրալի կերակուր): Յորենը արտահանում են ուրիշ երկիրներ ծախելու:

Ժողովրդական կրթութիւնը Ռումինիայում շատ ցածր է. ժողովրդի $\frac{3}{4}$ մասից աւելին անգրագէտ է:

Ռումինիան սահմանադրական թագաւորութիւն է: Պետութեան մայրաքաղաքն է՝ Բուքարեստ (300 հազար բնակիչ)—Վալախիայի կենտրոնում. ունի համալսարան: Նշանաւոր առևտրական քաղաքներն են՝ Բրաիլով և Գալաց—Դանուբի վրայ: Մինչև այս նաւահանգիստները գալիս հասնում են ծովային նաւեր, որոնք Արևմտեան Եւրոպայից Ռումինիա են ներմուծում՝ ձոթեղէն, մեքենաներ և գործարանային ուրիշ ապրանքներ. իսկ այդտեղից արտահանում են՝ ցորեն: Բաւական նշանաւոր է նաև Ռուսաստանի սահմանակից Շասսի քաղաքը, Մոլդաւիայի առևտրական կենտրոնը:

ԵՒՍՏՐՕ-ՈՒՆԳԱՐԻԱ

ԸՆԴՀԱՆՈՒՐ ՆԿԱՐԱԳՐՈՒԹԻՒՆ:—Եւրոպական պետութիւններից ոչ մէկը իր ընտեան քազմազանութեամբ չէ կարող համեմատւել Աւստրո-Ունգարիայի հետ: Այդ երկրում գտնւում են թէ երկայնածիք լեռնաշարքեր, (Աւստրիական Ալպեր,

Դինարեան լեռներ, Կարպատներ), թէ՛ ընդարձակ դաշտավայր (Միջին-Դանուբեան), թէ՛ Ռուսական հարթութեան բարձրադիր ծայրը, և թէ՛ ընդարձակ լեռնաշխարհ (Բոհեմիա):

Աւստրիական կամ Արևելեան Ալպերը բազկացած են լեռնաշղթաների բազմաթիւ շարքերից, որոնք ձգւում են արևմուտքից արևելք և բաժանւում են իրարից խոր ու երկայնաձիգ հովիտներով այդ հովիտներով հոսում են՝ Ինն, Դրաւա, Մուր և ուրիշ գետեր:

Երկայնաձիգ հովիտներով Աւստրիական Ալպերը բաժանւում են երեք շարքի— Հիւսիսային, Կենտրոնական և Հարաւային Ալպեր: Հիւսիսային, և Հարաւային Ալպերը բազկացած են կրաքարերից, իսկ Կենտրոնական Ալպերը՝ բիւրեղացած լեռնային տեսակներից:

Ամենից աւելի բարձր են՝ Կենտրոնական Ալպերը: Սրանց գագաթները, օրինակ՝ Օրտլեր, Մեծ Գլոկներ, համարեա 4 վերստ բարձրութիւն ունեն:

Այդ գագաթները ծածկւած են յաւերժական ձեան զանգւածով. հովիտներով ցած են սահում սառցադաշտեր, որոնցից ջրառատ գետակներ են սկիզբ առնում: Բարձր սարալանջերին տարածւում են հիւթեղ, կանաչ խոտով ծածկւած մարգագետիններ. իսկ նրանցից ցածր աճում են փշատերև ծառերի մթին անտառներ:

Հիւս. եւ Հարաւ. Ալպերը (որոնք կրաքարերից են բազկացած) թէպէտ իրենց բարձրութեամբ յետ են մնում Կենտրոնական Ալպերից (որոնք բիւրեղացած լեռնային տեսակներից են բազկացած), բայց աւելի բազմազան ձևի գագաթներ ունեն. դրանց լանջերը աւելի սեպ, ուղղաձիգ են, հովիտները՝ աւելի խոր. սակայն այդտեղի բուսականութիւնը աւելի աղքատ է (ինչո՞ւ):

Դինարեան լեռները շարունակութիւն են կազմում Հարաւային կրաքարային Ալպերի: Սկզբի մասում նրանք բարձրաւանդակի տեսք ունեն. այդ բարձրաւանդակը կոչւում է Կարստ: Սա կրաքարային կազմութիւն ունի. մակերևոյթը ծածկւած է լերկ ապառաժներով, կամ խղճուկ մացառներով: Գետնի տակ կան կրաքարային բազմաթիւ այրեր, որոնցով հոսում են ստորերկրեայ գետեր: Այդտեղ է գտնւում երկրագնդի ամենաերկայն քարայրերից մէկը—Ալբլաբերգի քարայրը:

Դինարեան լեռներից դէպի արևելք տարածւում են Բոսնիական հանքային լեռները: Սրանք նման են հարեան Սերբիայի լեռներին և ծածկւած են կաղնու անտառներով:

Կարպատները Ալպերի շարունակութիւնն են կազմում: Նրանք աղեղնաձև ձգւած են դէպի հիւսիս-արևելք՝ 1200 վերստ երկայնութեան վրայ. սկսւում են Վեննայի կաթսայանման գոգաւորութիւնից և տարածւում են մինչև «Երկաթի Դարպասը», որտեղ Դանուբ գետը այդ լեռները բաժանում է Բալկաններից: Այդ ամբողջ տարածութեան վրայ Կարպատները բաղկացած են մի շարք լեռնաշղթաներից:

Բալկանների նման՝ Կարպատները անտառապատ լեռներ են: Ամենուրեք նրանց ստորոտներում և հովիտներում կան աճարի և կաղնու խիտ անտառներ, իսկ բարձունքների վրայ տարածւում են մարգագետիններ, որոնք սակայն Ալպեան արօտների պէս թարմ և հիւթաշատ չեն: Պատճառն այն է, որ Կարպատների վրայ աւելի քիչ մթնոլորտային տեղումներ են թափւում, քան Ալպերի վրայ:

Ռուսական հարթութեան այն մասը, որ տարածւում է Կարպատների մօտ, ներկայացնում է մի քարձրաւանդակ. սա ծածկւած է սևահողով և կտրւած է գետահովիտներով:

Միջին-Դանուբեան կամ Ունգարական դաշտավայրը գտնւում է՝ մի կողմից Ալպերի և Դինարեան լեռների, իսկ միւս կողմից Կարպատեան լեռների մէջ: Այդ դաշտավայրը արգաւանդ է, ծածկւած սևահողով: Նրա ծայրում, լեռների մօտ, աճում են անտառներ. իսկ կենտրոնում, որտեղ կլիման չոր է, գտնւում է Ունգարական տափաստանը: Ունգարական տափաստանով հոսում են՝ Դանուբ գետը և նրա վտակները—Տիսսա, Դրաւա, Սաւա:

Բոհեմիայի լեռնաշխարհը քառանկիւնի ձև ունի, բարձրագիւր ծայրերով. դրանք են—Բոհեմական անտառ¹⁾, Սաքսոնական հանքային լեռներ և Սուդետներ: Բոհեմական լեռնաշխարհի վրայ չկան ոչ լեռնաշղթաներ, ոչ փոքրիշատէ բարձր գագաթներ. դա ընդարձակ, ալիքանման քարձրաւանդակ

¹⁾ «Անտառ», այսպիսի դէպքերում նշանակում է սար. այդպէս են կոչւում այն սարերը, որոնք ամբողջապէս անտառապատ են:

է. կարտուած է — Էլբա, Մոլդաւա և Էգեր գետերի խոր հովիտներով:

Բոհեմական լեռնաշխարհի ծայրերը միայն շղթայածե են, կլոր գագաթներով և թեք լանջերով. այդտեղ տարածուած են փշատերև ծառերի անտառներ, նաև մարգագետիններ:

Աւստրո-Ունգարիայի բազմազան մասերը անջատուած չեն իրարից: Գանուբի և նրա վտակների շնորհիւ գժւար չէ հաղորդակցութիւն պահպանել նրանց մէջ: Ունգարական դաշտավայրից գետահովիտներով հեշտ է երթալ թէ դէպի Ալպերը և թէ դէպի Դինարեան լեռները, թէ դէպի Բոհեմական լեռնաշխարհը և թէ դէպի Կարպատները: Դժւար չէ նաև՝ Կարպատների վերայով իջնել Ռուսական հարթութեան ծայրը: Միայն Ադրիատիկի ծովափը կարծէք կտրուած լինի մնացած մասերից՝ ծովափնեայ գժւարանցանելի լեռներով:


Աւստրո-Ունգարիայի ընտանի հարստութիւնները մեծ են: Նրա հարթութիւնները բերրի են, լեռները (բացառութեամբ կրաքարերից բաղկացածների) ծածկուած են մարգագետիններով և անտառներով. երկրի խորքում մեծ քանակութեամբ հանքեր կան:

Աւստրո-Ունգարիայի ընտանի թիւն է մօտ 50 միլիոն. գլխաւոր ժողովուրդներն են՝ սլաւոնական ազգեր, գերմանացիներ և մաջարներ (ունգարացիներ): Սլաւոնական ազգերը կազմում են ամբողջ ազգաբնակչութեան մօտ $\frac{1}{2}$ -ը, գերմանացիները՝ $\frac{1}{4}$ մասը, մաջարները՝ $\frac{1}{5}$ մասը:

Սլաւոնական ազգերը բաժանուած են երկու խմբի. մի մասը ապրում է հիւսիսում (չեխեր, սլովակներ, լեհեր և ռուսիներ), իսկ միւս մասը՝ հարաւում (սլովեններ, սերբեր և կրօտաներ կամ խրւաթներ):

Աւստրո-Ունգարիայում ապրում են նաև բաւական շատ իտալացիներ (Իտալիայի սահմանի մօտերը և Ադրիատիկի ծովափին), ռումիներ (Ռումիլիայի սահմանի մօտ), հրէաներ (Ռուսաստանի սահմանի մօտ, ռուսիների և լեհերի մէջ), գնչուներ (ցիգան). սրանք թափառում են գլխաւորապէս Ունգարական դաշտավայրում: Գալիցիայում (Աւստրիական Լեհաստա-

նում) և Ունգարիայում ապրում են նաև այնտեղ գաղթած հայերի յետնորդները, սրանք համարեա կորցրել են իրենց լեզուն, ձուլւելով լեհերի հետ. մի մասը պահել է լուսաւորչական դաւանութիւնը:



Նկ. 21. Աւստրօ-Ունգարիայի ժողովուրդների ստրածոււր:

Դաւանութեան նայելով՝ Աւստրօ-Ունգարիայի բոլոր բնակիչների $\frac{3}{4}$ մասը կաթոլիկ է. սերբերը *) և ուղմինները ուղղափառ (պաշտօնաւ) դաւանութեան են հետևում:

ԱՒՍՏՐՕ-ՈՒՆԳԱՐԻԱՅԻ ԺՈՂՈՎՈՒՐԴՆԵՐԻ ԶԲԱՂՄՈՒՆԻՆԵՐԸ ԵՒ ԿԵԱՆՔԸ:—Աւստրօ-Ունգարիայի բնակիչների գլխաւոր զբաղմունքն է գիտական տնտեսութիւնը, որ սակայն տարբեր եղանակով է զարգացած պետութեան զանազան մասերում:

Արեւելեան Ալպերը, յատկապէս նրանց կենտրոնական մասը, հարուստ են անտառներով և արօտատեղիներով: Այս պատ-

*) Սերբերը և խրաթները միևնոյն ազգութիւնն են կազմում, խօսում են մէկ՝ սերբերէն լեզով: Իրարից նրանք տարբերում են նրանով, որ սերբերը ուղղափառ են, իսկ խրաթները՝ կաթոլիկ:

ճառով էլ այնտեղի բնակիչները՝ գերմանացիները և սլովենները՝ զբաղւում են գլխաւորապէս անասնաբուծութեամբ և անտառազործութեամբ:

Այնտեղ ապրող ամեն մի գիւղացի ունի սեփական կովեր, ոչխարներ և այծեր: Գարնանը ալպեան հովիւները դէպի լեռնային բարձրադիր մարգագետիններն են քշում հօտը եւ արածացնում այնտեղ մինչև աշուն. նրանք ամբողջ ամառւայ ընթացքում ապրում են լեռնային հիւղերում (խրճիթներում) և պատրաստում են իւղ ու պանիր: Այդ միջոցին հովիտներում տանը մնացած գիւղացիները խոտ են հընձում և ձմեռւայ համար պատրաստութիւն տեսնում: Ցանում են հացահատիկներ, թէև փոքր չափով, որովհետև հովիտները մեծ մասով նեղ են, և նրանց կողերը շատ ուղղաձիգ են. ուստի նրանք անյարմար են մշակութեան համար:

Ապա՝ ալպեան գիւղացիները փայտ են կտրում անտառներում, սղոցում են կտրած գերանները՝ լեռնային գետակների ոյժով գործող սղոցարաններում, կամ գերանները լաստեր կապած գետերի վրայով բերում են անտառազուրկ վայրեր,—գլխաւորապէս դէպի արևելք, Ունգարական դաշտավայրը, կամ դէպի հարաւ,—Իտալիա:

Իինսրեան լեռները ծածկւած են խղճուկ արօտատեղիներով, համարեա զուրկ են անտառներից: Այս լեռների շրջանում ապրող ժողովուրդները—սերրերը և խրաթները—ունեն նոյն կենցաղավարութիւնը, ինչ որ նրանց ցեղակից չերնօզորցիները. նրանց գլխաւոր զբաղմունքն է՝ ոչխար և այծ պահելը. դրանով էլ նրանք գլխաւորապէս իրենց խղճուկ ապրուստն են հայթայթում:

Սանձւած, այրւած դէմքերով, հագած իրենց իսկ պատրաստած բրդէ ոչ նուրբ, բայց ճաշակաւոր զգեստները, նրանք ժամանակի մեծ մասը անց են կացնում լեռներում, իրենց անասունների հետ միասին:

Երկրագործութեամբ պարտապում են միայն «արտեր» կոչւող լեռնագոգերում. այդտեղ նրանք ցանում են ցորեն և եգիպտացորեն:

Աղրիատիկի ծովափին սերբերը և խրաթները, նաև իտալացիները, մշակում են խաղողի որթ և ձիթենի, արտադրում են գինի և ձիթենու իւղ: Բոսնիական հանքային լեռներում և Սաւայի, Դրինայի ու Բոսնայի արգաւանդ հովիտների մէջ ընկած դաշտերում ցանում են եգիպտացորեն և ցորեն. այգիներում մշակում են սալորենի, որ այդտեղ այնչափ

առատութեամբ է բերք տալիս, որչափ հարեան Սերբիայում: Բազմացնում են խոշոր եղջիւրաւոր կենդանիներ և խոզեր. սրանց կերակրում են լեռները ծածկող կաղնու անտառների մեծաքանակ խոզակաղնով:

Կարպատները հարուստ են անտառներով. այդ պատճառով էլ այնտեղ ապրող սլաւոնները և ռումինները զբաղւում են անտառագործութեամբ:

Աշնանը և ձմեռը նրանք փայտ են կտրում և ամառը գետերով փոխադրում դէպի մերձակայ անտառազուրկ հարթութիւնները: Այն լեռնալանջերը, որտեղ անտառները կտրտած վերջացրած են, նրանք վարում են և ցանում վտրսակ ու հաճար: Այդտեղ զբաղւում են անասնաբուծութեամբ. բայց այս զբաղմունքը Կարպատներում չէ կարող ունենալ այն նշանակութիւնը, ինչ Ալպերում (ինչո՞ւ):

Ունգարական դաշտավայրը շատ արգաւանդ է. այդ պատճառով էլ այդտեղ ապրող մաջառները զբաղւում են գլխաւորապէս երկրագործութեամբ:

Դեռ ոչ շատ առաջ Ունգարական տափաստանը ամայի էր, բոլորովին անմշակ. այնտեղ մաջառները արածացնում էին իրենց բազմաթիւ ձիերի ջոկերը, եզների նախիրները և ոչխարների հօտերը. իրենք մաջառներն էլ անց էին կացնում կիսա-թափառաշրջիկ կեանք: Իսկ ներկայումս այդ տափաստանը համարեա ամբողջապէս վարած է. այդտեղ ապրում է խիտ ազգաբնակչութիւն. Ունգարական տափաստանում այժմ տարածւում են ցորենի և եգիպտացորենի արտեր, ծխախոտի տնկարաններ և խաղողի այգիներ: Այդտեղ ամենուրեք զցած են խրճուղիներ և երկաթուղիներ. ամեն տեղ կան իրարից հեռու գտնուող շէնքեր, կան նաև մեծ գիւղեր: Չվարած դաշտեր քիչ կան Ունգարական դաշտավայրում—գլխաւորապէս գիւղերի շրջակայքում. այդտեղ արածում են կալածատէր—մաջառներին պատկանող անասունները:

Ռուսական հարթութեան ծայրում ապրող լեհերը և ռուսինները ևս զբաղւում են, ինչպէս մաջառները, գլխաւորապէս երկրագործութեամբ: Ցանում են ցորեն և հաճար, բազմացնում են ձիեր և եզներ:

Բոհեմական լեռնաշխարհի ալիքանման հարթութիւնները ծածկւած են աւազոտ հողով: Բայց չնայած դրան՝ այդտեղ ապրող գերմանացիները և չեխերը զբաղւում են երկրագործու-

թեամբ,—նոյն իսկ աւելի յաջող կերպով, քան մաշառները, ուսուիները և լեհերը: Պատճառն այն է, որ գերմանացիները և չեխերը աւելի խնամքով են մշակում հողը, աւելի են պարտացնում, աւելի խորն են վարում և մանրացնում տափանով: Այս պատճառով էլ նրանք հողից աւելի առատ հունձ են ստանում: Համեմատաբար բարձր վայրերում նրանք ցանում են՝ կորեկ, համար, վարսակ և գարի. իսկ աւելի ցածր վայրերում ցանում են՝ ցորեն, շաքարի ճակնդեղ, գայլուկ (խմէլ):

Գիւղական տնտեսութեամբ պարասլում է Աւստրո-Ունգարիայի բոլոր բնակիչներին $\frac{2}{3}$ մասը:

Հացահատիկ ցանած արտերում հետեւեալ տարիները նրանք ցանում են խոտարոյսեր և տակոիներ (կարտոֆիլ և՛ բազուկ, «տակ»): Սրանցով են կերակրում նրանք իրենց անասուններին, որոնց ամենեւին արօտի չեն հանում, որովհետեւ բոլոր դաշտերն էլ ցանած են լինում: Արօտատեղիներ և դուրսը արածող անասուններ պատահում են Բոհեմական լեռնաշխարհի միայն ամենաբարձր, երկրագործութեան համար անյարմար տեղերում և Բոհեմական անտառի ու Սուդետների լանջերում:

Մեծ նշանակութիւն ունի ազգաբնակչութեան համար նաև հանրագործութիւնը, որ զարգացած է գլխաւորապէս Արևելեան Ալպերում, Բոհեմական լեռնաշխարհում և Կարպատներում:

Արևելեան Ալպերում գերմանացիները արդիւնաբերում են մեծ քանակութեամբ բորակ, քարածուխ և երկաթ. մի քանի տեղերում երկաթի հանքերը գտնւում են հէնց լեռների մակերևոյթի վրայ, կազմում են սարալանջեր: Հարաւային Կրաքարային Ալպերում արդիւնաբերում են սնդիկ և կապար. իսկ Հիւսիսային Կրաքարային Ալպերում, որոնք հարուստ են աղի աղբիւրներով, ազաջուրը գոլորշիացնում են և աղ ստանում:

Բոհեմական լեռնաշխարհում արդիւնաբերում է բորակ, — աւելի, քան Ալպերում. նաև քարածուխ և երկաթ: Հարաւային Կարպատները հարուստ են երկաթով և ոսկով: Կարպատների հիւսիս-արևելեան փէշերը, — յատկապէս Գեստրի ակունքների մօտ — հարուստ են նաւթով: Հիւսիսային փէշերում գտնւում են Վեյրիչկայի շատ հարուստ աղահանքերը:

Մշակողական արդիւնագործութիւնը զարգացած է Աւստրո-Ունգարիայի գլխաւորապէս այն մասերում, որտեղ ապրում են գերմանացիներ եւ չեխեր:

Ալպեան գետերի, յատկապէս Մուրի և Էննսի հովիտներում, քարածուխի և երկաթի հանքերի մօտերքում գերմանացիները հիմնել են շատ գործարաններ, այդտեղ պատրաստում են՝ երկաթուղիների համար ուղիներ, վագոններ և շոգեմեքենաներ, այդտեղ պատրաստում են նաև մանր գործիքներ—կացին, մանգաղ, գերանդի, (որ հուշակած է ոչ միայն Աւստրո-Ունգարիայում, այլ նաև Ռուսաստանում): Ալպեան հովիտներում շատ կան նաև մանելու և ոստայնանկութեան (Չուլհակութեան) գործարաններ: Գործարանային արդիւնագործութիւնը աւելի ևս զարգացած է Բոհեմական լեռնաշխարհում: Այդտեղ էլ գերմանացիները և չեխերը մեծ չափերով արտադրում են մետաղէ ապրանքներ և զանազան գործւածքներ: Բացի դրանից՝ մաքուր կաւից նրանք թրծում են ձենապակու ընտիր ամաններ: Սուպետներում ձեռք բերւող մաքուր կւարցից պատրաստում են ապակի և բիւրեղ, բոհեմական բիւրեղը աշխարհահռչակ է: Շաքարի ճակնդեղից պատրաստում են այնչափ շաքար, որ բաւականացնում է Աւստրո-Ունգարիայի բոլոր բնակիչներին: Գարուց և գայլուկից պատրաստում են գարեջուր, որ յայտնի է ամբողջ Եւրոպայում:

Գերմանացիները և չեխերը Աւստրո-Ունգարիայի ամենագործունեայ, ձեռներէց, դրա հետ միասին նաև ամենահարուստ ժողովուրդներն են: Այս առաջնութեան նրանք հասել են շնորհիւ նաև այն բանի, որ նրանց մէջ շատ է զարգացած ժողովրդական կրթութիւնը: Անգրագէտ մարդիկ նրանց մէջ շատ քիչ կան:

Ժողովրդական դպրոցների թիւը մեծ է: Ուսումը նրանց մէջ պարտադիր է ամենքի համար, բոլոր երեխաները առնւազն 6 տարի յաճախում են դպրոց: Բացի դրանից շատերն էլ սովորում են միջնակարգ և բարձրագոյն դպրոցներում: Աւստրո-Ունգարիայի ամենալաւ գիտնականները և գրողները զուրս են գալիս գերմանացիների, չեխերի, մասամբ նաև լեհերի միջից: Իսկ Աւստրո-Ունգարիայի միւս ժողովուրդների մէջ կրթութիւնը առաջ չէ գնացել: Եւրաթիւների, սերբերի

և ռուսինների մէջ անգրագէտների թիւը աւելի է, քան գրագէտների թիւը: Սրա հետ միասին՝ նրանց կեանքը բարեկեցիկ չէ, նրանք խեղճ են ապրում: Չստանալով հողից ապրուստի համար բաւարար միջոցներ՝ նրանք եկամտուտի ուրիշ աղբիւրներ էլ չունեն: Այս պատճառով ամեն գարնան խմբերով ռուսիններ և լեհացի աղքատ գիւղացիներ Գերմանիա են գնում՝ գիւղական աշխատանքներ կատարելու համար. շատ սերբեր և իրւաթներ ընդմիշտ թողնում են իրենց հայրենիքը և Ամերիկա են գաղթում:

Աւստրո-Ունգարիայի ուժեղ ազգութիւնները ճնշում են թոյլերին: Զանազան ազգութիւնների մէջ եղած թշնամութիւնը թուլացնում է Աւստրո-Ունգարիայի ոյժը:

ՊԵՏԱԿԱՆ ԿԱԶՄԸ ԵՒ ՔԱՂԱՔՆԵՐԸ:—Աւստրո-Ունգարիան բաղկացած է իրար հետ միացած երկու պետութիւններից—Աւստրիական կայսրութիւնից և Ունգարական թագաւորութիւնից:

Աւստրիայի երկրամասերն են.—բուն Աւստրիա (Վերին և Ստորին), Բոհեմիա, Մորաւիա, Գալիցիա, Տիրոլ, Շտիրիա, Ծովափնեայ երկրամաս և Դալմաթիա: Աւստրիական երկրամասերը երեք կողմից մանգաղի ձևով շրջապատում են Ունգարական երկրամասերը. սրանք են—բուն Ունգարիա՝ Տրանսիլւանիայի հետ միասին, Խրւաթիա և Սլաւոնիա: Բացի դրանից՝ Աւստրիայի և Ունգարիայի ընդհանուր տիրապետութեան տակ են գտնւում Բոսնիան և Հերցոգովինան, որոնք Թիւրքիային էին պատկանում և վերջին ռուս-տաճկական պատերազմի ժամանակ (1878 թ.) գրաւեցին Աւստրո-Ունգարիայի կողմից:

Աւստրո-Ունգարիայի կառավարութեան գլուխ է կանգնած աւստրիական կայսրը, որը միեւնոյն ժամանակ Ունգարիայի թագաւորն է համարւում: Աւստրիական կայսրութիւնը և Ունգարական թագաւորութիւնը կախում չունեն իրարից: Այս պետութիւններից ամեն մէկը ունի իր պարլամենտը¹⁾ և իր մինիստրների խորհուրդը: Իսկ նրանց զօրքը ընդհանուր է. միասին են վարում նաև իրենց գործերը օտար պետութիւնների հետ:

¹⁾ Աւստրիական պարլամենտը կոչւում է «ռայխտագ»:

Աւստրիական կայսրութեան մայրաքաղաքը և ամբողջ Աւստրո-Ունգարիայի ամենամեծ քաղաքն է՝ Վեննա (մօտ 2 միլիոն բնակիչ)։ Վեննան գտնուում է Դանուբի վրայ, Ալպերի հիւսիս-արևելեան լեռնաշարքի կամ Վեննայի սնտառի ստորոտում, Վեննայի մօտ գալիս միանում են Աւստրո-Ունգարիայի գանազան մասերը—Ալպերը, Կարպատները, Բոհեմական լեռնաշխարհը և Ունգարական հարթութիւնը։ Վեննայում հանդիպում են իրար ամբողջ Եւրոպայի համար կարևոր նշանակութիւն ունեցող հետեւեալ երկաթուղային գծերը.—1) Պետերբուրգից և Մոսկւայից դէպի Հոմ, 2) Պարիզից, Լոնդոնից և Բերլինից դէպի Կոստանդնուպոլիս։ Վեննան ծառայում է իբրև լուսատրութեան կենտրոն ամբողջ Աւստրո-Ունգարիայի համար. նա կենտրոն է նաև արդիւնագործութեան և առեւտրի։ Վեննական մեքենաներ և գործիքներ, վեննական կահ-կարասիներ և արդուզարդի ու մոզայի գանազան առարկաներ այդ քաղաքից արտահանուում են ուրիշ երկիրներ։



Նկ. 22. Վիսաուր փողոց Վեննայում։

Վեննայում է գտնուում Մխիթարեան անունով հայ-կաթոլիկ միաբանութեան մի ճիւղը։ Այդտեղ Մխիթարեանները ունեն վանք, գրադարան, տպարան, դպրոց։ Վեննայի Մխիթա-

քեան միաբանութեան դերը մեծ է հայոց լեզուի և գրականութեան ուսումնասիրութեան մէջ: Այժմ էլ այդ նպատակին է ծառայում Վեննայի Միօթարեանների ձեռքով հրատարակուող «Հանդէս Ամսօրեայ» ամսագիրը:

Պրագա,—գտնուում է էլբայի վտակ Մուլաւայի երկու ավերին: Պրագան Բոհեմիայի գլխաւոր քաղաքը և արդիւնաբերական կենտրոնն է. դա Չեխիայի նախկին մայրաքաղաքն է. ունի աւելի քան 40,000 բնակիչ, երկու համալսարան—չեխական և գերմանական:

Պիլզեն—արդիւնաբերական քաղաք է. ունի գարեջրի մեծ գործարաններ:

Կարլսբադ—բուժավայր (կուրորտ) է Էգերի հովտում. հռչակւած է իր հանքային տաք ջրերով. ամեն ամառ Եւրոպայի բոլոր երկիրներէց տասնեակ հազարաւոր հիւանդներ են գնում Կարլսբադ բժշկելու համար:

Բրիւնն—Մորաւիայի գլխաւոր քաղաքը. այդտեղ կան մահուգի մեծ գործարաններ:

Կրակով—գտնուում է Վիսլայի ձախ ավին: Կրակովը լեհական թագաւորութեան նախկին մայրաքաղաքն է. ունի լեհական համալսարան:

Լվով կամ **Լեմբերգ**—Գալիցիայի գլխաւոր քաղաքը և առևտրական կենտրոնն է:

Կրակով և Լեմբերգ քաղաքներ Լեհաստանի միջնադարեան հայ գաղթականութեան կենտրոններն էին: Այդ գաղթականութիւնը բաղկացած է եղել տասնեակ հազարաւոր հայերից: Այդտեղի հայերը ժամանակի ընթացքում մոռացան իրենց լեզուն, ազգային սովորութիւնները, ընդունեցին կաթոլիկութիւն և ձուլւեցին լեհերի հետ. այժմ այդ քաղաքներում հայկական գաղթականութեան բեկորներն են միայն մնացել:

Իննսբրուկ—Տիրոլի գլխաւոր քաղաքը. այդտեղ են հաւաքուում այն ուղևորները, որոնք Աւստրիական Ալպերն են ուզում բարձրանալ հիւսիսից: Իննսբրուկը գտնուում է Ինն գետի ավին, խոր հովտում և ձիւնապատ լեռների ստորոտում. այդտեղով է անցնում Հարաւային Գերմանիան Իտալիայի հետ միացնող երկաթուղային գիծը:

Գրաց—Շտրիիայի գլխաւոր քաղաքը և արդիւնաբերական կենտրոնը. յայտնի է երկաթի արդիւնաբերութեամբ. գտնուում է Մուր գետի ափին և Վեննայից դէպի Տրիեստ տանող երկաթուղային գծի վրայ:

Տրիեստ—Աւստրիայի ամենանշանաւոր նաւահանգիստն է: Աւելի հարաւ՝ Աւստրիային են պատկանում մի քանի լաւ նաւահանգիստներ. օրինակ Կատտարօ—Դալմաթիայում: Բայց զրանց նշանակութիւնը մեծ չէ, որովհետև հեռու են գտնուում Աւստրիայի գլխաւոր երկրամասերից և նրա մայրաքաղաքից — Վեննայից:

Ունգարական թագաւորութեան մայրաքաղաքն է՝ Բուդապէստ (մօտ 1 միլ. բնակիչներով): Դա բաղկացած է երկու քաղաքներից—Բուդա (Դանուբի աջ, բարձրադիր ափին) և Պեստ (ձախ, ցածրադիր ափին): Բուդա սպիւսում է գտնուում Ունգարիայի պարլամենտը. այդտեղ կայ համալսարան: Բուդապէստը յայտնի է երկրագործական և արդիւնագործական ուրիշ տեսակ մեքենաներ պատրաստող գործարաններով:

Սեգեդին և Մարիա-թերեզիօպոլ քաղաքները յայտնի են հացահատիկի առևտրով:

Մաջառական միւս քաղաքները, որոնց թիւը փոքր չէ Ունգարական դաշտավայրի վրայ, մեծ զիւղերի նման են, թէպէտ նրանցից իւրաքանչիւրը մի քանի տասնեակ հազար բնակիչներ ունի. բայց սրանք զբաղում են գլխաւորապէս գիւղական տնտեսութեամբ. այդ պատճառով էլ տները այդ քաղաքներում փոքր են, շրջապատւած մարզներով, գոմերով, ագարակներով և այգիներով:

Արմենիէրշտատ—որ նշանակում է «Հայաքաղաք» գրտնրւում է Տրանսիլանիայում: Այս քաղաքը հիմնել են միջին դարում հայ գաղթականները, որոնք սակայն ժամանակի ընթացքում ձուլւել են տեղացիների հետ:

Զագրեբ—Սաւայի վրայ. Խրւաթիայի և Սլաւոնիայի գլխաւոր քաղաքն է. ունի խրւաթական համալսարան:

Փիումէ—Ունգարական նաւահանգիստ է՝ Փիումէ ծոցի վրայ: Դեռ ոչ շատ առաջ Փիումէն ձկնորսների գիւղ էր, իսկ այժմ, շնորհիւ այդ նաւահանգիստը Բուդապէստի հետ կապող երկաթուղու, շնորհիւ իր յարմարաւոր նաւակայանի, սա արդէն մրցում է Տրիեստի հետ:

Սարակօ—Բոսնիայի գլխաւոր քաղաքն է. գտնուում է լեոների մէջ, Բոսնա գետի ափունքների մօտ: Այդ քաղաքում եղած բազմաթիւ մզկիթները, մինարէթները և ազմկալի հրապարակները յիշեցնում են այն մերձաւոր անցեալը, երբ այդտեղ իշխում էին թիւրքերը: Այժմ էլ քաղաքի բնակիչների համարեա կէսը կազմում են մահմեդականները. սրանք ամենքը իրենց թիւրք են կոչում, մինչդեռ ծագումով և լեզուով սլաւոններ են:

Չ Է Ե Յ Յ Ա Ր Ի Ա

ԸՆԴՀԱՆՈՒՐ ՆԿԱՐԱԳՐՈՒԹԻՒՆ: —Շւէյցարիան լեռնոտ երկիր է: Նրա հարաւ-արեւելեան կողմում բարձրանում են Ալպերը, որոնք բռնում են Շւէյցարիայի ամբողջ տարածութեան կէսից աւելին: Հիւսիս-արեւմտեան կողմում տարածւում է Իւրա լեռնաշղթան: Ալպերի և Իւրայի մէջ տեղում գտնուում է Շւէյցարական բարձրաւանդակը:

Շւէյցարական Ալպերը կազմում են շարունակութիւն Աւստրիական Ալպերի, որոնց գերազանցում են իրենց բարձրութեամբ, գեղեցիկ դիրքով և վեհութեամբ: Իրենց կազմութեան նայելով՝ Շւէյցարական Ալպերը համարեա բոլորն էլ բիւրեղացած լեռնային տեսակներից են բաղկացած:

Ռոնա գետի և Առաջաւոր Հռենոսի հովիտներով Ալպերը բաժանւում են լեռնային երկու շրջանների—հիւսիսային և հարաւային:

Հարաւային շրջանում ամենից աւելի բարձր են Վալլիսեան կամ Պեննինեան Ալպերը, որոնք տարածւում են Ռոնա գետից հարաւ, Իտալիայի սահմանի մօտ: Նրանք ծածկւած են յաւերժական ձեան զանգւածով: Այդտեղից դէպի ցած շարժւում են սառցադաշտեր: Վալլիսեան Ալպերի ամենաբարձր գագաթն է Մոնտէ-Ռոզա. միւս գագաթն է Մատտերհորն: Սա Ալպեան բոլոր լեռնագագաթների մէջ ամենաանմատչելին է.—պատճառն այն է, որ այդ լեռան լանջերը չափազանց ուղղաձիգ են:

Հիւսիսային շրջանում են գտնուում Բերնեան Ալպերը: Թէպէտ սրանց գագաթները, օրինակ՝ Ինզֆրաուէն աւելի ցածր են քան Մոնտէ-Ռոզան և Մատտերհորնը, բայց իրենց սառցադաշտերով և ձիւնագաշտերով յետ չեն մնում Վալլիսեան Ալպերից:

Մոնտէ-Ռոզա, Մատտերհորն և Իւնզֆրաու լեռնագագաթները բոլորն էլ 4 վերստից աւելի բարձրութիւն ունեն: Իրանք Նւրոպայի ամենաբարձր լեռնագագաթներն են. իրենց բարձրութեամբ յետ են մնում միայն Մոնըլանից ($4\frac{1}{2}$ վ.), որ Ալպեան ամենաբարձր լեռնագագաթն է և գտնուում է աւելի արևմուտք, Ֆրանսիական հողում:

Շւէյցարական միւս լեռնաշղթաների թւում նշանաւոր է Սէն-Գոթթարզը: Սա շատ բարձր չէ (նրա գագաթները հազիւ 3 վերստի են հասնում), ոչ էլ երկար ձգւած, բայց նշանաւոր է իր դիրքով—գտնուում է Շւէյցարական Ալպերի կենտրոնում: Սէն-Գոթթարզի մօտ են սկիզբ առնում մի քանի զետեր, որոնք հոսում են զանազան ուղղութեամբ, գէպի երեք ծովեր: Իրանք են—Հոենոս, նրա վտակ Աար, վերջինիս վտակ Ռօյս, որոնք հոսում են գէպի Գերմանական ծովը. Ռոնա գետը, որ հոսում է գէպի Միջերկրական ծովը. Տիչինօ գետը (Պօ գետի վտակներից է) հոսում է գէպի Ազրիատիկ ծովը:



Նկ. 23. Շիլիսեի դղեակը Փրենեի լճում:

Այս գետերը ջրառատ են (ինչո՞ւ): Շւէյցարիայում նրանք արագ են հոսում, կազմում են ազմկայոյզ ջրվէժներ և սահանքներ: Նաւարկութեան համար այդ գետերը յարմար չեն.

բայց նրանց հովիտները հեշտացնում են հաղորդակցութիւնը լեռների գանազան լանջերի մէջ: Ալպերից դուրս գալով այդ գետերը հոսում են մեծ լճերի միջով. Հոենտսը—Քոդենի լճի միջով, Ռոյսը—Ֆիրվալդ-Շտետեր, Ռոնան—Փըննի լճի միջով, Տիչինոն—Լագո-Մաջիօրէ լճի միջով:

Այսպէս՝ Շւէյցարական Ալպերի բնութիւնը քաղմազան է՝ Մակերևոյթի կազմութեան բազմազանութիւնից է կախած նաև կլիմայի քաղմազանութիւնը:

Ջրնապատ լեռնագագաթների կլիման շատ խիստ է, իսկ խորը հովիտներում և լճերի ափերին՝ այնչափ մեղմ է, որ այնտեղ հասնում են խաղող և շագանակ: Անձրև և ձիւն Ալպերում շատ է գալիս (ինչո՞ւ), թէպէտ ոչ ամեն տեղ. օրինակ՝ Ռոնայի վերին հոսանքի հովտում, որ ամեն կողմից լեռներով է շրջապատւած, մթնոլորտային տեղումներ քիչ են թափուած:

Մարդկային բնակութեան համար Շւէյցարական Ալպերը, ինչպէս ընդհանրապէս բոլոր բարձր լեռները, յարմար չեն: Ջրնապատ մասերում ամենեկին բնակութիւն չկայ:

Փըննի լճից սկսած մինչև Քոդենի լիճը տարածուած է Միջին Շւէյցարական բարձրաւանդակը:

Այդ բարձրաւանդակը Շւէյցարիայի ամենայարմար մասն է և ամենից աւելի խիտ բնակութիւն այդտեղ կայ:

Շւէյցարական Իւլրան ընկնում է Շւէյցարական բարձրաւանդակի հիւսիս-արեւմտեան կողմում. բազկացած է կրաքարերից, ուստի և ծածկւած է խղճուկ բուսականութեամբ—ցածրիկ անտառներով և թփուտներով:

Շւէյցարիայի ազգաբնակչութիւնը ($3\frac{1}{2}$ միլ.) խառն է: 100 հոգուց 70-ը գերմանացիներ են, 22-ը՝ ֆրանսիացիներ, 7-ը՝ իտալացիներ, 1-ը ռոման: Հարաւ-արեւմտեան մասում ապրում են ֆրանսիացիները, Ալպերի հարաւային լանջերի վրայ՝ իտալացիները, իսկ մնացած տեղերում՝ գերմանացիները: Ազգաբնակչութեան կէսից աւելին (60%) ըողորական է, կէսից պակասը (40%)—կաթոլիկ:

ՇԻԿՅՑԱՐԱՑԻՆԵՐԻ ԶԲԱՂՄՈՒՆՔՆԵՐԸ և ԿԵԱՆՔԸ:— Շւէյցարական Ալպերում ապրող բնակիչները գլխաւորապէս զբաղւում են անասնաբուծութեամբ. մեծ քանակութեամբ ար-

տաղրում են ընտիր պանիր և իւր. շէյցարական պանիրը հրօշակած է ամեն տեղ և մեծ քանակութեամբ արտահանում է ուրիշ երկիրներ:



Նկ. 24. Ալպեան արօսանդիներ. յեկում երեւում է Մասսեիօրն գագարը:

Ալպեան լեռների փէշերի վրայ բացի անասնաբուծութիւնից կարևոր զբաղմունք է համարում այգեգործութիւնը: Շէյցարական մեծ լճերի ափերին փռած են խաղողի այգիներ:

Շէյցարական քարձրաանդակի բնակիչները զբաղում են երկրագործութեամբ. բայց վերջին ժամանակներս այդ զբաղմունքը սկսում է տեղի տալ անասնաբուծութեան: Հացահատիկների փոխարէն գիւղացիները աւելի սկսում են ցանել խոտաբոյսեր և բազմացնում են կաթնատու կենդանիներ:

Գիւղատնտեսութեան հետ միասին Շէյցարիայում շատ է զարգացած նաև մշակողական արդիւնագործութիւնը: Հին ժամանակներից սկսած Շէյցարիայում զարգացած են տնայնագործութեան զանազան ճիւղերը:

Շէյցարիայում առանձնապէս զարգացել է՝ ժամնացոյցի, նաև քամբակէ եւ մետաքսէ գործածքների արտադրութիւնը:

Շէյցարական գիւղացիները փայտի քանդակներից շնորհալի կեր-

պով պատրաստում են գեղեցիկ զարդարանքներ. գեղջիուհիները պատրաստում են նուրբ և թանգագին ասեղնագործեր: Աւելի նշանակութիւն ունի ժամացոյցի արտադրութիւնը, որ շատ է զարգացած Շէյյցարիայի հարաւ-արեւմտեան մասում—Իւրայում և Փընսի ու Նիւշատեի լճերի մօտերքում: Շէյյցարական ժամացոյցները լաւ հոչակ ունեն և վաճառում են երկրագնդի բոլոր կողմերում:

Շէյյցարական գեղջիուհիները հնուց արդէն ձեռքի դազգահների վրայ պատրաստում էին բամբակէ և մետաքսէ գործւածքներ, իբրև հում նիւթ գործադրելով ամերիկական բամբակ և իտալական մետաքսաթել: Բայց Շէյյցարիայում առաջ շատ չկային գործւածքներ արդիւնաբերող գործարաններ, որովհետև այդտեղ քարածուխ չկայ: Վերջերս սակայն քարածուխի փոխարէն Շէյյցարիայում սկսեցին օգտուել երկրի արագահոս գետերի և գետակների, նաև ջրվէժների ձրիարար մատակարարող ոյժից: Ներկայումս արդէն շատ կան բամբակէ և մետաքսէ գործւածքներ արդիւնաբերող գործարաններ, որոնք ջրով են բանեցւում. ուստի և գործարանային արդիւնագործութիւնը արագ կերպով զարգանում է Շէյյցարիայում:

Շէյյցարիայի բնակիչների համար ապրուստի կարևոր միջոց են հայթայթում նաև ճանապարհորդները: Շէյյցարիայի գեղեցիկ և վեհապանծ լեռները, նրա մաքուր, առողջարար օդը ամեն տարի գարնանը և ամառը ահագին թւով ուղևորներ են գրաւում դէպի այդ երկիրը—Փերմանիայից, Անգլիայից, Ֆրանսիայից, Ռուսաստանից և նոյն իսկ Ամերիկայից: Իւրաքանչիւր տարի մի քանի հարիւր հազար օտարերկրացի ճանապարհորդներ են այցելում Շէյյցարիա, որոնք այդ երկրի բնակիչներին աշխատանք են հայթայթում ու տարեկան այդտեղ թողնում մօտ 250 միլիոն ուրբլի:

Շէյյցարական բոլոր քաղաքներում կան բազմաթիւ հիւրանոցներ, որոնք բոլորն էլ ամառը լցւած են լինում ճանապարհորդներով: Ոչ միայն քաղաքներում, այլ նաև բոլոր գիւղերում, նոյն իսկ հեռու ընկած վայրերում՝ սարալանջերին ու լեռնուղիների վրայ յաճախ պատահում են հիւրանոցներ: Ամեն տեղ էլ ճանապարհորդները գտնում են յարմարաւոր օթևան: Բացի ճանապարհորդներից՝ Շէյյցարիա են գալիս նաև բազմաթիւ հիւանդներ, մանաւանդ թոքախտաւորներ՝ օգտուելու լեռնային մաքուր և կենդանարար օդից: Այս նպատակով լեռնային բարձր, յարմարաւոր վայրերում հիմնուել են շատ բուժարաններ (օրինակ Դաւոսում):


Ճանապարհների հաղորդակցութիւնը Շէյյցարիայում շատ

զարգացած է (մասամբ ճանապարհորդների բազմութեան շնորհիւ): Ամեն ուղղութեամբ ձգւած են երկաթուղային գծեր, չընայելով որ վերին աստիճանի դժւար է նրանց կառուցումը լեռներում:

Ամենից նշանաւոր է Սէն-Գոթարդեան երկաթուղային գիծը, որ կտրում է Շւէյցարական Ալպերը՝ հիւսիսից-հարաւ: Այդ գիծը պցւած է Ռոյսի գետահովտով, անցնում է Սէն-Գոթարդ լեռան մէջ 14 վերստ երկայնութեամբ փորած տունելով¹⁾ դէպի Տիչինսոյի հովիտը և այդտեղից էլ՝ դէպի Լազո-Մաշիօրէ:

Թէ ինչպէս դժւար գործ է երկաթուղիներ կառուցանելը Ալպերում, այդ կարելի է եզրակացնել նրանից, որ Սէն-Գոթարդի գծի վըրայ գտնուում են 324 կամուրջ և 80 տունել:

Բացի սովորական երկաթուղիներից Շւէյցարիայում կառուցել են բազմաթիւ ատամնաւոր և ծոպանաւոր երկաթուղիներ (ֆունիկուլեօրներ):



Նկ. 25. Փունիկուլեօր Ալպերի վրայ:

բացիների մէջ: Ամեն մի, նոյնիսկ յետ ընկած գիւղում տար-

Գրանցով ճանապարհորդները կարողանում են ելնել բարձր լեռներ՝ այնտեղից դիտելու շուրջը և հիանալու Ալպեան տեսարաններով: Այդպիսի մի գիծ է կառուցւում ներկայումս նոյնիսկ դէպի Բերնեան Ալպերի գագաթը—Իւնզֆրաուն²⁾:

Ամբողջ Շւէյցարիան կտրուած է բազմաթիւ և յարմարաւոր խճուղիներով: Լճերի վըրայով կատարւում է շոգենաւերի կանոնաւոր երթևեկութիւն:

Շւէյցարացիների ասլրոստը շատ լաւ է. նրանք բարեկեցիկ կեանք են անց կացնում: Ժողովրդական կրթութիւնը բարձր զարգացման է հասած շւէյցարացիների մէջ:

¹⁾ Վերջերս աւարտած Սիմպլոնի տունելը (Վալլիսեան Ալպերում) 19 վերստ երկայնութիւն ունի:

²⁾ Այս ճանապարհների վրայ գնացքները շարժւում են մեծ մասով էլեկտրականութեամբ, որ ձեռք է բերւում ջրվէժների օգնութեամբ:

բական դպրոց կայ, որ սովորաբար ամենալաւ շէնքում է տեղաւորւած լինում: Տարրական դպրոցի դասընթացը վեցամեայ է: Շւէյցարիան Եւրոպայի ամենաքաղաքակիրթ երկիրներից մէկն է. ուսումը պարտադիր լինելու պատճառով անզրազէտ մարդ համարեա չկայ այնտեղ: Շւէյցարիայում կան նաև գիւղատնտեսական ու տեխնիքական բազմաթիւ միջնակարգ դըպրոցներ, գիմնազիաներ, բէալական դպրոցներ և այլն: Բարձրագոյն կրթութիւն տալու համար գոյութիւն ունեն վեց համալսարաններ և մի քանի ուրիշ բարձրագոյն դպրոցներ: Այդ համալսարանում և միւս բարձրագոյն դպրոցներում սովորում են զանազան երկիրներից եկած բազմաթիւ ուսանողներ ևս:

ՊԵՏԱԿԱՆ ԿԱԶՄԸ ԵՒ ՔԱՂԱՔՆԵՐԸ:—Շւէյցարիան բաղկացած է 25 փոքրիկ հասարակապետութիւններից, որոնք կոչւում են կանտոններ: Այդ բոլոր կանտոնները զաշնակցելով (միանալով) իրար հետ՝ կազմել են Շւէյցարիայի զաշնակցական հասարակապետութիւնը:

Ամեն մի կանտոն իր ներքին գործերի մէջ ինքնավար է. օրինակ՝ ճանապարհներ զցելը, դպրոցներ պահելը և նման ձեռնարկութիւնները ներքին գործեր են: Այս բաների համար էլ ամեն մի կանտոն հրատարակում է իր համար օրէնքներ: Ամեն մի կանտոն ունի իր բնակիչների կողմից ընտրւած պաշտօնեաներ:

Ամենանշանաւոր կանտոններն են. Բերն—Շւէյցարիայի կենտրոնում. Վալլիս—Ռոնայի հովտում, Գրաուբրինդեն—արևելեան կողմում: Ամենահին կանտոնները գտնւում են Ֆիրվալդշտետեր լճի շուրջը: Դըրանք են՝ Շւից (որից և ծագում է Շւէյցարիա անունը), Ուրի և Ունտերվալդեն: Սրանք 14-րդ դարում ապստամբելով Աւստրիայի դէմ՝ ձեռք բերին անկախութիւն (յիշել Վիլհելմ Տելլի պատմութիւնը): Հետըզհետէ, մինչև 19-րդ դարի սկիզբը, այդ երեք կանտոններին միացան միւս 22 կանտոնները:

Ամբողջ պետութեան վերաբերող գործերի համար (մաքսատներ, պոստ, հեռագիր, երկաթուղի, դրամահատութիւն, զօրք) գոյութիւն ունի առանձին օրէնսդրական հաստատութիւն, որ կոչւում է Դաշնակցական Ժողով: Այս Ժողովի անդամներին ընտրում են բոլոր շւէյցարացիները: Վերոյիշեալ ընդհանուր

պետական գործերը կառավարելու և օտար պետութիւնների հետ յարաբերութիւններ վարելու համար Դաշնակցական ժողովը ընտրում է Դաշնակցական Խորհուրդ (մինիստրների խորհուրդ) և նախագահ (1 տարով) Շւէյցարիայի դաշնակցական հասարակապետութեան համար:



Նկ. 26. Ամբոզց ևւրի կանգանի բազմացիների ժողով:

Շւէյցարիայի մայրաքաղաքն է Բերն, որ գտնւում է Արգետի վրայ: Բերնում են գտնւում Դաշնակցական ժողովը և Դաշնակցական Խորհուրդը. այնտեղ է նստում նաև հասարակապետութեան նախագահը:

Շւէյցարիայի ամենամեծ քաղաքն է Յիւլրիխ (մօտ 200 հազար բնակիչ.): Յիւլրիխն ունի համալսարան, տեխնիքական բարձրագոյն դպրոց, միջնակարգ և տարրական բազմաթիւ դպրոցներ: Դպրոցների համար յատկացւած են քաղաքի ամենալաւ շէնքերը: Յիւլրիխը Շւէյցարիայի մետաքսագործական և մեքենաների արդիւնաբերութեան կենտրոնն է:

Բազել—Հոննուսի վրայ: Նշանաւոր է իր առևտրով Գեր-

մանխայի հետ: Այս քաղաքում է գտնուում Գերմանիայից Իտալիա և Ֆրանսիայից Աւստրո-Ունգարիա տանող երկաթուղային գծերի հանգույցը: Բազելից է սկսուում նաւազնացուծիւնը Հոննոս գետով դէպի ցած:

Լուցերն—Ֆիրվալդշտետեր լճի ափին, —այնտեղ, ուր լճից դուրս է գալիս Ռոյս գետը: Լուցերնի դիրքը գեղեցիկ է, գրտնուում է լեռների մէջ. այդ պատճառով էլ նա դէպի ինքն է գրաւուում բազմաթիւ ճանապարհորդներ:

Ինտերլակեն—Աւար գետի վրայ, Թուն և Բրիենց լճերի մէջ տեղում: Ինտերլակենում են հաւաքուում Բերնեան Ալպերը բարձրանալ ցանկացող ճանապարհորդները:

Փընև—Փընևի լճի ափին, այնտեղ, —ուր այդ լճից դուրս է գալիս Ռոնա գետը. նշանաւոր է իբր առևտրով Ֆրանսիայի հետ: Փընևը շէյցարական ժամացոյցների արտադրութեան կենտրոնն է: Ունի համալսարան:

Լոզանն—Փընևի լճի ափին, երեք բլուրների վրայ և նըրանց մէջ ընկնող հովիտներում: Ունի գեղեցիկ շրջակայք. կլիման շատ մեղմ է և առողջարար: Լոզանում կայ համալսարան:

Ի Տ Ա Լ Ի Ա

ԸՆԴՀԱՆՈՒՐ ՆԿԱՐԱԳՐՈՒԹԻՒՆ:—Իտալիայի մասերն են կազմում—Լոմբարդիա դաշտավայրը՝ Ալպեան լեռների մերձակայ լանջերի հետ միասին, Ապեննինեան թերակղզին և երկու մեծ կղզիներ՝ Սիցիլիա և Սարդինիա:

Լոմբարդիա դաշտավայրը բռնում է Ալպերի և Ապենինեան լեռների մէջ տարածւող ցածրութիւնը: Այդ դաշտավայրի երկայնութեամբ հոսում է Պօ գետը: Սա իբր ձախ կողմից ընդունում է մի քանի մեծ վտակներ—Դորա-Ռիպարիա Դորա-Բալտէա, Տիչինօ (Տեսսին), Ադդա, Մինչիօ: Այս բոլոր գետերը իրենց սկիզբը առնում են Ալպեան ստոպադաշտերի և յաւերժական ձեան տակից: Այդ գետերից մի քանիսը

հոսում են մեծ լճերի միջով. Տիչինո գետը—Լազո-Մաջիորէ լճով, Ադդա գետը—Կոմօ լճի միջով:

Պօն իր գետաբերանի մօտ կազմում է մեծ ղելտայ: Բացի Պօնից՝ Ադդիատիկ ծովն են թափւում էչ և շատ ուրիշ փոքր գետեր, որոնք հոսում են Ալպերից և Ապեննինեան լեռներից:

Հոմբարդական դաշտավայրը միայն արևելեան կողմից բաց է ծովի առաջ, իսկ երեք կողմից շրջապատւած է լեռներով, ուստի և Ատլանտեան օվկիանոսից ու Միջերկրական ծովից փչող քամիները ազատ մուտք չունեն Հոմբարդիա: Այս պատճառով էլ Հոմբարդական դաշտավայրի կլիման ցամաքային է— ձմեռը այնտեղ մինչև 10⁰ սառնամանիքներ են լինում, գետերը երբեմն սառչում են, ձիւնը շաբաթներով գետնին նստած է մնում, ամառն էլ շատ շոգ է լինում և երկարատև. այնպէս որ այնտեղ հասնում են ոչ միայն ցորենը և եգիպտացորենը, այլ մինչև անգամ բրինձը:

Ապեննինեան թերակղզին մեծ մասով լեռնոտ է: Ապեննինեան լեռները, որոնցից և թերակղզին ստացել է իր անունը, երկայնածիղ աղեղի ձևով տարածւում են ամբողջ թերակղզու երկայնութեամբ՝ հիւսիսից սկսած մինչև թերակղզու հարաւային մասի՝ Կալաբրիայի ծայրը: Ապեննինեան լեռները ամենից աւելի բարձր են միջին [մասում, որտեղ և նրանք կոչւում են Աբրուցցներ: Աբրուցցների գագաթներից մէկը՝ Գրան-Սասսօ 3 վերստ բարձրութիւն ունի և ծածկւած է յաւիտենական ձիւնով:

Ապեննինեան լեռները մեծ մասով բաղկացած են մոխրագոյն կամ կարմրաուռն կրաքարերից: Այդ լեռնաշղթաները ամայի են, նման Դինարեան լեռներին—նոյն քարաժայռերը, նոյն քարայրերը և ստորերկրեայ գետերը:

Ապեննինեան լեռների արևմտեան փէշերի վրայ գտնւում են մեծ թւով հանգած հրաբուխներ: Նէապոլի ծոցի հենց ափին գտնւում է Վեզուվ անունով գործող հրաբուխը, մէկ վերստ բարձրութեամբ:

Թերակղզու միջով հոսում են նրա ամենամեծ գետերը— Արնօ և Տիբեր: Սրանցից նաւարկելի է միայն Տիբերը, այն էլ հազիւ փոքր տարածութեան վրայ:



Նկ. 27. Պոմպեյ քաղաքի աւերակները:

Որովհետև Ապեննինեան թերակղզին թէ՛ արևելեան և թէ՛ արևմտեան կողմից ողողւում է տաք ծովերով, ուստի և սրա կլիման (բացառութեամբ բարձր լեռնագագաթները) մերձարեաղարծային է—շոգ, չոր ամառ և անձրևային, մեղմ ձմեռ: Այս պատճառով այնտեղ աճում են մշտադալար ծառեր և թփեր: Գարնանը դրանք բոլորը լաւ ծաղկում են և բուրում, բայց ամառը ծածկւում են փոշով և ստանում մոխրագոյն, տխուր տեսք:

Սիցիլիա և Սարդինիա կղզիները լեռնոտ են և իրենց բնութեամբ նման են Ապեննինեան թերակղզուն:

Սիցիլիայի արևելեան ծովափին գտնւում է հսկայական Էտնա հրաբխային սարը, որ համարեա 3 անգամ աւելի բարձր է, քան Վեզուվը և տարւայ մեծ մասը ծածկւած է ձիւնով:

Իրենց ծագման նայելով՝ Սիցիլիան և Սարդինիան ցամաքային կղզիներ են:

1908 թվականի դեկտեմբերին տեղի ունեցաւ մի սոսկալի երկրաշարժ, որից կործանւեցին Սիցիլիայի վրայ գտնուող Մետսինա մեծ քաղաքը և Կալաբրիայի մի քանի փոքրիկ քաղաքներ: Այդ երկրաշարժին զոհ գնացին 100 հազարից աւելի մարդիկ:

Իտալիայի բնական հարստութիւնը նրա բուսական աշխարհի մէջ է: Իտալիան քարածուխով և մետաղներով առքատ է: Էլբա կղզու վրայ միայն գտնուում են երկաթանոցներ, Սիցիլիայում — ծծմբանոցներ:

Իտալիայի ընակիչների թիւը 34 միլիոն է — $1\frac{1}{2}$ անգամ աւելի, քան Բալկանեան բոլոր պետութիւններում՝ միասին վերցրած: Համարեա ամբողջ ազգաբնակչութիւնը բաղկացած է իտալացիներից, որոնք խօսում են իտալերէն լեզուի զանազան բարբառներ և կազմում են մի ազգութիւն:

ԻՏԱԼԱՅԻՆՆԵՐԻ ԶԲԱՂՄՈՒՆՔՆԵՐԸ ԵՒ ԿԵԱՆՔԸ. — Իտալացիների ապրուստի գլխաւոր միջոցները կազմում են երկրագործութիւնը և այգեգործութիւնը, որ ծաղկում է առանձնապէս Լոմբարդիայում, Ապեննինների փէշերի վրայ և Սիցիլիայում:

Լոմբարդական արգաւանդ դաշտերի միջով հոսում են ջրբառատ գետեր: Սրանցից իտալացիները օգտուում են մեծ չափերով և արեւստական կերպով ոռոգում են իրենց դաշտերը: Այդ գետերից նրանք անց են կացրել ջրանցքներ, որոնցով ամեն ուղղութեամբ կարուած է Լոմբարդական դաշտավայրը: Այս դաշտավայրի ամենից աւելի ցածրադիր, ճանճային տեղերում իտալացիները մշակում են բրինձ կամ ցանովի խոտեր, որոնք այնտեղ այնչափ արտադութեամբ են աճում, որ տարւայ ընթացքում ութ անգամ հնձում են: Լոմբարդացիները խոտով կերակրում են իրենց կովերին, որոնցից ստանում են շատ իւղ և պանիր: Այնտեղ, ուր հողը պակաս չափով խոնաւ է, ցանում են ցորեն և եգիպտացորեն: Յաճախ հացահատիկ ցանում են այնպիսի տեղերում, ուր արդէն սնկած են լինում խաղողի որթ և թթնահիներ: Լոմբարդիան այնքան տաք է և արևաշատ, որ այնտեղ հացահատիկները նոյնիսկ ծառերի տակ աճել կարող են:

Մետաքսագործութիւնը շատ է զարգացած Լոմբարդիայում:

այնչափ շատ մետաքս է արտադրուում այնտեղ, որ արտահանուում է օտար երկիրներ *):

Ապեննինների փէշերի վրայ այնչափ առատ ջուր չկայ, որչափ Լոմբարդիայում: Արւեստական ոռոգում գոյութիւն ունի այնտեղ միայն սակաւաթիւ վայրերում—գետերի ափերին. օրինակ՝ Արնօ գետի ափին: Մնացած տարածութիւնը ոռոգուում է անձրևով, որ գլխաւորապէս ձմեռ ժամանակ է գալիս: Ուստի և այստեղ արտերում ցորեն ցանում են միայն աշնանը: Ամառւայ չորային լինելը սակայն չէ խանգարում, որ այդտեղ պտղատու ծառեր ևս աճեն. դրանք իրենց երկայն արմատներով խոնաւութիւն ծծում են հողի ստորին, խորը շերտերից: Օրինակ՝ ձիթենին աճում է Ապեննինների փէշերի վրայ ամենուրեք, նոյնիսկ ամենաչոր և ապառաժոտ տեղերում: Ամեն տեղ աճում է նաև խաղողի որթ:

Խաղողի և այլ պտղատու ծառերի այգիներով ծածկւած են Ապեննինների փէշերը համարեա ամբողջապէս. բայց այդ այգիները առանձնապէս փարթամ են այն լեռների և բլուրների լանջերին, որտեղ գետնի տակից աղբիւրներ են բղխում: Այսպիսի վայրերում լաւ են աճում՝ թզնի, դեղձի, նշենի, իսկ Նէպոլի ծոցից հարաւ աճում են նաև՝ նարնջենի և կիտրոնի ծառ:

Աւելի փարթամ այգիներ կան Սիցիլիայում՝ այստեղ լեռների ստորոտներից բղխում են յորդ աղբիւրներ, որոնք հնարաւորութիւն են տալիս արւեստական կերպով ոռոգելու այգիները: Նարինջ, կիտրոն, մանդարին,—այնչափ մեծ քանակութեամբ են ստացուում Սիցիլիայում, որ նրանցով բարձում են ամբողջ նաւեր և արտահանում դէպի եւրոպական զանազան երկիրներ:

Իտալիայի լեռնային շրջաններում (Ալպերում և Ապեննիններում) իտալացիները իրենց գլխաւոր ուշադրութիւնը դարձնում են անասնաբուծութեան վրայ: Ալպերի լանջերին բազմացնում են խոշոր եղջիւրաւոր անասուններ, իսկ Ապեննինների

*) Մետաքսի արտադրութեամբ Իտալիան յետ է մնում միայն Չինաստանից և Եպոսիիայից:

վրայ՝ միայն էշ, ոչխար և այծ, որոնք կարող են գոհանալ նաև միայն կոշտ խոտով և թփերով:

Իտալիայի ավերը ողողող ծովերը բաւական հարուստ են ձկներով: Այս պատճառով ձկնորսութիւնը ծովափնեայ բնակիչների ապրուստի համար կարևոր միջոց է համարուում:

Հանքագործութիւնը Իտալիայում զարգացած չէ:

Մշակողական արդիւնագործութիւնը Իտալիայում աննշան է՝ այնտեղ քարածուխ չլինելու պատճառով:

Իրայն Լոմբարդական դաշտավայրում, Ալպերի ստորոտների մօտ, վերջին ժամանակներս հիմնւել են շատ գործարաններ (բամբակի, մետաքսի և այլն), որոնք բանեցւում են արագահոս գետերով: Իտալիայի ֆաբրիկայի մասերում յաճախ պատահում են միայն մակարոնի գործարաններ (մակարոնը իտալացիների սիրած բանն է):

Այսպիսով ուրեմն Իտալիան արդիւնագործական երկիր չէ, այլ զիւղատնտեսական: Մրգեղէնի (հարինջ, կիտրոն, խաղող, նուշ) արտադրութեամբ Իտալիան առաջինն է եւրոպական բոլոր պետութիւնների թւում: Իտալացիները ոչ ոքից յետ չեն մնում նաև ձիթենու իւղի և գինու արտադրութեամբ. գինին Իտալիայում այնչափ էժան է, որ կազմում է թէ հարուստների և թէ աղքատների ամենօրեայ խմիչքը:

Իտալիայի առետուրը հնումը շատ զարգացած էր, իսկ Ամերիկայի գիւտից յետոյ ընկաւ. Սուէզի ջրանցքը փորելուց յետոյ նորից կենդանանում է: Ճենովա և ուրիշ նաւահանգիստներ ունեն առևտրական նշանակութիւն: Իտալացիները արտահանում են գլխաւորապէս—մետաքս, գինի, ձիթենու իւղ, բրբրինձ, մրգեղէն. ներմուծում են՝ հացահատիկներ, մետաղեայ գործիքներ, քարածուխ: Միջերկրական ծովի վրայ երթևեկում են շատ թւով իտալական առևտրական նաւեր:

Իտալացիները, մանաւանդ գիւղացիները աղքատ կեանք են անցկացնում:

Թէպէտ նրանք իրենց այգիներում և արտերում աշխատում են անընդհատ, համարեա ամբողջ տարին - տասներկու ամիս, բայց և այնպէս ապրուստի համար հազիւ են կարողանում խղճուկ միջոցներ հայթայթել: Նրանք հողից խլում են այն ամիսը, ինչ կարճ է նա տալ: Սակայն իտալացիների հողաբաժինները փոքր են, շատ գիւղացիներ էլ ամենևին սեփական հող չունեն. ուստի և հարկադրւած են կալւածա-

տէրերին թանգ վճարել և նրանցից կապալով հող վերցնել: Անեկանե-
լի դրութիւնը ստիպում է շատ խտալացիների թողնել իրենց հայրե-
նիքը: Իւրաքանչիւր տարի մի քանի հարիւր հազար խտալացիներ աշ-
խատանք որոնելու նպատակով գնում են Շւէյցարիա, Գերմանիա,
Ֆրանսիա և կամ ընդամիշտ գաղթում են Ամերիկա:

1906 թւականին Իտալիայից հեռացել են 788 հազար հոգի, որոն-
ցից 512 հազարը՝ զէպի Ամերիկա:

Ժողովրդական կրթութիւնը Իտալիայում շատ չէ զարգա-
ցած: Բարձրագոյն դպրոցներ (օրինակ համալսարաններ) այն-
տեղ բաւական թւով (քսան և մէկ) կան. բայց տարրական
դպրոցների թիւը քիչ է, մանաւանդ Հարաւային Իտալիայում,
որտեղ ազգաբնակչութեան մեծ մասը անգրագէտ է:

ՊԵՏԱԿԱՆ ԿԱԶՄԸ ԵՒ ՔԱՂԱՔՆԵՐԸ.—Շատ վաղուց չէ,
որ Իտալիան բազկացած էր մի շարք անջատ, մանր պետու-
թիւններից, որոնք միայն անցեալ դարում հետզհետէ միա-
ցան: 1870 թւականին կազմեց միացեալ Իտալիայի սահմա-
նադրական թագաւորութիւնը: Թագաւորի իշխանութիւնը սահ-
մանափակւած է պարլամենտով:

Իտալիայի մայրաքաղաքն է՝ Հռոմ (500 հազարից աւելի
բնակիչներով): Հռոմը գտնւում է Իտալիայի կենտրոնում,
Տիբեր գետի վրայ: Հռոմում են նստում թագաւորը և երկրա-
գնդի բոլոր կաթողիկէների հոգևոր պետը—պապը. այնտեղ է
գտնւում նաև իտալական պարլամենտը:

Հռոմը շատ հին քաղաք է, երկու և կէս հազար տարուց աւել է ինչ
գոյութիւն ունի: Այդ քաղաքում մնացած կան հնութեան շատ յիշա-
տակարաններ: Քաղաքի կենտրոնում է գտնւում Հռոմի Ֆորումը—այն
հրապարակը, որտեղ գեռ Քրիստոսի Ծննդից առաջ տեղի էին ունենում
Հռոմի քաղաքացիների ժողովները: Ֆորումի վրայ և նրա մօտերքում
պահւած կան հեթանոսական տաճարների աւերակներ: Հինց այստեղ
մօտիկ է գտնւում նաև Կոլիզէյը—հսկայական կիսաւեր մի կրկէս, որ-
տեղ Հռոմի հեթանոս արիւնոուշտ կայսրները քրիստոնեաների վրայ գա-
զաններ էին բաց թողնում՝ նրանց յօշոտել տալու համար: Աւելի ուշ ժա-
մանակւայ շէնքերի թւում նշանաւոր են՝ Ս.Պետրոսի տաճարը, որ եր-
կրագնդիս ամենաընդարձակ և ամենաշքեղ (իւր նկարներով և արձաննե-
րով) տաճարն է. Վատիկանը մի հսկայական արքունիք է, բազկացած
է աւելի քան 10,000 սենեակներից. դա պապի վեհարանն է: Վատիկա-

նում պահում են բազմահատոր գրքերի և նկարների ընտիր ժողովածուներ:



Նկ. 28. Սուրբ Պետրոսի տաճարը եւ հրապարակը Հռոմում:

Միլան (500 հազարից աւելի բնակիչ.)—Լոմբարդիայի արդիւնագործական կենտրոնն է, մետաքսի բազմաթիւ գործարաններով. գտնւում է մի քանի նաւարկելի ջրանցքների և երկաթուղային գծերի հանգույցում, որոնցից ամենանշանաւորն է Սէն-Գոթթարդի գիծը:

Տուրին—նմանապէս արդիւնագործական նշանաւոր քաղաք է Դորա-Ռիպարիա գետի վրայ, ուր սա Պօ գետն է թափւում: Դորա-Ռիպարիայի հովտով անց է կացրած (Մոն-Սընեսի վրայով) երկաթուղային գիծ դէպի Ֆրանսիա:

Ճենովա—Ճենովայի ծոցի ափին: Իտալիայի ամենանշանաւոր նաւահանգիստն է. մեծ նշանակութիւն ունի նոյն իսկ Շէէյցարիայի և հարաւային Գերմանիայի համար:

Ճենովայում կանգնեցրած է Կոլումբոսի արձանը. Կոլումբոսը այգտեղ է ծնել, մեծացել և նաւագնացութիւն սովորել:

Վենետիկ—նաւահանգիստ է Ադրիատիկ ծովի ափին:

Վենետիկը գտնւում է բազմաթիւ կղզիների վրայ: Փողոց Վենետիկում քիչ կայ. զբանց դերը կատարում են կղզիների մէջ գտնւող

նեղուցները և արևստական կերպով փորած ջրանցքները: Կառքերի փոխարէն երթեկում են գոնդոլներ (նաւակ):

Վենետիկից ոչ հեռու ընկած Ս. Ղաղարի կղզու վրայ է գտնուում Մխիթարեան վանքը և միաբանութիւնը, որ մօտ երկու հարիւր տարի առաջ հիմնեց սերաստացի Մխիթար արքահայրը: Մխիթարեան միաբանութեան նշանակութիւնը մեծ է հայոց լեզւի և գրականութեան զարգացման գործում: Վանքում կայ հարուստ գրադարան, դպրոց և տըպարան: Այնտեղ տպուում են շատ գրքեր և «Բագմավէպ» ամսագիրը:



Նկ. 29. Ջրանցք Վենետիկում: Գոնդոլներ:

Ֆլորէնցիա.—Մեծ քաղաք է, Արնօ գետի վրայ. շրջապատւած է ընդարձակ այգիներով:

Ֆլորենցիան հռչակւած է իր թանգարաններով:

Նէապոլ (500 հազ. աւելի բնակիչ.)—նշանաւոր նաւահանգիստ է Նէապոլի ծոցի ափին, գտնուում է Վեզուվ հրաբլիսային սարի մօտ:

Նէապոլից ոչ հեռու գտնուում է Պոմպէյը: (Նկ. 27) Սա հռոմէական հին քաղաքներից մէկն է: 79 թւին, Ք. յ. տեղի ունեցած Վեզուվի ժայթքումից կործանւեց և մոխրի տակ մնաց. վաղուց չէ ինչ պեղումներ են կատարել այդտեղ և բաց արել կործանւած քաղաքը: Նէապոլի թանգարանում են պահուում Պոմպէյի պեղումների միջոցին գտնւած

ամեն տեսակ բազմաթիւ առարկաներ—հին հոմայեցիների տնային իրեր, զարդարանքներ և նկարներ:

Նէապոլից հարաւ ընկնում է Սորրենտի կրաքարային թերակղզիները: Նէապոլը, Վեզուվը, Սորրենտի թերակղզին և նրա շարունակութիւն կազմող Կապրի կղզին պատկանում են երկրագնդի ամենաչքնաղ վայրերի թւին:



Նկ. 30. Տեսարան Նէապոլ քաղաքում՝ Վեզուվ հրաբուխի հետ:

Պալերմո Կատանիա—նշանաւոր նաւահանգիստներ են Սիցիլիա կղզու վրայ. շրջապատւած են նարնջի և կիտրոնի ծառերի պուրակներով:

Բարի և Բրինդիզի—նաւահանգիստներ են Ադրիատիկի հարաւային ծովափին. գտնւում են մի պտղաւէտ հարթութեան ծայրին, որ ծածկւած է միլիոնաւոր նշենիներով:

Իտալիան առաջնակարգ դեր է խաղացել համաշխարհային պատմութեան մէջ: Իտալիայի գաւակ են եղել (միջին դարում) այնպիսի աշխարհահռչակ բանաստեղծներ, ինչպէս են Դանտէ, Պետրարկա, Արիօստո. այնպիսի հանճարեղ նկարիչներ և քանդակագործներ, ինչպէս են Ռաֆայէլ, Լէօնարդո-դա-Վինչի, Միքէլ Անջէլօ: Երաժշտութեան զարգացումն ևս մարդկութիւնը մեծ չափով պարտական է Իտալիային: Իտալացի են եղել յայտնի ճանապարհորդներ և նորանոր երկիրներ գտնողներ. Կոլումբոսը ձենովա քաղաքից էր, Մարկո-Պօլօն—Վենետիկ քաղաքից:

Իտալիայի քաքաքները իրենց բազմաթիւ պատկերասրահներով, թանգարաններով և հնութեան յուշարձաններով, նաև իտալական պարզ երկնակամարը, փայլուն արևը և կասոյտ, հայելանման ծովը այժմ էլ

դէպի իրենց են գրաւում բազմաթիւ ճանապարհորդների (սովորաբար ձմեռուայ վերջին և գարնան սկզբներին) Եւրոպայի և Ամերիկայի դանազան երկիրներից: Տասնեակ հազարաւոր կաթոլիկներ ամեն տարի ուրիտ են գնում Հոմմ՝ կաթոլիկութեան կենտրոնը և պապի աթոռանիստը:

Իտալական թագաւորութեան մէջ չէ մտել Ապեննինեան թերակղզու հիւսիս-արեւելեան կողմն ընկած մի փոքրիկ շրջան՝ իր 10 հազար բնակիչներով. դա ՍԱՆՄԱՐԻՆՅՕ կոչւած աննշան հասարակապետութիւնն է, որ գտնուում է Իտալիայի հովանաւորութեան տակ:

ՊԻՐԵՆԷՆԵՆ ԹԵՐԱԿՂԶԻ

ԸՆԴՀԱՆՈՒՐ ՆԿԱՐԱԳՐՈՒԹԻՒՆ:—Պիրենէեան թերակղզին աւելի մեծ տարածութիւն է բռնում, քան ո՛չ միայն Ապեննինեան, այլ նաև Բալկանեան թերակղզին: Պիրենէեան թերակղզու ափերը քիչ են կտրուած: Սրանով նա յիշեցնում է հարևան Աֆրիկան, Պիրենէեան լեռներով թերակղզին համարեա անշատուած է մայր ցամաքից և կարծէք մի առանձնացած, անշատ աշխարհ լինի: Իր մակերևոյթի կազմութեամբ էլ այդ թերակղզին յիշեցնում է աւելի Աֆրիկան, քան Եւրոպան: Նրա տարածութեան կէսից աւելին բռնում է Իսպանական ընդարձակ բարձրաւանդակը: Լեռնաշղթաներ կան թերակղզու միայն ծայրերում.— հիւսիսում՝ Պերինէեան և Կանտաբրեան լեռները, իսկ հարաւում՝ Գրանադեան լեռները:

Իսպանական բարձրաւանդակը ովկիանոսի մակերևոյթից աւելի քան $\frac{1}{2}$ վերստ բարձր է: Սիեբրա-Գլադարրամա լեռնաշղթան բաժանում է Իսպանական բարձրաւանդակը երկու մասի—Հին-Կաստիլեան (հիւսիսում) և Նոր-Կաստիլեան (հարաւում) բարձրաւանդակ: Բարձրաւանդակի հարաւային մասը կոչուում է Սիեբրա-Մորենա:

Իսպանական բարձրաւանդակի մակերևոյթը հարթ է, արևելեան կողմը աւելի բարձր է, քան արևմտեանը, այդ պատճառով էլ նրա զետեղընոսում են դէպի Ատլանտեան ովկիանոս. նշանաւոր են՝ Դուէրօ

գետը—Հին Կաստիլիայում և Տախո, Գուադիանա—Նոր Կաստիլիայում: Այս գետերը հոսում են արագ, խոր հովիտների միջով և շատ տեղ կազմում են սահանքներ:

Իսպանական բարձրալանդակի կլիման ցամաքային է: Ովկիանոսից փչող քամիները իրենց հետ բերած խոնաւութիւնը թողնում են թերակղզու ծայրերում: Ամառը սաստիկ շոգ (մինչև 40°) և երաշտ է լինում, իսկ ձմեռը մինչև 10° սառնամանիքներ. բարձրալանդակը ծածկւում է ձիւնով:

Բարձրալանդակի ընտանականութիւնը աղքատ է: Անտառներ չկան: Ամեն տեղ տարածւում են ընդարձակ տափաստաններ՝ փշատերև թփերով և կոշտ խոտով ծածկւած:

Մի քանի լեռնագագաթներ, օրինակ Մալադետոտա խմբում գրտնուղ Անետա գագաթը, 3 վերստից աւելի բարձր են: Պիրենէեան լեռների Ֆրանսիական լանջերի վրայ մթնոլորտային տեղումներ շատ են թափւում. այնտեղ կանաչին են տալիս հիւթառատ խոտով ծածկւած մարգագետիններ և փշատերև անտառներ. իսկ Իսպանական լանջերի վրայ մթնոլորտային տեղումներ քիչ են թափւում, անտառ համարեա չկայ, եղած արօտատեղիներն էլ խղճուկ են:

Պիրենէեան լեռները տարածւում են 400 վերստ երկայնութեան վրայ. իրենց բարձրութեամբ նրանք Ներոպայում 2-րդ տեղն են բռնում Ալպերից յետոյ. Պիրենէեան լեռները բաժանում են թերակղզին մայր ցամաքից, նրանք բազկացած են մի քանի զուգահեռական լեռնաշղթաներից:

Պիրենէեան լեռների շարունակութիւնն են կազմում Կանտաբրեան լեռները: Հարաւային կողմից նրանք էլ չոր են և անապատային. իսկ հիւսիսային լանջերում բնութիւնը բոլորովին հակառակն է:

Գրանադեան լեռները ձգւում են թերակղզու հարաւարեւելեան կողմում: Նրանց կատարները մինչև ամառւայ կէսը ձիւնով են ծածկւած լինում: Ամենաբարձր լեռնաշղթան է՝ Սիերրա-Նևադա. տեղ-տեղ յաւերժական ձիւնով է ծածկւած: Ամենաբարձր գագաթն է՝ Մուլհասեն, որ Անետայից բարձր է: Գրանադեան լեռների լանջերը քարքարոտ են և լերկ:

Պիրենէեան թերակղզու՝ Միջերկրական և Պորտուգալական ձովափնեայ մասերի կլիման մերձարեւադարձային է:

Գրանադեան լեռների հարաւային ստորոտներում հասնում են նոյն իսկ շաքարեղէգ, փրենիկեան արմաւենի և այլն: Այս ծովափերը Եւրոպայի ամենատաք մասերն են: Նարնջենի, թզենի, նշինի և ուրիշ պտղատու նուրբ ծառեր աճում են Միջերկրականի ծովափին ամեն անգ, միայն թէ արեւստական կերպով ջրեւելոց յետոյ, որովհետև այնտեղ ամառը լինում է շատ շոգ և չոր: Թերակղզու միւս կողմում, պորտուգալական ծովափին, կլիման աւելի խոնաւ է, անձրև շատ է գալիս՝ շնորհիւ ովկիանոսից փչող քամիների: Պտղատու նուրբ ծառերը այնտեղ աճում են նաև առանց արեւստական կերպով ջրեւելու: Իսպանական բարձաւանդակի՝ դէպի ովկիանոս նայող լանջերի վրայ պատահում են խցանակաղնու մեծ անտառներ:

Անդալուզեան և Արագոնեան դաշտավայրերը իրենց բնութեամբ նման են մերձակայ ծովափերին. նրանց կլիման ևս մերձարևադարձային է, միայն թէ՛ շատ չոր. բուսականութիւնը տափաստանային է: Անդալուզիայով է հոսում Գլազալկլիւիւր գետը, իսկ Արագոնիայով՝ Էբրօ գետը: Այս գետերի ափերին տարածւում են մշտադալար ծառերի և խաղողի այգիներ, որոնք ոռոգւում են արեւստական կերպով:

Բնական հարստութիւններով Պիրենէեան թերակղզին շատ չէ յետ մնում Ապենինեան և Բալկանեան թերակղզիներից: Ճիշտ է, նրա հողը աւելի պակաս արգաւանդ է, կլիման էլ բաւարար չափով խոնաւ չէ, բայց դրա փոխարէն երկիրը հարուստ է հանքերով, յատկապէս երկաթի և պղնձի հանքերով:

Պիրենէեան թերակղզու ազգաբնակչութիւնը կազմում են՝ իսպանացիներ, պորտուգալացիներ և բասկեր (հիւսիսային կողմում, Պիրենէեան լեռների մօտ): Իսպանացիները և պորտուգալացիները իրար ցեղակից ու մանական ժողովուրդներ են. բասկերը հին իբերական ժողովրդի յետնորդներն են. իբերներն էին հնումը Պիրենէեան ամբողջ թերակղզու բնակիչները:

ԻՍՊԱՆԱՑԻՆԵՐԻ ԵՒ ՊՈՐՏՈՒԳԱԼԱՑԻՆԵՐԻ ԶԲԱՂՄՈՒՆՔՆԵՐԸ ԵՒ ԿԵԱՆՔԸ. — Պիրենէեան թերակղզու բնակիչները զբաղւում են գլխաւորապէս գիւղական տնտեսութեամբ:

Միջերկրական ծովի ափին իսպանացիները զբաղւում են գլխաւորապէս այգեգործութեամբ: Իսպանական բարձրաւանդակի և Գրանադեան լեռների լանջերին ձգւած են բազմաթիւ

այգիներ: Մշակում են պտղատու նուրբ ծառեր—նարնջենի, նրունենի, նշենի, խաղողի որթ և ձիթենի:



Նկ. 31. Իսպանուհի:

Արևեստական ոռոգման համար ջանք չեն խնայում, որովհետև այդ միջոցով 20—30 անգամ աւելացնում են հողի բերքը: Պտղատու ծառերի տակ ևս ցանում են հացահատիկներ, կարտոֆիլ, իսպանական սոխ և այլն: Միևնույն հողաբաժնից այսպիսով տարեկան մի քանի հունձ են վերցնում:

Կան մարգագետիններ, որտեղ տարեկան մինչև 12 անգամ խտտահարք է լինում: Իսպանացիները արտահանում են մեծ քանակութեամբ թարմ միրգ, մանաւանդ նարինջ: Պատրաստում են չամիչ, գինի և ձէթ:

Արեւմտեան ծովափում պորտուգալացիները նմանապէս մշակում են պտղատու նուրբ ծառերի այգիներ. գլխաւոր ուշադրութիւնը դարձնում են խաղողի մշակութեան և զինեգործութեան վրայ. այգտեղի գինին յայտնի է «պորտվէյն» անունով և արտահանում է ուրիշ երկիրներ, գլխաւորապէս Անգլիա: Պորտուգալացիները զբաղում են նաև երկրագործութեամբ և այգեգործութեամբ. իրենց արտերը նրանք հնձում են տարեկան երկու անգամ:

Իսպանական բարձրաւանդակի լանջերին բազմացնում են՝ ոչխար, այծ և խոզ: Մեծ նշանակութիւն ունի նաև խցանակաղնու կեղևի արտադրութիւնը. այգտեղից խցան է արտահանում դէպի երկրագրնդի բոլոր կողմերը:



Նկ. 32. Պորտուգալուհի:

Թերակղզու հիւսիսային կողմում կլիման մերձարե-

ւադարձային չէ, այլ՝ բարեխառն և շատ խոնաւ: Այդտեղ գըլ-խաւոր նշանակութիւն ունի անասնաբուծութիւնը: Լեռների ստորոտներում և հովիտներում մշակում են եգիպտացորեն, տնե-րի մօտերքում—խնձորենու և տանձենու այգիներ:

Բոլորովին ուրիշ է տնտեսական զբաղմունքը թերակղզու մէջտեղում,—Իսպանական բարձրաւանդակի վրայ: Այդտեղ ա-հազին տարածութիւններ ամենևին մշակւած չեն և ծառայում են իբրև արօտատեղիներ ոչխարի հօտերի համար: Վերջերս իսպանացիները սկսել են աւելի ու աւելի վարել տափաստան-ները և աշնանացանքս անել—ցորեն և հաճար ցանել: Կլիմայի չորութիւնը խանգարում է երկրագործութեան զարգացմանը: Իսպանացիք իրենց անդի համար բաւարար չափով հացահա-տիկ չեն արտադրում, ուստի և մի մասը ստիպւած են գնել օտարներից:

Ծովափնեայ քնակիչների համար ապրուստի օժանդակ մի-ջոց է հանդիսանում ձկնորսութիւնը: Նշանակութիւն ունի նաև ծովային աղի արտադրութիւնը, որին նպաստում են չոր կլի-ման և ծովերի մեծ քանակութեամբ աղ պարունակելը:

Հանքագործութիւնը Պիրենէեան թերակղզում գոյութիւն ու-նի հին ժամանակներից սկսած: Անդալուզիայի լեռներում և Սիբերրա-Նեադայում շահագործում են հարուստ պղնձահանքեր, արդիւնաբերում են նաև երկաթ, սնդիկ, կապար, արծաթ, քա-րածուխ և այլն: Սակայն հանքագործութիւնը ամբողջապէս գտնւում է օտարերկրացիների, գլխաւորապէս անգլիացիների և գերմանացիների ձեռքում. իսպանական հանքերից նրանք հում նիւթը նաւերով փոխադրում են իրենց հայրենիքը և իրենց երկրի գործարաններում են արդիւնագործում:

Մշակողական արդիւնագործութիւնը զարգացած չէ. որոշ նշանակութիւն ունի միայն բամբակէ և բրդէ գործւածքներ պատրաստելը:

Երկրում եղած երկաթուղիները կառուցել են օտարերկրա-ցիները, մեծ մասով Ֆրանսիացիները: Ծովային նասագնացու-թիւնը գտնւում է անգլիացիների ձեռքում, մինչդեռ հին ժա-մանակներում իսպանական և պորտուգալական ծովագնացները

երկար ճանապարհորդութիւններ էին անում ծովով և նորանոր երկիրներ գտնում:

(Յիշել Կոլումբոսի, Վասկո-դէ-Գամայի և Մագելլանի գիւտերը):

Ժողովրդական կրթութիւնը խղճայի դրովժեան մէջ է գրտնւում: Իսպանացիների $\frac{2}{3}$ և պորտուգալացիների $\frac{3}{4}$ մասը անգրագէտ է: Նրանց մէջ քիչ կան ձեռնարկող ոգու տէր և կրթւած մարդիկ: Նրանցից շատերը տրամադիր են անգործութեան և զանազան զւարճութիւնների. յայտնի են օրինակ՝ Իսպանական ցլամարտերը:

Իսպանացիները և պորտուգալացիները աղքատ կեանք են անց կացնում: Գիւղացիների մեծ մասը գուրկ է սեփական հող ունենալուց. բարձր գին վճարելով՝ կալածատէրերից են կապալով հող վերցնում. բացի դրանից՝ նրանք պետութեանը մեծամեծ հարկեր են վճարում: Այս է պատճառը, որ նոյն իսկ Միջերկրականի ծովափին ընկնող փարթամ, այգեշատ վայրերում հողի կապալառուները կիսաքաղց կեանք են անցկացնում:

ՊԵՏՈՒԹԻՒՆՆԵՐԸ, ՔԱՂԱՔՆԵՐԸ ԵՒ ԳԱՂՈՒԹՆՆԵՐԸ.—

Պիրենէեան թերակղզու վրայ գտնւում են Իսպանիա և Պորտուգալիա սահմանադրական թագաւորութիւնները: Իսպանիան բռնում է թերակղզու մեծ մասը ($\frac{5}{6}$ -ը) և Բալէարեան կղզիները. Պորտուգալիան բռնում է թերակղզու արևմտեան ծովափնեայ մասը—Մինիօ գետից դէպի հարաւ:

ԻՍՊԱՆԻԱՆ բաւական մեծ պետութիւն է,—աւելի ընդարձակ տարածութիւն է բռնում, քան Իտալիան և Անգլիան (առանց գաղութների):

Իսպանիայի մայրաքաղաքն է՝ Մադրիդ ($\frac{1}{2}$ միլիոնից աւելի բնակիչ.), որ գտնւում է Պիրենէեան թերակղզու կենտրոնում. ունի համալսարան. Մադրիդից դուրս են գալիս երկաթուղային գծեր դէպի թերակղզու բոլոր կողմերը:

Իսպանիայի միւս նշանաւոր քաղաքները գտնւում են երկրի ծայրերում:

Բարցելոնա—նաւահանգիստ է և Իսպանիայի ամենանշանաւոր առևտրական ու գործարանային քաղաքը: Բնակիչների թւով յետ չէ մնում Մադրիդից:

Վայենսիա, Մալագա, Սերես.—այս քաղաքները գտնուում են փարթամ, արևստական կերպով ոռոգող այգիների և դաշտերի մէջ: Նշանաւոր են մրգեղէնի և գինու արտահանութեամբ:

Կաղիս—պատերազմական և առևտրական նաւահանգիստ է:

Սևիլիա—գործարանային քաղաք է և նաւահանգիստ՝ Գալալիւիւիի վրայ: Երբ գետը վարարում է՝ նրա վրայով մինչև Սևիլիա քաղաքն են գալիս ծովային փոքր նաւեր:

Գրանադա—Սիերրա-Նևադիայի ստորոտում, այգիների մէջ: Այդ տեղ է գտնուում Ալնամբրա կոչւած գեղեցիկ արքունիքը: Այս արքունիքը շինել են մաւրերը, արաբները, որոնք երկար ժամանակ (8-րդ դարից սկսած մինչև 15-րդ դարը) իշխում էին Պիրենէեան թերակղզում:

ՊՈՐՏՈՒԳԱԼԱՅԻ մայրաքաղաքն է՝ **Լիսաբոն** (300 հազ. աւելի բնակիչ). նշանաւոր նաւահանգիստ է Տախօ գետաբերանի մօտ, շատ լաւ նաւակայանով: Լիսաբոնում կանգ են առնում հիւսիս-արևմտեան Եւրոպայից դէպի Հարաւային Ամերիկա, Աֆրիկա, Ասիա (Միջերկրական ծովով) և Աւստրալիա գնացող նաւերը:

Լիսաբոնը միևնոյն ժամանակ եւրոպական երկաթուղային գծերի արևմտեան վերջին կէտն է: Հարաւային Ամերիկա և Հարաւային Աֆրիկա ուղղութեամբ սովորաբար երկաթուղով գնում են մինչև Լիսաբոն և այնտեղ նաւ նստում:

Օպորտօ—Դուէրօ՛ի գետաբերանին. նշանաւոր է գինու արտահանութեամբ:

Իսպանիայի և Պորտուգալիայի գաղութները հնումը ընդարձակ էին: Իսպանիային էին պատկանում ամբողջ Միջին Ամերիկան՝ Անտիլեան կղզիները հետ միասին, Հարաւային Ամերիկան (քացառութեամբ Բրազիլիայի), Ֆիլիպպեան կղզիները: Պորտուգալիային էին պատկանում՝ Բրազիլիան, Աֆրիկայի ծովափնեայ ընդարձակ երկիրներ, Հընդկաստանը, Սումատրան, Եւաան: Այս գաղութներից իսպանացիները և պորտուգալացիները ստանում էին մեծամեծ օգուտներ: Բայց նրանք չկարողացան իրենց ձեռքին պահել այդ գաղութները: Սրանցից մի քանիսը յամառ պատերազմներ մղելուց յետոյ կարողացան ազատութիւն ձեռք բերել և անկախ պետութիւններ դարձան. օրինակ՝ Մեքսիկան, Բրազիլիան և ընդհանրապէս Կենտրոնական և Հարաւային Ամերիկայի բոլոր հասարակապետութիւնները: Շատ գաղութներ էլ անցան հոլլանդացիների, անգլիացիների, ֆրանսիացիների և ամերիկա-

ցիւների ձեռքը: Ներկայումս Իսպանիային են պատկանում՝ միայն Կանարեան կղզիները և Մէուտա կղզին (Ջիբրալտարի նեղուցի աֆրիկական ափին): Պորտուգալիային են պատկանում՝ Մադէյրա, Ազորեան կղզիները և բաւական ընդարձակ գաղութներ՝ արեւդարձային Աֆրիկայում. բայց այս գաղութները պորտուգալացիների համար անօգուտ են, նրանց հետ առևտուր էլ անում են անգլիացիները:

Անգլիացիները իրենց ձեռքն են ձգել նոյն իսկ Պիրենէեան թերակղզու մի կէտը. նրանց է պատկանում Ջիբրալտար բերդը, որ լաւ ամրացրած է. իշխում է Ջիբրալտարի նեղուցի վրայ: Ստորոտում կայ նաւահանգիստ, ուր մտնում են նեղուցով անցնող անգլիական բազմաթիւ նաւեր: Ջիբրալտարը ահագին նշանակութիւն ունի անգլիացիների համար իբրև ամրոց. նա կաշող է փակել օտար նաւերի մուտքը դէպի Միջերկրական ծովը:

Իսպանիայի հիւսիսային կողմում, Պիրենէեան լեռների մէջ, գտնւում է ԱՆԴՈՐՐԱ կոչւող անկախ, բայց աննշան հասարակապետութիւնը, որ ունի $5\frac{1}{2}$ հազար բնակիչ և գտնւում է Իսպանիայի հովանաւորութեան տակ:

Փ Ր Ա Ն Ս Ի Ա

ԸՆԴՀԱՆՈՒՐ ՆԿԱՐԱԳՐՈՒԹԻՒՆ:— Փրանսիայի միայն երկու ծայրերում են բարձրանում լեռնաշղթաներ. արևելքում— Ալպերը՝ Իւրայի հետ, իսկ հարաւում— Պիրենէեան լեռները: Երկրի մնացած ամբողջ տարածութիւնը բռնում են կամ լեռնախմբեր, կամ ցածր հարթութիւններ:

Փրանսիայի ամենամեծ լեռնախումբը գտնւում է երկրի հարաւ-արևելեան կողմում և բարձրաւանդակի նմանութիւն ունի, $\frac{1}{2}$ վերստից աւելի բարձրութեամբ. դա կոչւում է Կենտրոնական-Փրանսիական բարձրաւանդակ: Փրանսիական բարձրաւանդակը դէպի արևմուտք աստիճանաբար ցածրանում է, իսկ դէպի հարաւ-արևելք բարձրանում է. սա կոչւում է Սևենն: Այս բարձրաւանդակը կտրուած է խոր հովիտներով, որոնցով հոսում են՝ Լուարա գետը, նրա վտակ Ալլիէ՛ն և այլն:

Բարձրաւանդակի վրայ մի քանի տեղ գտնւում են հանգած հրաբուխներ. մանաւանդ շատ են զբանք Օւերնի բարձրութեան վրայ. նըշանաւոր են՝ Մոն-Դոր և Պիուի-դը-Դոմ հրաբուխները: Թէպէտ Օւեր-

նիի բոլոր հրաբուխները վաղուց է արդէն, ինչ չեն գործում, բայց նրանցից շատերը լաւ պահպանել են իրենց խառնարանները (բերան)։ հրաբխային ժայթքումների հետքերը դեռ երևում են—նրանց լանջերին և ստորոտներին սառած գրութեան մէջ մնացել են լաւայի հեղեղներ, սրոնք դեռ ևս չեն ծածկւել հողով։ գետերի հովիտներում էլ, մանաւանդ Ալլիէի հովտում, շատ տեղ բլրում են հանրային տաք աղբիւրներ։

Որովհետև Կենտրոնական բարձրաւանդակը բաւական բարձր է և գտնուում է արևմտեան խոնաւաբեր քամիների ճանապարհին, ուստի և այնտեղ երկիրնքը ամպամած է, կլիման՝ խոնաւ, Չմեռը այնտեղ շատ ձիւն է գալիս, ամառն էլ զով է լինում և անձրևային։ Առաջ Կենտրոնական բարձրաւանդակի վրայ աճում էին փշատերև անտառներ, բայց նրանք համարեա բոլորն էլ արմատախիլ են արւած. այժմ նրանց տեղ տարածւում են մարգագետիններ և մացառուտներ։ Բոլորովին այլ է Լոււարա և Ալլիէ գետերի հովիտների բնութիւնը. այդտեղ կլիման տաք է, բուսականութիւնը՝ հարուստ. այդտեղ կան ընկուզենու և շագանակենու ամբողջ պուրակներ։

Մի ուրիշ լեռնախումբ բռնում է Փրանսիայի հիւսիսարևմտեան անկիւնը—Բրետան թերակղզին և Նորմանդիայի մի մասը։ Նա իր մեծութեամբ և բարձրութեամբ չէ կարող հասնել Կենտրոնական բարձրաւանդակին. ամենաբարձր տեղերում իսկ նա ծովի մակերևոյթից ընդամենը 200 սաժեն է բարձր, իսկ մեծ մասը՝ նոյնիսկ 100 սաժենից ցածր։ Նրա մակերևոյթը միակերպ է։ Բրետանի և Նորմանդիայի կլիման ծովային է։ Բրետանում աճում են մշտադալար ծառեր՝ մրտենի, դափնի, և եապոնական կամելիա. իսկ խաղող չի հասնում այնտեղ։ Պտղատու ծառերից լաւ հասնում է միայն խնձորենին։ Երկրագործութեամբ այնտեղ պարապել կարելի է, բայց աւելի լաւ աճում է խոտը. Բրետանի և Նորմանդիայի մարգագետինները բռնում են ընդարձակ տարածութիւններ և միշտ կանաչ են։

Փրանսիայի երրորդ լեռնախումբը—Վոզեզները բարձրաւում են Փրանսիայի և Գերմանիայի սահմանում։ Իր բարձրութեամբ այդ լեռնախումբը մի փոքր միայն յետ է մնում Կենտրոնական լեռնախմբից.

Ֆրանսիական դաշտավայրերը տարածւում են Կենտրոնական լեռնաշխարհի շուրջը՝ երեք կողմից: Դէպի հիւսիս տարածւում է Հիւսիսային-Ֆրանսիական դաշտավայրը (նա կոչւում է նաև Պարիզեան դաշտավայր, որովհետև մօտաւորապէս նրա կենտրոնում է գտնւում Պարիզ քաղաքը): Այդ դաշտավայրով են հոսում հետևեալ գետերը—Սոմմա, Սենա, և Լուարա: Պարիզեան դաշտավայրի հողը արգաւանդ է: Կլիման համարեա այնպէս մեղմ է, ինչպէս Բրետանում, բայց համեմատաբար աւելի չոր և տաք: Սա Ֆրանսիայի ամենաբերրի մասն է. այդտեղ շատ լաւ աճում են ցորեն և բազուկ, իսկ հարաւային կողմում՝ նաև խաղող ու շաքարի ճակնդեղ:

Պարիզեան դաշտավայրը արևելեան կողմում աստիճանաբար բարձրանում է և աննկատելի կերպով բարձրաւանդակ դառնում. այդտեղ են ընկնում Լօտարինգիայի և Լանզր բարձրաւանդակները. դրանց վրայ տարածւում են կաղնու փարթամ անտառներ:

Կենտրոնական լեռնաշխարհից դէպի արևմուտք տարածւում է Գարոննայի դաշտավայրը: Սրա մէջտեղով հոսում է Գարոննա գետը: (Գարոննայի գետաբերանը մակընթացութեան և տեղատուութեան շնորհիւ լայնացել է և կոչւում է Ժիրոնդ): Գարոննայի դաշտավայրի կլիման մեղմ է և տաք. այդտեղ հասնում են ոչ միայն ցորեն և խաղող, այլ և եգիպտացորեն ու դեղձ: Այդտեղ պատահում են մշտադալար ծառերի մի քանի տեսակներ, օրինակ՝ խցանակաղնի: Գարոննայի դաշտավայրը մեծ մասով շատ բերրի է:

Կենտրոնական լեռնաշխարհից դէպի արևելք, նրան Իւրալից և Ալպերից բաժանող մի հովտի մէջ ընկնում է Ռոնայի դաշտավայրը: Այդտեղով է հոսում Սոննա գետը, (Ռոնայի վտակ), իսկ յետոյ՝ Ռոնա գետը: Ռոնայի դաշտավայրը հարաւային կողմից բաց է. այս պատճառով այդ հարթութեան նոյն իսկ հիւսիսային կողմում, Սոննայի ափերին, կլիման այնքան մեղմ է, որ այնտեղ շատ լաւ աճում են խաղող և եգիպտացորեն. իսկ այդ նոյն դաշտավայրի հարաւում կլիման մերձարեւադարձային է: Այդտեղ աճում են մշտադալար թփեր և ծառեր, որոնցից առանձին նշանակութիւն ունի ձիթենին:

Ֆրանսիական Ալպերը բաղկացած են շատ լեռնաշղթա-

ներից, որոնք գոյացել են բիւրեղացած (արևելեան կողմում) և կրաքարային (նրանցից արևմուտք) տեսակներից: Ֆրանսիական Ալպերի ամենաբարձր գագաթն է՝ Մոնբլան (ծովի մակերևոյթից $4\frac{1}{2}$ վերստ բարձր): Իւրա լեռնաշղթան ևս կրաքարային ծագում ունի:



Նկ. 33. Մոնբլան լեռան օեստրան՝ Շամունի գիւղից: Արձան է յիշատակ գիտնական Սոսիւրի և Բալմա ուղեցոյցի, որը առաջին անգամ բարձրացաւ Մոնբլանի գագաթը և յետոյ ցոյց տւեց Սոսիւրին ճանապարհը:

Ֆրանսիայի հարաւային կողմում, իսպանական սահմանի վրայ, բարձրանում են Պիրենէեան լեռները. սրանց՝ դէպի Ֆրանսիա նայող լանջերը ծածկւած են մարգագետիններով և անտառներով, մինչդեռ իսպանական լանջերը լերկ են:

Ֆրանսիայի բնակիչների թիւն է՝ 39 միլիոն: Ազգաբնակութեան ամենամեծ մասը կազմում են ումանական ցեղին պատկոնող ֆրանսիացիները. սրանց լեզուն, ֆրանսերէնը, ունի երկու գլխաւոր բարբառ—հիւսիսային և հարաւային: Հիւսիսային բարբառն է դարձել ֆրանսիական զրական լեզու:

Ֆրանսիայի միայն ծայրերում ապրում են նաև ուրիշ ազգութիւններ, բայց փոքր չափով. հարաւ-արևելեան կողմում—իտալացիներ.

հիւսիս-արևելեան կողմում—Ֆլամանդցիներ (գերման ժողովուրդ), հիւսիս-արևմուտքում—բրետոնցիներ (թւով 1 միլիոն. սրանք մնացորդներ են մի հին ժողովրդի, կելտերի, որոնք առաջ գրաւել էին Ֆրանսիայի և Գերմանիայի մի խոշոր մասը). հարաւ-արևմտեան կողմում ապրում են քսակեր (հին իրերական ժողովրդի մնացորդներ, թւով 100 հազար):

ՖՐԱՆՍԻԱՅԻՆԵՐԻ ԶԲԱՂՄՈՒՆՔՆԵՐԸ ԵՒ ԿԵԱՆՔԸ:—

Ֆրանսիան նախ և առաջ երկրագործական երկիր է: Բնակիչների կէսը իր աշխատանքը հողի վրայ է թափում, գլխաւորապէս հողից է ստանում իր ապրուստի միջոցները: Ֆրանսիայի ամբողջ տարածութեան կէսից աւելին ծածկւած է արտերով և այգիներով¹⁾: Առանձնապէս խնամքով է մշակւած Հիւսիսային Ֆրանսիական դաշտավայրը: Երբ մարդ ամառւայ վերջին անցնում է այդ դաշտավայրով՝ նրա առաջ փուռում են ցորենի ոսկեգոյն-գեղնաւուն ընդարձակ արտեր, որոնց մէջ բազմաթիւ գիւղացիներ խումբ-խումբ աշխատում են և հնձում արտերը: Յորենի հունձը միշտ էլ առատ է լինում: Բացի ցորենից՝ Հիւսիսային Ֆրանսիական դաշտավայրում մշակում են նաև՝ վարսակ, խոտաբոյսեր, բազուկ, որոնցով գիւղացիները կերակրում են իրենց ձիերին և կաթնատու կենդանիներին: Ապա՝ այդ դաշտավայրում ցանում են մեծ քանակութեամբ ճակնդեղ, որից այնչափ շաքար են պատրաստում, որ ոչ միայն ամբողջ Ֆրանսիային է բաւականութիւն տալիս, այլ մի մասն էլ ուրիշ երկիրներ են արտահանում:

Սենա, Լուարա գետերի և նրանց վտակների հովիտներում անընդհատ տարածւում են այգիներ. այդ այգիներում աճուք են՝ խնձորենի, կեռասենի և խաղողի որթ: Եկամտի մեծ աղբիւր է հանդիսանում զինեգործութիւնը, որ առանձնապէս զարգացած է Սենա գետի վտակ Մարնայի հովտում—Շամպայն նահանգում: Այստեղ պատրաստում են աշխարհահռչակ շամպայն գինին:

Շատ լաւ է մշակւած նաև Գարոննայի դաշտավայրը: Այդ-

¹⁾ Եւրոպայի և ոչ մի ուրիշ պետութեան մէջ մշակւած հողերը այդչափ մեծ տարածութիւն չեն բռնում:

տեղի տաք կլիման թոյլ է տալիս մշակել ոչ միայն ցորեն, այլ նաև եգիպտացորեն: Այգիներից մեծ քանակութեամբ ստացւում են՝ դեղձ և սալոր: Պաղոզի այգիները այդտեղ աւելի ևս մեծ տեղ են բռնում, քան Հիւսիսային Ֆրանսիական դաշտավայրում: Գարոննայի ափերին տարածւող այգիներից ստացւող զինին, որ յայտնի է Բորդօ գինի անունով, շատ է հռչակւած շամպայնի հետ միասին:



Նկ. 34. Խաղողի այգիներ Շամպայնում:

Աւելի մեծ տարածութիւններ են բռնում խաղողի այգիները Ռոնայի դաշտավայրի հարաւային մասում: Այնչափ առատութեամբ զինի է արտադրւում այնտեղ, որ զինեգործները երբեմն դժւարութեամբ են կարողանում ամբողջը վաճառել *): Բացի խաղողի որթից՝ Ռոնայի հարթութեան հարաւային կողմում մշակւում են նաև մեծ քանակութեամբ ձիթենի և թթենի: Զիթապտղից ստացւում է ընտիր ձէթ, որ Պրովանս նահանգի անունով «Պրովանսի ձէթ» է կոչւում և լաւ հռչակ ունի: Թրթենու տերևներով կերակրւում են շերամի որդերին: Ռիվիերայում, այսինքն Միջերկրականի ծովափնեայ մասում, Ալպերից դէպի հարաւ, ահագին քանակութեամբ բազմազան

*) Գինու արտադրութեամբ Ֆրանսիայի հետ մրցում է միայն Իտալիան:

ծաղիկներ են աճում—վարդ, մեխակ, յասմիկ և այլն: Այս ծաղիկներից պատրաստում են անուշահոտ իւղեր (դուխիներ):



Նկ. 35. Տեսարան Ռիվիերայում:

Փրանսիայի լեռնախմբերը անյարմար են երկրագործութեան համար, որովհետև դեռինը քարքարոտ է, կլիման էլ՝ չափից աւելի խոնավ: Այդտեղի բնակիչները զբաղւում են գլխաւորապէս անասնաբուծութեամբ:

Բրետանը և նրա հարևան Նորմանդիան հարուստ են հիւթաշատ մարզագետիններով, ուստի և Փրանսիայի այդ մասերում ծաղկում է կաթնասնտեսութիւնը: Բազմացնում են նաև թէ բեռնակիր և թէ արագավազ ընտիր ձիեր:

Այդտեղ մշակւում են նաև պողատու ծառերի, յատկապէս խնձորենու այգիներ:

Կենտրոնական լեռնաշխարհի ամենալաւ մասերը խոր գետահովիտներն են: Գետափերին տարածւում են շատ այգիներ և շագանակի պուրակներ. շագանակը խեղճ գիւղացիները գործ են ածում հացի փոխարէն: Իսկ Կենտրոնական լեռնաշխարհի բարձր սարահարթերը ամայի են. ձմեռը այդտեղ ձիւնը երկար ժամանակ նստած է մնում, գարնանը հովիւները այդտեղ են քշում հովիտներից ոչխարի աճազին հօտեր և այդտեղ արածացնում են մինչև աշուն. ոչխարի կաթից պատրաստում են ընտիր պանիր:

Անասնաբուծութիւնն է նաև Ալպերի ու Պիրենէեան լեռների բը-
նակիչների գլխաւոր զբաղմունքը:

Փրանսիայի ափերը ողողող ծովերը հարուստ են ձկներով,
ուստի և ծովափնեայ բնակիչների համար, մանաւանդ Բրետա-
նում, ձկնորսութիւնը ապրուստի կարևոր օժանդակ միջոց է
համարուում:

Փրանսիայի ամենալաւ ձկնորսները, զրա հետ միասին նաև ա-
մենափորձեալ ծովագնացները՝ բրետոնցիներ են: Սրանք մեծ առագաս-
տանաւերով մտնում են Գերմանական ծովը, հասնում են Իսլանդիայի
մօտերը, որտեղ նրանք բռնում են մեծ քանակութեամբ ձուկ: Նրանք
նաւում են նոյն իսկ Ատլանտեան օվկիանոսով, զէպի Նիու-Փաունդ-
լենդի ափերը:

Հանքագործութիւնը Փրանսիայում կարևոր զբաղմունքնե-
րից է: Գերմանիայի սահմանի մօտ գտնուում են հարուստ եր-
կաթահանքեր, իսկ Բելգիայի սահմանի մօտ—քարածուխի հան-
քեր: Երկաթ և քարածուխ ստացւում են նաև Կենտրոնական
լեռնաշխարհում, Լուարայի և Ալպիէի հովիտներում: Այն վայ-
րերում, որտեղ ստացւում է քարածուխ և երկաթ, այնտեղ էլ
զարգացած է մշակողական արդիւնագործութիւնը: Փրանսիայում
գործարաններ շատ կան, որոնք պատրաստում են այն բո-
լորը, ինչ անհրաժեշտ է Ֆրանսիացիներին—զանազան գործ-
ւածքներ, մեքենաներ, յախճապակէ ամաններ և այլն: Գոր-
ծարանային շատ ապրանքներ արտահանւում են Փրանսիայից
ուրիշ երկիրներ: Մեծ հռչակ ունեն Փրանսիայում պատրաս-
տած մետաքսէ գործւածքները և արդուզարդի ու մոզայի
բազմատեսակ առարկաները: Փրանսիական ապրանքներն ընդ-
հանրապէս աչքի են ընկնում իրենց նրբութեամբ, ճաշակով և
չքեղութեամբ: Արտաքին առևտրի շրջանառութեամբ Փրան-
սիան յետ է մնում միայն Անգլիայից, Գերմանիայից և Միա-
ցեալ-Նահանգներից:

1905 թւականին արտաքին առևտրի շրջանառութիւն ունեցել են.		
Անգլիան (առանց գաղութների).	.	9.187.000.000 ուռբ.
Գերմանիան	6.273.000.000 »
Միացեալ-Նահանգները	5.126.000.000 »
Փրանսիան	4.580.000.000 »
Հոլլանդիան.	3.584.000.000 »
Բելգիան ,	3.425.000.000 »
Ռուսաստանը.	1.712.000.000 »

Ճանապարհների հաղորդակցութիւնը Ֆրանսիայում շատ զարգացած է: Բացի երկաթուղային գծերի խիտ ցանցից՝ ամենուրեք կան յարմարաւոր խճուղիներ: Ֆրանսիական գետերը մեծ չեն, ուստի և յարմար չեն նաւարկութեան համար. բայց Ֆրանսիացիները խորացրել են այդ գետերը և միացրել իրար հետ բազմաթիւ ջրանցքներով:

Նշանաւոր են հետեւեալ ջրանցքները.— Բուրգունդական, որ միացնում է Սենա գետը Ռոնայի վտակ Սոննայի հետ. Կենտրոնական ջրանցք, որ միացնում է Լուարա գետը կրկին Սոննայի հետ. Հարաւային ջրանցք, որ միացնում է Գարոննան Ռոնայի և Միջերկրական ծովի հետ:

Ֆրանսիայի ծովային նաւատորմը բաւական մեծ է. Ֆրանսիական նաւերը լողում են դէպի հեռաւոր երկիրներ:

Վերջին ժամանակներում Ֆրանսիայի արդիւնագործութեան, առևտրի և ճանապարհների հաղորդակցութեան մէջ նկատելի է ոչ-բաւարար առաջադիմութիւն, — մինչդեռ ուրիշ երկիրներ, մանաւանդ Անգլիան և Գերմանիան, աւելի ու աւելի առաջադիմում են: Այս դրութեան գլխաւոր պատճառը այն է, որ Ֆրանսիային բաւականութիւն չէ տալիս հայրենի երկրից ստացւող քարածուխը, որ անհրաժեշտ է գործարանների, երկաթուղիների և շոգենաւերի համար. ուստի և Ֆրանսիացիները ստիպւած են մեծ քանակութեամբ քարածուխ գնել Անգլիայից, Բելգիայից և Գերմանիայից:

Ալպերում և Վոգեզներում շատ գործարաններ բանում են լեռնային գետերի և գետակների օգնութեամբ. բայց այդ լեռները գտնւում են ծայրագաւառներում, գլխաւոր քաղաքներից հեռու:

Միւս պետութիւնների հետ մրցելուն արգելք է հանդիսանում և այն, որ Ֆրանսիայի ազգաբնակչութիւնը վերջին ժամանակներում շատ դանդաղ է աճում: Այդ երկրում ծնւում են համարեա այն թւով մարդիկ, ինչ թւով որ վախճանւում են. լինում են նոյնիսկ տարիներ, երբ մեռածների թիւը աւելի է ծնւածների թւից: Մինչդեռ Եւրոպայի մնացած բոլոր պետութիւնների ազգաբնակչութիւնը անընդհատ և արագ կերպով աճում է:

Վերջին ժամանակներում Ֆրանսիայի ազգաբնակչութիւնը մէկ տարւայ ընթացքում աւելանում է հազիւ 60.000 հոգով, իսկ Գերմանիայում—800.000-ով:

1872 թւականին ունէին՝	իսկ 1908 թւին ունէին՝
Ֆրանսիան 36 միլ. բնակիչ	Ֆրանսիան 39 միլ. բնակիչ
Անգլիան 33 » »	Անգլիան 45 » »
Գերմանիան 42 » »	Գերմանիան 63 » »

Ֆրանսիացիները ընդհանրապէս հարուստ են, բարեկեցիկ ապրուստ ունեն: Ֆրանսիական գիւղացիները ունենում են ոչ միայն սեփական հող, տուն և անասուններ, այլ նաև բաւական փող: Նրանք այդ փողերը խնայողական դրամարկղ կամ բանկ են զցում, իսկ սրանք էլ իրենց կողմից այդ փողերը պարտք են տալիս ուրիշ պետութիւնների: Ֆրանսիական ահագին դրամագլուխներ դրւած են օտարերկրեայ զանազան ձեռնարկութիւնների մէջ:

Ֆրանսիացիները աշխատասէր, խնայող և հաշուով մարդիկ են: Դարերից ի վեր մեծ հարստութիւններ են դիզել Ֆրանսիայում և ժառանգութիւն թողնել սերունդէ սերունդ:

Ժողովրդական կրթութիւնը Ֆրանսիայում քարձր է: Տարրական, միջնակարգ և բարձրագոյն դպրոցներ այնտեղ շատ կան: Ֆրանսիական գիտնականները և գրողները համաշխարհային հռչակ ունեն: Ֆրանսերէն շատ զրքեր թարգմանւում են եւրոպական բոլոր լեզուներով: Սակայն ժողովրդական կրթութեան մէջ ևս վերջերս գերմանացիները Ֆրանսիացիներից աւելի առաջ են անցնում: Ֆրանսիայում 1000 նորակոչ զինւորներից անգրագէտ են դուրս գալիս 35 հոգի, իսկ Գերմանիայում—3000 հոգուց միայն 1-ը:

Թէև տարրական կրթութիւնը Ֆրանսիայում պարտադիր է, բայց զլիաւորապէս շնորհիւ այն հանգամանքի, որ կաթոլիկ հոգևորականութեան ձեռքին էր գտնւում մինչև վերջերս դպրոցների մի խոշոր մասը, անգրագէտներ դեռ կան Ֆրանսիացիների մէջ:

ՊԵՏԱԿԱՆ ԿԱԶՄԸ ԵՒ ՔԱՂԱՔՆԵՐԸ:— Ֆրանսիան հասարակապետութիւն է: Երկրի համար օրէնքներ հրատարակելու իրաւունքը պատկանում «Ազգային ժողովին» (պարլամենտ)

տին), որ բաղկացած է օրէնսդրական երկու հաստատութիւնից (պալատից). 1. «պատգամաւորների ժողով», որի անդամներին ընտրում է ամբողջ ժողովուրդը 4 տարով, 2. «սենատ» (ժեռակոյտ), որի անդամներն ընտրւում են 9 տարի ժամանակով՝ առանձին յանձնաժողովներէ կողմից: Պետութեան ներկայացուցիչ հանդիսանում է հասարակապետութեան նախագահը, որին ընտրում է «Ազգային ժողովը»՝ 7 տարով: Հասարակապետութեան նախագահն է յարաբերութիւն պահպանում օտար պետութիւնների հետ, նա է նշանակում մինիստրներին, որոնք կառավարում են երկիրը և պատասխանատու են ժողովրդական ներկայացուցիչներէ (պարլամենտի անդամների) առաջ: Մինիստրները իրենց պաշտօնում մնալ կարող են միայն այնչափ ժամանակ, քանի դեռ վայելում են պարլամենտի վստահութիւնը. հակառակ դէպքում նրանք պարտաւոր են հրաժարւել:



Նկ. 36. Պարիզեան սենատան (յետևում երևում է Էյֆելեան աշտարակը):

Ֆրանսիայի մայրաքաղաքն է՝ Պարիզ (Իլ-դը-Ֆրանս նահանգում): Պարիզը Ֆրանսիայի սիրտն է: Այդտեղ է գտնուում պարլամենտը, այդտեղ է նստում հասարակութեան նախագահը: Պարիզը հսկայական, համաշխարհային քաղաք է, ունի մօտ 3 միլիոն բնակիչ. մեծութեամբ Պարիզը յետ է մնում միայն

ձոնդոնից և Նիու-Յորկից: Պարիզը գտնուում է Փրանսիական դաշտավայրի կենտրոնում, Սենա գետի և նրա վտակ Մարնայի խառնարանի մօտ: Պարիզը միացած է Փրանսիայի բոլոր մասերի հետ երկաթուղիներով, գետերով ու ջրանցքներով: Ոչ մի պետութեան մէջ մայրաքաղաքը չունի այն մեծ նշանակութիւնը, ինչ որ Պարիզը՝ Փրանսիայի համար: Պարիզում են գտնուում ոչ միայն պետական գլխաւոր հաստատութիւնները, այլ և այնտեղ են կենտրոնացած դպրոցական ամենալաւ հաստատութիւնները, գրադարանները, թանգարանները, պատկերասրահները և թատրոնները: Պարիզում է գտնուում Ֆրանսիական ամենալաւ համալսարանը, այնտեղ են հրատարակուում Ֆրանսերէն ամենայայտնի գրքերը, հանդէսները և լրագիրները: Այնտեղ է կենտրոնացած Փրանսիայում պատրաստուած ամեն տեսակ ապրանքների առևտուրը: Բացի գրանից՝ Պարիզում քաղմագան գործարաններ և արհեստանոցներ աւելի շատ կան, քան թէ Ֆրանսիական որևէ ուրիշ քաղաքում: Այս ամենի պատճառով էլ իրենց խելքով և ընդունակութեամբ աչքի ընկնող բոլոր Ֆրանսիացիները ձգտում են դէպի Պարիզ, որպէս զի այնտեղ գործադրեն իրենց ոյժերը: Այս հանգամանքը օգուտ է բերում մայրաքաղաքին, բայց վնաս է գաւառական քաղաքների համար:

Պարիզը տարածուում է Սենա գետի երկու ափերին, որոնք միացած են իրար հետ բազմաթիւ կամուրջներով: Քաղաքի ամենահին մասը գտնուում է կենտրոնում, մի փոքր կղզու վրայ: Այդտեղ է գտնուում «Աստուածամօր Պարիզեան մայր եկեղեցին» (Notre Dame de Paris).

Քաղաքի ամենաեռուն փողոցները գտնուում են Սենայի աջ ափին: Այդտեղ վաղ առևտուրից սկսած մինչև ուշ գիշեր երթևեկում են բազմաթիւ կառքեր, աւտոմոբիլներ, էլեքտրաքարշեր և այլն: Պարիզում կայ նաև ստորերկրեայ էլեքտրաքարշ: Երկար շարքերով ձգուում են շքեղ խանութներ. կան այնպիսի մեծ վաճառատներ, որոնք ամբողջ շէնքեր են գրաւում և ունեն հարիւրաւոր, նոյնիսկ հազարաւոր գործակատարներ: Այդտեղ են կենտրոնացած նաև քաղաքի թատրոնները, սրճարանները, որոնք երեկոները շատ լաւ լուսաւորուում են և լիքը լինում ժամանակ անցկացնող հասարակութեամբ: Սենայի աջ ափին է գտնուում նաև Լուվրը. սա մի մեծ արքունիք է, որտեղ առաջ ապրում



Նկ. 37. Լուվրի բանգարանը Պարիզում:

էին Ֆրանսիայի թագաւորները. իսկ այժմ այդտեղ են գետեղւած գանազան թանգարաններ և պատկերասրահներ:

Սենայի ճակապիտակն են Կոնստանտինոպոլի սենատը, պատգամաւորների ժողովը, համալսարանը, համարեա մնացած բոլոր բարձրագոյն դպրոցները, որոնք կենտրոնացած են այսպէս կոչւած «Լատինական թաղում»։ Այդտեղ բնակուում են բազմաթիւ ուսանողներ, որոնց թւում նաև շատ օտարերկրացիներ։ Այդտեղ է գտնուում Մարսեան դաշտը, որտեղ կազմակերպուում են համաշխարհային ցուցահանդէսներ. այդտեղ է աշխարհի սամնարարձր աշտարակը—«Էյֆելեան աշտարակը» (150 սաժէն բարձր)։ Այդ աշտարակի կատարից լղիտողի առջև տարածուում է ամբողջ Պարիզը՝ մինչև 50 վերստ շրջակայքով։ Այնտեղից երևում են քաղաքի գործարանային արւարձանները, այգիները, ընդարձակ պարկերը։

Պարիզի արւարձաններից նշանաւոր են՝ Վերսալ—շքեղ այգիներով և արքունիքներով, Սելը՝ պետական յախճապակէ գործարանով։

Որովհետև Պարիզի նշանակութիւնը Ֆրանսիայի համար վերին սատիճանի մեծ է, ուստի և նա շատ լաւ ամրացրած է. քաղաքը շրջապատուած է խրամատով և բերդապարիսպով։ Բացի դրանից՝ պաշտպանուած է բազմաթիւ մարտկոցներով։

Հաւր—նաւահանգիստ է Սենայի գետաբերանի մօտ։

Այդ նաւահանգիստը նշանաւոր է իր հաղորդակցութեամբ՝ Անգլիայի, Գերմանիայի և Մեացեալ-Նահանգների հետ։

Ռուան—գործարանային քաղաք է և նաւահանգիստ Սենայի վրայ։

Լիլ—գործարանային մեծ քաղաք է Բելգիական սահմանի մօտ՝ քարածուխի հարուստ հանքերով։ Նշանաւոր է ճոթեղէն

արդիւնագործութեամբ և մետաղաձուլական գործարաններով:

Ռէյմս—Շամպայն նահանգում, նմանապէս գործարանա-
յին քաղաք է:

Ռէյմսը կենտրոն է շամպայն գինու առևտրի: Այդ գինին մեծ
չափերով պատրաստում է քաղաքի շրջակայքում և պահում է գետ-
նի տակ փորած հսկայական նկուղներում. կան մինչև 13 վերստ եր-
կայնութիւն ունեցող նկուղներ:

Րուլոն և Կալէ.—այդտեղով են երթեկում Անգլիա:

Կալէից մինչև Դուվը նաւահանգիստը (Անգլիա) շոգեմաւր գնում է
ընդամենը մէկ և կէս ժամում:

Շերբուրգ—պատերազմական նաւահանգիստ է:

Բրեստ—նմանապէս պատերազմական նաւահանգիստ է.
ունի նաւաշինարաններ, որտեղ պատրաստում են զրահակիր նա-
ւեր, մարտանաւեր և պատերազմական ուրիշ նաւեր:

Նանտ—նաւահանգիստ է Լուարայի գետաբերանի մօտ:

Բորդօ—նաւահանգիստ է ժիրօնդի վրայ, մակընթացու-
թեան շնորհիւ մատչելի է ովկիանոսային նաւերի համար: Այդ-
տեղ է կենտրոնը «բորդօ» գինու արտադրութեան և առևտրի:

Տուլուզա—Գարօննայի և «Հարաւային ջրանցքի» միացման տե-
ղում: Մոնպելիէ—Միջերկրականի ափին: Դրանք հարաւային Փրան-
սիայում արդիւնագործական նշանաւոր քաղաքներ են, ունեն համալ-
սարան:

Լիոն—մեծ քաղաք է (մօտ 500 հազար բնակչով). գտըն-
ւում է Ռոնա գետի և նրա վտակ Սոննայի խառնարանի մօտ:
Ոչ միայն Փրանսիայում, այլ նաև ամբողջ աշխարհում մե-
տաքսագործութեան ամենանշանաւոր կենտրոնն է:

Կրեզօ—«Կենտրոնական ջրանցքի» վրայ, մետաղաձուլա-
կան հսկայական գործարանով:

Այդ գործարանում պատրաստում են՝ շոգեմեքենաներ, ուրիշ
տեսակ մեքենաներ, թնդանօթներ, զրահներ՝ պատերազմական
նաւերի համար և նոյնիսկ ամբողջ ականանաւեր, որոնք ջրանցքով
ծովն են դուրս գալիս:

Սան-էտիէն—Լուարայի հովտում, քարածուխի հանքերի մերձա-
կայքում, արդիւնագործական քաղաք է, նշանաւոր է մեքենաների և
զէնքի արդիւնագործութեամբ:

Վիլի—բուժավայր (կուրօրտ) է Ալլիէ գետի վրայ, ունի
հանքային տաք աղբիւրներ:

Մարտէյլ—իր մեծութեամբ Ֆրանսիայի երկրորդ քաղաքն է (ունի 500 հազարից աւելի բնակիչ): Նշանաւոր նաւահանգիստ է՝ հաղորդակցութիւն պահպանելու համար Ասիայի և Աֆրիկայի հետ:

Տուլոն—պատերազմական նաւահանգիստ է Միջերկրական ծովի ափին:

Նիցցա—բուժավայր է Ռիվիերայում—Միջերկրականի ծովափին:

Հիւսիսային քամիներից պաշտպանւած է լեռներով. շրջապատւած է փարթամ ծաղկանոցներով և մշտադալար ծառերի այգիներով:

Ձմեռ ժամանակ, երբ աւելի հիւսիս բնկնող երկիրներում ցուրտ և խոնաւ է լինում, այդտեղ, Ռիվիերայում, սովորաբար եղանակը լինում է տաք, պայծառ: Այս պատճառով էլ ձմեռը այդտեղ են գալիս շատ հարուստներ և հիւանդներ՝ ոչ միայն Ֆրանսիայից, այլ նաև ուրիշ երկիրներից:

Նիցցայից ոչ-հեռու գտնւում է ՄՈՆԱԿՕ կոչւող անկախ, բայց աննշան իշխանութիւնը ($1\frac{1}{2}$ քառ. մերստ տարածութեամբ և 15,000 բնակիչներով): Մոնակոն յայտնի է նրանով, որ այնտեղ, ծովափին, գտնւում է Մոնտէ-Կարլօն, թղթախաղի յայտնի տնով: Մոնակոն իր գոյութիւնը պահպանում է զլիսաւորապէս թղթախաղից ստացւող եկամուտով:

ՅՐԱՆՍԻԱՅԻ ԿԱԼԻԱՄՆԵՐԸ:—Եւրոպայում Ֆրանսիային պատկանում է Կորսիկա կղզին, որ իր բնութեամբ նման է Սարդինիային. բնակիչներն են՝ իտալացիներ:

Միւս աշխարհամասերում Ֆրանսիային են պատկանում բազմաթիւ գաղութներ. դրանք բոլորը միասին իրենց տարածութեամբ Ֆրանսիայից տասն անգամ մեծ են:

Աֆրիկայում գտնող ֆրանսիական գաղութներից նշանաւոր են—Ալժիր, Թունիս, Սուդանի մի մասը և Մադագասկար:

Ասիայում—Հնդկաչինի արևելեան մասը:

Ամերիկայում—Գլխանայի մի մասը և Մարտինիկա կղզին:

Աստրալիայում—Նոր-Կալեդոնիա և Տայիթի:

Իր գաղութների հետ Ֆրանսիան պահպանում է առեւտրաւական սերտ կապ. այնտեղ է ուղարկում իր գործարանային

ապրանքները և այնտեղից արտահանում է հում նիւթեր ու սը-
նընդի միջոցներ:

Ալժիրից արտահանում են՝ գինի, պրովանսի ձէթ, բանջարեղէն,
որ այնտեղ աւելի շուտ է հասնում քան Փրանսիայում: Սուդանից
արտահանում են—արմաւի ձէթ, կաուչուկ. Մադագասկարից—բամբակ
և համեմունքներ. Հնդկաստանից—բրինձ, և այլն:

Շատ ֆրանսիացիներ գաղթում են Ալժիր և Թունիս ու բնակու-
թիւն հաստատում այնտեղ, կազմելով ազգաբնակութեան տիրապետող
գասակարգը:

Բ Ե Լ Պ Ի Ա

ԸՆԴՀԱՆՈՒՐ ՆԿԱՐԱԳՐՈՒԹԻՒՆ:—Իր բնութեամբ Բելգիան
բաժանւում է երկու մասի—հիւսիսային և հարաւային: Հիւ-
սիսային Բելգիան հարթ է: Գերմանական ծովի ափերին տա-
րածւում են մի շարք դիւններ (աւազաթմբեր), որոնք սկսւում
են Փրանսիայում, Պա-դը-Կալէի մօտ, և շարունակւում են Հոլ-
լանդիայում: Դիւնների յետևում տարածւում են մարգագե-
տիններ, իսկ աւելի հեռւում՝ բլրաշատ հարթութիւններ: Այդ
հարթութիւնները արգաւանդ են:

Հիւսիսային Բելգիայով է հոսում Շելդա գետը:

Հարաւային Բելգիան լեռնոտ է. այդ մասում են տա-
րածւում Արդենները, որոնք ներկայացնում են ընդարձակ
լեռնաշխարհ: Արդենները բարձրաւանդակի նմանութիւն ունեն,
կարտած են խոր գետահովիտներով: Թէպէտ Արդենները բար-
ձրը չեն (ամենաբարձրը՝ 300 սաժէն), բայց միշտ ամպերով
են պատած լինում, որովհետև ընկնում են արևմտեան խո-
նաւաբեր քամիների առաջ: Արդենները ծածկւած են անտառ-
ներով, մարգագետիններով և մացառուտներով: Արդենների
հիւսիսային ստորոտների մօտ, երկրի խորքում, գտնւում են
քարածուխի և երկաթի ընդարձակ հանքեր, որոնք կազմում են
Բելգիայի բնական հարստութիւնը:

Բելգիայում ապրում են 7 միլիոնից աւելի մարդիկ ¹⁾:

¹⁾ 1 միլիոնով աւելի, քան Եւրոպական Թիւրքիայում, որ Բելգի-
այից 6 անգամ մեծ է իր տարածութեամբ:

Մէկ քառակուսի վերստի վրայ Բելգիայում միջին հաշուով ապրում են 250 հոգի: Ազգաբնակչութեան խտութեամբ Բելգիան ամբողջ երկրագնդի վրայ առաջին պետութիւնն է:

Բելգիայի բնակիչներն են՝ հիւսիսում—Ֆլամանդացիները, իսկ հարաւում—վալոնները: Ֆլամանդացիները գերման ժողովուրդ են, խօսում են հոլլանդերէնին նման լեզուով. իսկ վալոնները սումանական ժողովուրդ են, ֆրանսիացիներին ցեղակից և խօսում են ֆրանսերէն լեզուով: Թէ ֆլամանդացիները և թէ վալոնները կաթոլիկ են ¹⁾:

ԲԵՆԼԳԻԱՅԻՆՆԵՐԻ ԶԲԱՂՄՈՒՆՔՆԵՐԸ ԵՒ ԿԵԱՆՔԸ:—Բելգիացիները գլխաւոր զբաղմունքներն են, մանաւանդ հարաւային մասում, հանքագործութիւնը և գործարանային արդիւնագործութիւնը: Բարածուխի արտադրութիւնը Բելգիայում սկսել է շատ վաղուց, — աւելի շուտ, քան Եւրոպայի մի ուրիշ երկրում: Դարերի ընթացքում շատ քարածուխ են փորել-հանել այդտեղ. չնայելով դրան՝ Բելգիայում քարածուխի արտադրութիւնը այժմ էլ շարունակուում է ահագին չափերով, միայն թէ հանքահորերը (շախտաները) աւելի ու աւելի խորանում են. նրանցից մի քանիսը հասել են մինչև 1¹/₂ վերստ խորութեան—ծովի մակերևոյթից աւելի քան 1 վերստ ցածր. դրանք երկրագնդի ամենախոր հանքահորերն են:

Բացի քարածուխից՝ Բելգիայում ստացւում է նաև մեծ քանակութեամբ երկաթ: Եւ ահա, շնորհիւ երկաթի ու քարածուխի առատութեան՝ փոքրիկ Բելգիան դարձել է Եւրոպայի արդիւնագործական առաջնակարգ երկիրներից մէկը: Առանձնապէս զարգացած է այնտեղ մեքենագործութիւնը, հրազէններ, ապակեայ ամանեղէն և ճոթեղէն պատրաստելը:

Գիւղատնտեսութիւնը Բելգիայում երկրորդական նշանակութիւն ունի. բայց այդ զբաղմունքն ևս օրինակելի կերպով է առաջ տարւում: Հողը ամեն տեղ, բացի Արդեններից, խնամ-

¹⁾ Բելգիայի ազգաբնակչութեան 55 տոկոսը ֆլամանդացիներ են, 45 տոկոսը՝ վալոններ: Սակայն վերջիններս առաջիններից աւելի բարձր են իրենց մտաւոր կարողութիւններով և առաջադիմութեամբ: Պետական լեզուն էլ ֆրանսերէնն է:

քով է մշակում և տալիս է ցորենի, ճակնդեղի ու կտաւատի առատ հունձ: Ճակնդեղից պատրաստում են շատ շաքար: Խոնավ տեղերում բելգիացիները մշակում են գլխաւորապէս խոտաբոյսեր և բազմացնում են ձիեր ու կովեր: Բելգիական բեռնակիր ձիերը հուշակած են ամբողջ Եւրոպայում



Նկ. 38. Քարածուխի և երկաթի հանքերի տարածումը Եւրոպայում:

Ճանապարհների հաղորդակցութիւնը Բելգիայում շատ է զարգացած: Երկաթուղային գծերի ցանցը ոչ մի պետութեան մէջ այնչափ խիտ չէ, որչափ Բելգիայում¹⁾:

Բացի երկաթուղիներից՝ Բելգիայում փորել են նաև շատ ջրանցքներ, որոնցով համարեա՞յնչափ բեռ է տեղափոխւում, որչափ երկաթուղով:

Արտաքին առևտրի շրջանառութեամբ փոքրիկ Բելգիան առաջ է նոյնիսկ Ռուսաստանից (նաև Աւստրո-Ունգարիայից և Իտալիայից): Արտահանութեան գլխաւոր առարկաներն են՝ մետաղեայ գործիքներ և քարածուխ: Ներմուծւում է՝ գլխաւորապէս հացահատիկ:

¹⁾ Չկայ Բելգիայում և ոչ մի տեղ, որ երկաթուղուց հեռու լինէր աւելի քան 10 վերստ:

Շնորհիւ արդիւնագործութեան հսկայական գարգացման՝ Բելգիայում դիզել են անագին ղրամագլուխներ: Հարուստ մարդկանց թիւը այդ երկրում շատ մեծ է. իւրաքանչիւր 80 հոգուց մէկը ապրում է իր դրամագլխի տոկոսով միայն: Բելգիական անագին դրամագլուխներ շահեցւում են օտարերկրեայ ձեռնարկութիւնների մէջ: Հենց Ռուսաստանում շատ գործարաններ, հանքեր, էլեքտրական լուսաւորութեան և էլեքտրաքարշի ընկերութիւններ բելգիացիների ձեռքին են գտնւում (օրինակ՝ Թիֆլիսի էլեքտրաքարշի ընկերութիւնը բելգիական է): Բայց, չնայելով դրան, բանւոր դասակարգը Բելգիայում քիչ վաստակ ունի և ապրում է բաւական խեղճ. ընդհանրապէս՝ ժողովրդի սնտեսական կացութիւնը Բելգիայում նախանձելի չէ:

Ժողովրդական կրթութեան կողմից էլ Բելգիան յետ է մընացել հարեան երկիրներից: Բարձրագոյն և միջնակարգ դըպրոցների թիւը Բելգիայում բաւարար է (կայ 5 համալսարան, որոնցից 3-ը՝ մասնաւոր): Սակայն տարրական դըպրոցների թիւը բաւարար չէ, ուսումնի ևս պարտադիր չէ. բնակիչների 12 տոկոսը անգրագէտ է: Այստեղ էլ նկատելի է կաթոլիկ հոգևորականութեան բացասական ազդեցութիւնը, որի ձեռքում է գտնւում ժողովրդական կրթութեան ղեկը:

ՊԵՏԱԿԱՆ ԿԱԶՄԸ ԵՒ ՔԱՂԱՔՆԵՐԸ:—Բելգիան սահմանադրական լծագաւորութիւն է:

Բելգիայի մայրաքաղաքն է Բրիւսսէլ (600 հազար բն.), գտնւում է երկրի կենտրոնում, շատ երկաթուղային գծերի հանգույցում. նշանաւոր առևտրական և արդիւնագործական քաղաք է:

Արդիւնագործական միւս նշանաւոր քաղաքներն են.— Լիւտիխ կամ Լիեժ՝ Մասսի վրայ,—գինագործական, մեքենագործական և շինարարական գործարաններով: Գենտ—Շելգայի վրայ—կտաւի և չթի գործարաններով:

Անտովերպեն—նշանաւոր նաւահանգիստ է Շելգայի վրայ: Ժովի մակընթացութեան շնորհիւ այդտեղ են հասնում նոյնիսկ ովկիանոսային շատ նաւեր:

Օստէնդէ—նաւահանգիստ է Գերմանական ծովի վրայ: Յայտնի է ծովային լողարաններով:

Բելգիան գաղութներ չունի. բայց Բելգիայի թագաւորի հովանաւորութեան տակ է գտնուում Աֆրիկայի Կոնգօ շրջանը. այդտեղից Բելգիա են բերում կաուչուկ և փղոսկր:

Բելգիայի հարաւ-արեւելեան կողմում, Գերմանիայի սահմանների մօտ, գտնուում է ԼՈՒԻՍԵՄԲՈՒՐԳ մեծ-դքսութիւնը: Իր բնութեամբ Լուքսեմբուրգը նման է Հարաւային Բելգիային: Մեծ-դքսութեան ազգաբնակչութիւնը բաղկացած է գերմանացիներից և մասամբ ֆրանսիացիներից. զբաղւում են գիւղատնտեսութեամբ և հանքագործութեամբ— երկաթի արտադրութեամբ:

Հ Ո Լ Լ Ս Ն Պ Ի Ս

ԸՆԴՀԱՆՈՒՐ ՆԿԱՐԱԳՐՈՒԹԻՒՆ: —Հոլլանդիան կամ Նիդերլանդիան¹⁾ ցածր երկիր է. նրա $\frac{1}{4}$ մասը գտնուում է նոյն իսկ ծովի մակերևոյթից ցածր: Երկիրը ծովից պաշտպանում են ծովափի դիմները (աւազաթմբեր), որոնք ներկայացնում են բնական պատնէշներ ծովի ալիքների դէմ: Այդ դիւնները երբեմն 30 սաժէն բարձրութիւն և 3—5 վերստ լայնութիւն են ունենում: Դիւնների մէջ եղած տարածութիւնների վրայ հոլլանդացիները կառուցել են 7—8 սաժէն բարձրութեամբ արւեստական պատնէշներ: Այդ պատնէշները այնքան լայն են, որ նրանց վրայ շատ տեղ գցել են ծառուղիներ և խճուղիներ: Այդպիսի պատնէշէր են կանգնեցրել նաև գետերի ափերին:

Պատնէշների կառուցումը պահանջել է, ի հարկէ, երկարատև, յամառ աշխատանք և հսկայական ծախքեր: Այդ պատնէշները կառուցել են հոլլանդացիները հետզհետէ, միջին դարերից սկսած: Միմիայն արտաքին, այսինքն դէպի ծովը նայող պատնէշները 3 միլիարդ (3 հազ. միլիոնը) ուրբուց աւելի են նստել ժողովրդի վրայ: Պատնէշների պաշտպանութիւնն էլ ահագին ջանքեր է պահանջում կառավարութիւնից. բազմաթիւ ճարտարապետներ հետևում են, որ այդ պատնէշները չվնասւեն, որովհետև ծովի ամեն մի հեղեղումը կարող է մեծամեծ աւերումներ առաջացնել և տասնեակ հազարաւոր մարդկանց ջրի տակ անել: Այսպէս՝ 13-րդ դարում պատահած հեղեղումները ջրի տակն են արել երկրի մի մասը և գոյացրել այժմեան Զիւդերզէէ ծոցը. Ֆրիւլանդեան կղզիներն էլ նոյն պատճառով կտրւել են մայր ցամաքից:

1) «Նիդերլանդիա» անունը նշանակում է «ցածր երկիր»:

Սակայն պատնէշները դեռ բաւական չեն՝ ծովից ցածր գտնուող վայրերը հեղեղումներից պաշտպանելու համար: Այդպիսի վտանգ սպառնում են երկրին ոչ միայն ծովը, գետերը, այլ և մթնոլորտային տեղումները և յորդ աղբիւրները: Սրանց շուրջ չէ կարող ինքն իրեն հոսել ծովը (ինչո՞ւ). ուստի երկիրը չորացնում, շուրջ հեռացնում են բազմաթիւ ջրանցքներով և քամաղացների միջոցով շարժուող ջրհան մեքենաներով:

Հոլլանդացիները ոչ միայն պաշտպանում են իրենց երկիրը ծովի հեղեղումներից, այլ և անընդհատ կռիւ մղելով ծովի դէմ, ոչ մի ջանք չեն խնայում և յետ են խլում ծովից ընդարձակ հողամասեր և չորացնելով դարձնում են արգաւանդ դաշտեր: Այս կերպ հոլլանդացիները ծովից ցամաքացրել են 4 հազար քառ. վերստ տարածութիւն: Ներկայումս նրանք ձեռնարկում են նոյնիսկ ցամաքացնելու Զիւդերզէէ ծոցը ¹⁾:

Հոլլանդիայի այն վայրերը, որոնք շրջապատւած են պատնէշներով և ամեն կողմից կտրուած են ջրանցքներով, կոչւում են պոլդեր: Սրանց հողը շատ արգաւանդ է, որովհետեւ բազկացած է տիղմից: Պոլդերները ծածկւած են արտերով կամ կանաչ մարգագետիններով:

Հոլլանդիայի կլիման խոնաւ է, երկիրը մառախլապատ: Փետինը շատ էլ յարմար չէ հացահատիկներ բուսցնելու համար. ամենից լաւ աճում են այնտեղ մարգագետնի խոտեր:

Ազգաբնակութեան մեծ մասը կազմում են հոլլանդացիները. հիւսիսում ապրում են նաև Հոլլանդացիներին ցեղակից ֆրիզներ, իսկ հարաւում—նմանապէս հոլլանդացիներին ցեղակից ֆլամանդցիներ: Հոլլանդացիները պատկանում են գերման ցեղին. կրօնով նրանց մեծ մասը բողոքական է, փոքր մասը՝ կաթոլիկ:

ՀՈԼԼԱՆԴԱՅԻՆԵՐԻ ԶԲԱՂԾՈՒՆՔԵՐԸ ԵՒ ԿԵԱՆՔԸ.—Արգաւանդ, բայց շատ խոնաւ պոլդերները ամենից աւելի յարմար են անասնաբուծութեան համար, որն և կազմում է Հոլլանդիայի

¹⁾ Հոլլանդացիները մի այսպիսի խօսք ունեն, թէ՛ «Աստուած ստեղծել է ծովը, իսկ մենք—ծովափնեայ ցամաքը»:

քնակիչները գլխաւոր զբաղմունքը: Հոլլանդական գիւղացիները պահում են ընտիր կովեր և արտադրում են մեծ քանակութեամբ կաթ ու պանիր: Հոլլանդական պանիրն ևս, շէյցարականի պէս, լաւ հոշակ ունի: Համարեա ամեն մի գիւղում կայ պանրագործարան: Կաթը և պանիրը հոլլանդացիների արտահանութեան գլխաւոր առարկաներն են. արտահանում են գլխաւորապէս դէպի Անգլիա և Գերմանիա: Հոլլանդացիները երկրագործութեամբ ևս պարապում են, բայց փոքր չափով: Մի բանի պոլզերներում զարգացած է ծաղկաբուծութիւնը:



Նկ. 39. Հոլլանդական գիւղացու բակ: Ինքը գիւղացին և նրա կինը կով են կթում: Ձախ կողմը՝ ջրանցք, որ համարեա խոտով է ծածկւած:

Հոլլանդիայի ափերը ողողող ծովերը և ծոցերը, նաև պոլզերները ջրանցքները հարուստ են ձկներով. ուստի և հոլլանդացիների համար ապրուստի կարևոր օժանդակ միջոց է ծառայում ձկնորսութիւնը. մանաւանդ շատ ձուկ են որսում հոլլանդացիները Գերմանական ծովում:

Հոլլանդացիները ճարպիկ ծովազնացներ են: Դեռ 17-րդ դարում նրանք ծովային հեռաւոր ճանապարհորդութիւններ աւրին և ձեռք բերին ընդարձակ գաղութներ Զոնդեան կղզիների

վրայ: Գաղութների հետ ունեցած առևտուրն էլ հոլլանդացիներին շատ օգուտ է բերում: Արտաքին առևտուրը Հոլլանդիայում շատ է զարգացած. այդ կողմից նա նոյնիսկ Բելգիայից առաջ է: Գործարանային արդիւնագործութիւնը Հոլլանդիայում չէ զարգացած՝ երկրում քարածուխ չլինելու պատճառով. մեծ նշանակութիւն ունի միայն նաւաշինութիւնը:

Հաղորդակցութեան միջոցները Հոլլանդիայում գերադանց են: Երկաթուղային գծերի ցանցը թէպէտ շատ խիտ չէ, բայց դրա փոխարէն՝ ջրանցքներով երթևեկում են բազմաթիւ շոգենաւեր և լաստեր:

Ժողովրդի քարեկեցութիւնը Հոլլանդիայում աւելի բարձր է, քան Բելգիայում: Հոլլանդական գիւղացիները լիսուտ ապրուստ ունեն: Նրանց տներում և բակերում պահպանւում են խիստ կարգ ու կանոն և մաքրութիւն:

Ժողովրդական կրթութիւնը շատ է տարածւած Հոլլանդիայում. 1000 հոգուց միայն 18-ն է անգրագէտ:

ՊԵՏԱԿԱՆ ԿԱԶՄԸ, ՔԱՂԱՔՆԵՐԸ ԵՒ ԳԱՂՈՒԹՆԵՐԸ:—

Հոլլանդիան սահմանադրական թագաւորութիւն է: Պետութեան մայրաքաղաքն է՝ Հաագ: Սա մի փոքր, խաղաղ քաղաք է՝ շքեղ պարկերով շրջապատւած:

Ամստերդամ—Հոլլանդիայի ամենամեծ քաղաքն է (500 հազարից աւելի բն.). նշանաւոր նաւահանգիստ է Զիւդերզէէ ծոցի ափին: Մի մեծ ջրանցք, որ մատչելի է նոյնիսկ ծովային նաւերի համար, կապում է Ամստերդամը ուղղակի Գերմանական ծովի հետ: Մի քանի ուրիշ, աւելի փոքր, ջրանցքներ կապում են Ամստերդամը Հոլլանդիայի զանազան մասերի հետ: Լինելով նշանաւոր նաւահանգիստ՝ Ամստերդամը միևնոյն ժամանակ Հոլլանդիայի արդիւնագործական կենտրոնն է: Այնտեղ են շինւում և նորոգւում նաւեր, պատրաստւում խաւիսիներ և այլն:

Ամստերդամը յիշեցնում է Վենետիկ քաղաքը. ամբողջապէս կըտրրուած է ջրանցքներով, որոնք քաղաքը բաժանում են 90 կղզիամասերի:

Ամստերդամից ոչ հեռու գտնւում է Զաանդամ (Զաարդամ), որ-

տեղ 18-րդ դարի սկզբում նաւաշինութիւն սովորեց ոռւսաց կայսր Պետրոս Մեծը:

Ռոտտերդամ—Հոլլանդիայի ամենանշանաւոր նաւահանգիստն է:

Գտնւում է Հոենոսի բազուկներից մէկի վրայ և միացած է Գերմանական ծովի հետ մի ջրանցքով. այդ ջրանցքով մինչև Ռոտտերդամ են գալիս հասնում ծովային նաւեր: Ռոտտերդամի մօտ գտնւում են նաւաշինութեան մեծ գործարաններ:

Հոլլանդիայի գաղութները շատ ընդարձակ են. իրենց տարածութեամբ նրանք 62 անգամ, իսկ բնակիչների թւով 7 անգամ մեծ են Հոլլանդիայից: Հոլլանդիային են պատկանում—Սումատրա, Եւա կղզիները, Բորնէօի մի մասը, Յելեբես, Մոլուկկեան կղզիները, Նոր-Գւինէայի մի մասը, Վեստ-Ինդիայում մի քանի կղզիներ, Գւինանայի մի մասը. Այդ բոլոր գաղութների թւում ամենանշանաւորն է՝ Եւա կղզին: Այդ կղզուց հոլլանդացիները բերում են մեծ քանակութեամբ շաքարեղէգ, սուրճ, ծխախոտ, պղպեղ և գաղութային (կոլոնիալ) ուրիշ ապրանքներ:

Գ Ե Ր Մ Ա Ն Ի Ա

ԸՆԴՀԱՆՈՒՐ ՆԿԱՐԱԳՐՈՒԹԻՒՆ:—Գերմանիայի հիւսիսային մասում տարածւում է «Գերմանական» կոչւող դաշտավայրը. նրանից հարաւ ընկնում են Գերմանական լեռնախմբերը, իսկ աւելի հարաւ—Վերին-Գերմանական կամ Բաւարական բարձրաւանդակը:

Գերմանական դաշտավայրը տարածւում է Հոլլանդիայի սահմանից սկսած, արեւմտեան կողմում, մինչև Ռուսաստանի սահմանը—արեւելքում: Այդ դաշտավայրը համարեա ամբողջապէս ծածկւած է հնումը հիւսիսային Գերմանիան բռնող սառցադաշտի մնացորդներով, տիղմով և աւազով. շատ տեղեր էլ ծածկւած են վալուններով: Հին սառցադաշտի այդ մնացորդները այնչափ շատ են, որ նրանցով կարելի կլինէր լցնել ամբողջ Բալտիկ ծովը:

Էլբա գետից դէպի արեւմուտք Գերմանական դաշտավայրը նման է Հոլլանդականին (վերջինս առաջինի շարունակութիւնն է կազմում): Գերմանական ծովի մօտերքում այդ դաշտավայրը շատ ցածր է, ծովը այդտեղ ևս, ինչպէս Հոլլանդիայում, մաշում է ծովափնեայ ցամաքը: Այն ծոցերը ուր թափւում են ներկայումս Էլբա և Վեզեր գետերը, առաջ ցամաք են եղել յետոյ միայն ծովը մաշել և ծոցեր է առաջացրել:

Այժմեան Հելզոլանդ կղզին մայր ցամաքից է կտրւած: Ծովի ալիքները ներկայումս էլ անդադար մաշում են այդ կղզու ափերը: Ծովի ափերին այդտեղ, ինչպէս նաև Հոլլանդիայում, տարածւում են ճահճոտ դաշտեր—մարշեր, որոնք նման են պոլդերներին: Նրանց մակերևոյթը հաւասար է ծովի մակերևոյթին, տեղ-տեղ էլ նոյն իսկ աւելի ցածր է (օրինակ՝ էմս գետի բերանի մօտ): Ծովից մարշերը պաշտպանւում են, ինչպէս պոլդերները, պատնէշներով: Նմանապէս՝ ամեն կողմից նրանք կտրուած են ջրանցքներով: Մարշերից դէպի հարաւ ընկնում են գետտերը, այսինքն սառցադաշտերից մնացած աւազոտ և տղմոտ վայրեր, որոնց վրայ տարածւում են մացառոտ տափաստաններ և սորֆային ճահիճներ: Այդ տափաստաններից ամենամեծն է՝ Լիւններուրգի տափաստանը, որ տարածւում է Էլբայի և Վեզերի միջև:


Էլբա գետից արեւելք Գերմանական դաշտավայրը այնքան էլ հարթ չէ: Բալտիկ ծովի ափերի երկայնութեամբ ձգւում են Մերձբալտեան բլրաշարքերը, որոնք գոյացել են հնումը այդտեղ եղած սառցադաշտի մորեններից: Բլրաշարքերի մէջ գտնւում են բազմաթիւ լճեր: Այդ լճերն ևս սառցադաշտային ծագում ունեն: Բալտիկ ծովի եզրը աւելի բարձր է, քան Գերմանական ծովինը. նա ցածր է միայն այն տեղերում, ուր ծովն են թափւում՝ Օդեր, Վիսլա և Նեման գետերը: Սըրանց գետաբերաններից գոյացել են սակաւաջուր ծովախորշեր (հաֆեր), որոնք ծովի հետ միացած են ջրի միայն չափազանց նեղ շերտերով:

Մերձբալտեան բլրաշարքերից դէպի հարաւ Գերմանական դաշտավայրը միապաղաղ է: Այդտեղ ամենուրեք պատահում են աւազոտ և ճահճային տեղեր. բայց մեծ տարածութիւն են բռնում նաև աւելի արգաւանդ հողեր:

Գերմանական դաշտավայրի կլիման բարեխառն է, սակայն

արևմտեան կողմում աւելի մեղմ է, ծովային, իսկ արևելեան կողմում— աւելի խիստ, ցամաքային:

Գերմանական լեռնախմբերը բռնում են համարեա այնչափ տարածութիւն, որչափ Գերմանական դաշտավայրը: Այդ լեռներից նշանաւոր են՝ Հարց—հիւսիսում, Վոզեզներ և Շւարցվալդ—հարաւում, Հռենոսեան լեռներ—արևմտեան կողմում, Բոհեմեան լեռների փէշերը—արևելքում և Տիւրինգեան անտառը—միջին մասում: Այս լեռները բաղկացած են գլխաւորապէս՝ գրանիտից, գղձաքարից և բիւրեղացած ուրիշ տեսակներից:



Նկ. 40. Հռենոսեան սեառան:

Լեռների լանջերը ուղղաձիգ են, իսկ գագաթները՝ կլոր: Նրանք բարձր չեն ($1-1\frac{1}{2}$ վերստ) և մեծ մասով ծածկւած են խիտ անտառներով. այդ պատճառով են ասում՝ Տիւրինգեան «անտառ», (փոխանակ ասելով՝ լեռ), Բոհեմեան անտառ, Շւարցվալդ (Սև անտառ) և այլն:

Իրենց ձևով Գերմանական լեռները նման են միմեանց: Մնացած լեռներից զգալի կերպով տարբերում են միայն Հռենոսեան լեռները, սրանք բարձրաւանդակի ձև ունեն և կտրուած են Հռենոս գետի և նրա վտակներ՝ Մոզելի և Լանի հովիտներով: Հռենոսի միւս նշանաւոր վտակներից՝ Մայնը

իր սկիզբը առնուժ է Տիւրքինգեան լեռներէց, իսկ Նեկկարը՝
Շւարցվալդից:

Հռենոսեան բարձրաւանդակի վրայ տեղ-տեղ պատահում են հրաբուխի բերաններ՝ ջրով լցւած. տեղ-տեղ էլ բարձրանում են իրենց ձեռ լաւ պահպանած հանգած հրաբուխներ: Գերմանական լեռների միջև ընկնում են հովիտներ: Նշանաւոր է՝ Շւարցվալդի և Վոգթգնների միջև ընկնող Հռենոսեան հովիտը: Հովիտների կլիման մեղմ է, հողը՝ շատ արգաւանդ, ուր նոյնիսկ խաղող է հասնում:

Գերմանական լեռները տարածւում են մինչև Դանուբ գետը, որ իր սկիզբը առնում է Շւարցվալդից: Դանուբից դէպի հարաւ գտնւում է Վերին-Գերմանական կամ Բաւարական բարձրաւանդակը: Այս բարձրաւանդակի համեմատաբար ցածր մասում, Դանուբի հովտում, հողը արգաւանդ է. իսկ աւելի բարձրադիր մասում, Ալպերի մօտ, ծածկւած է հին սառցադաշտերի մնացորդներով և լճերով: Այդտեղի կլիման աւելի տաք չէ, քան Բալտիկ ծովի ափերի կլիման:

Ալպերի միայն հիւսիսային՝ կրաքարային փէշերն են մտնում Գերմանիայի սահմանների մէջ:

Բնական հարստութիւններով Գերմանիան յետ չէ մնում Ֆրանսիայից: Ծիրշտ է, Գերմանիայի հողը մեծ մասով այնչափ արգաւանդ չէ, կլիման էլ այնպէս մեղմ չէ, ինչպէս Ֆրանսիայում, բայց դրա փոխարէն երկրի խորքում թաղւած կան աւելի հարուստ հանքեր—մանաւանդ քարածուխի, երկաթի և աղի հանքեր:

Գերմանիայի բնակիչների թիւն է՝ 63 միլիոն: Ազգաբնակչութեան ահագին մեծամասնութիւնը—⁹/₁₀-ը գերմանացիներ են: Սրանց լեզուն, գերմաներէնը, երկու գլխաւոր բարբառ ունի—վերին և ստորին գերմանական բարբառներ ¹⁾: Գերմանիայում կան նաև ուրիշ ազգութիւններ, որոնք ապրում են


¹⁾ «Վերին»-գերմանական բարբառով խօսում են հարաւային գերմանացիները, իսկ «ստորին»-գերմանական բարբառով—հիւսիսային գերմանացիները: Վերին-գերմանական բարբառը աւելի քաղցրահնչիւն է, աւելի մշակւած, ուստի և այդ բարբառն է դարձել գերմանացիների գրական լեզուն:

պետութեան ծայրերում. արևելեան կողմում՝ լեհեր (մօտ $3\frac{1}{2}$ միլ.) և վենդեր. արևմտեան կողմում՝ ֆրանսիացիներ և հոլլանդացիներ. հիւսիսում՝ դանիացիներ: Գերմանիայի բնակիչները մօտ $\frac{2}{3}$ -ը բողոքական է, $\frac{1}{3}$ -ը՝ կաթոլիկ:

ԳԵՐՄԱՆԱՑԻՆԵՐԻ ԶԲԱՂՄՈՒՆՔՆԵՐԸ ԵՒ ԿԵԱՆՔԸ:—Գեր-
 ֆանիան Եւրոպայի միակ պետութիւնն է, որտեղ հաւասարա-
 պէս զարգացած են թէ՛ գիւղատնտեսութիւնը և թէ՛ գործարա-
 նային արդիւնագործութիւնը:

Գիւղատնտեսութիւնը Գերմանիայում հասել է կատարելա-
 գործութեան բարձր աստիճանին: Գերմանական դաշտավայրը
 աչքի չէ ընկնում արգաւանդութեամբ. սակայն նա շատ լաւ
 մշակած է և տալիս է համարեա այն չափով առատ հունձ,
 որչափ Հիւսիսային Փրանսիական դաշտավայրը: Գերմանական
 գիւղացիները հողը մշակում են շատ հիմնովին, գիւղատնտե-
 սական գիտութեան օրէնքների համաձայն: Գերմանացիները
 բերք են վերցնում նաև այնպիսի հողամասերից, որ ու-
 րիշ երկիրներում համարւում են անյարմար և չեն մշակւում
 բոլորովին: Գերմանացիները հետզհետէ չորացնում են ճահիճ-
 ները. նրանք առանց ցանելու չեն թողնում ոչ մի կտոր հող,
 միայն թէ ամեն տարի փոխում են ցանքսի տեսակի:

Գերմանական դաշտավայրի սակաւ բերրի վայրերում ցանում
 են գլխաւորապէս համար, որ գերմանացիների համար նոյն նշանա-
 կութիւնը ունի, ինչ որ ֆրանսիացիների համար՝ ցորենը. ցանում են
 նաև վարսակ ու գարի: Միևնոյն հողաբաժնում ուրիշ տարիներ հացա-
 հատիկների փոխարէն ցանում են խոտաբոյսեր և հասարակ ճակնդեղ:



Յիլ. 41. Երկրագործութեան արածման համեմատական մեծութիւնը Եւրո-
 պական պետութիւններում եւ Միացեալ-Նահանգներում:

Զբաղելով երկրագործութեամբ՝ նրանք բազմացնում են նաև անասուններ,—ծի, կով, խոզ: Գերմանական դաշտավայրի աւելի արգաւանդ մասերում, յատկապէս հարաւային շերտում, պատահում են շաքարի ճակնգեղի ընդարձակ դաշտեր:

Հարաւային Գերմանիայում, լեռնալանջերին և բարձրաւանդակների վրայ, գերմանացիները անում են նոյն ցանքսերը, ինչ որ հիւսիսում: Իսկ լեռնագոգերում, որտեղ կլիման աւելի տաք է և հողն էլ աւելի արգաւանդ, ցանում են՝ ցորեն, եգիպտացորեն, խաղող, գայլուկ և մշակում են զանազան պտղատու ծառեր: Այգեգործութիւնը և երկրագործութիւնը առանձնապէս զարգացած են Հոենոսի հովտում:

Բաւարական քարձրաւանդակի վրայ ևս, Գանուրի հովտում, ծաղկում է երկրագործութիւնը: Այդտեղի արգաւանդ հողում լաւ անում են՝ ցորեն և գայլուկ:

Ալպերի փէշերի մօտ ապրող բնակիչները զբաղւում են անասնաբուծութեամբ: Այնտեղ ամենուրեք տարածւում են հիւթաշատ խոտով ծածկւած կանաչ արօտատեղիներ, որոնց վրայ արածում են կաթնատու անասունների հօտեր:

Մեծ հողատարութեամբ մշակելով հողը՝ գերմանացիները միևնոյն ժամանակ լաւ պահպանում են իրենց անտառները—մաքրում են, պաշտպանում են վնասակար միջատներից և այլն: Քիչ-քիչ միայն նրանք կտրտում են անտառը. շատ տեղ նրանք նոյն իսկ նոր անտառներ են տնկում, որոնց մէջ ծառերը աչքի են ընկնում իրենց որոշ դասաւորութեամբ:

Ահագին նշանակութիւն ունի Գերմանիայի համար հանքագործութիւնը: Գերմանիան քարածուխի արտադրութեամբ յետ է մնում միայն Միացեալ-Նահանգներից և Անգլիայից, իսկ երկաթի արտադրութեամբ՝ միայն Միացեալ-Նահանգներից:

Քարածուխի արտադր.	1907 թ. երկաթի արտադրութիւնը	1907 թ.
Մ.-Նահանգն.	25.770 միլ. փութ	Մ.-Նահանգ, . 1.600 մ. փութ
Անգլիա . . .	16.610 » »	Գերմանիա . . . 800 » »
Գերմանիա . . .	12.550 » »	Անգլիա . . . 620 » »
Աւստ.-Ունգ. . .	2.640 » »	Ֆրանսիա . . . 220 » »
Ֆրանսիա . . .	2.210 » »	Ռուսաստան . . . 170 » »
Ռուսաստան . . .	1.520 » »	

Քարածուխ և երկաթ Գերմանիայում շատ լեռների մէջ կան, յաճախ իրար մօտ: Քարածուխի ամենահարուստ հանքեր, նմանապէս երկաթի նշանաւոր հանքեր, գտնւում են Գերմանիայի հարաւ-արևելեան

կողմում, Աւստրո-Ունգարիայի և Ռուսաստանի սահմանների մօտերը: Այս պատճառով շատ հարուստ հանքեր կան նաև Հոբոտսեան լեռների հիւսիսային ստորոտների մօտ, Հոբոտսի վտակ Ռուրի շրջանում: Երկաթի ամենահարուստ հանքերը գտնուում են Հոբոտսի մի ուրիշ վտակի՝ Մոգելի շրջանում,—Ֆրանսիայի և Լուքսեմբուրգի սահմանի մօտ:

Յինչև արտադրութեամբ Գերմանիան միւս բոլոր երկիրներից առաջ է. իսկ պղնձի և կապարի արտադրութեամբ յետ է մնում միայն մի քանի երկիրներից: Հանքագործութեան մէջ գերմանացիները շատ ճարպիկ են. նրանք յաջողութեամբ մետաղ են ստանում նոյն իսկ այնպիսի աղքատ հանքերից, որոնք ուրիշ երկիրներում ամենևին չեն էլ շահագործուում:

Գերմանիայում արտադրուում են նաև բազմազան ուրիշ հանքեր—վիմագրական քար, նաւթ (Լիւնեբուրգի տափաստանում), գրաքար և սաւթ: Բայց առանձնապէս մեծ նշանակութիւն ունի աղի արտադրութիւնը. երբեմն $1\frac{1}{2}$ —2 վերստ հաստութեամբ աղահանքեր են պատահում Գերմանիայում: Բացի սովորական, կերակրի աղից, գերմանացիները արտադրում են մեծ քանակութեամբ նաև ուրիշ տեսակ աղ, այսպէս կոչւած «ստասֆուրտեան» աղ», որ գործ է դրուում գլխաւորապէս հողը պարարտացնելու համար:

Հանքագործութիւնից աւելի ևս զարգացած է Գերմանիայում մշակողական արդիւնագործութիւնը: Գործարաններում և արհեստանոցներում աշխատում են այն թւով մարդիկ, ինչ թւով դաշտերում և արօտատեղիներում, այգիներում և անտառներում: Ամբողջ Գերմանիայում ամենուրեք կան գործարաններ, մանաւանդ՝ Հոբոտսեան շրջանում և Սաքսոնիայում²⁾:

Գործարանային արդիւնագործութեան բոլոր ճիւղերի մէջ Գերմանիայում առաջին տեղը բռնում է մետաղագործութիւնը: Գերմանացի բանւորների ձեռքի տակից դուրս են

¹⁾ Այդ աղը «ստասֆուրտեան» է կոչւում այն պատճառով, որ սկզբում դրանից արտադրել սկսեցին Ստասֆուրտ քաղաքի մօտակայքում, Հարց լեռների հիւսիսային ստորոտների մօտ: Այդ աղից արտադրուում է տարեկան 200 միլ. փութ.

²⁾ Հոբոտսեան շրջանում երկրագործութեամբ պարապում է ազգաբնակչութեան ընդամենը $\frac{1}{4}$ մասը, իսկ Սաքսոնիայում—հազիւ $\frac{1}{8}$ մասը:

պալիս մետաղեայ ամեն տեսակ գործեր—սկսած ամենափոքրերից և հասարակներից, օրինակ՝ ասեղ, գրիչ, դանակ, ատաղձագործական և փականագործական գործիքներ, և վերջացրած խոշոր ու բարդ գործիքներով,—օրինակ՝ թնդանօթ, շոգեմեքենայ, շոգենաւ և ամեն տեսակ մեքենաներ: Այս բոլորից պատրաստուում է անքան շատ, որ մետաղեայ ապրանքները կազմում են Գերմանիայի արտաքին առևտրի գլխաւոր առարկաները:

Հեռուսի վտակ Ռուրի ափին գտնուող էսսեն քաղաքումն է մետաղաձուլական ամենամեծ գործարանը. դա Կրուպպի գործարանն է: Այդտեղ պատրաստում են՝ երկաթուղու ուղիներ, վագոնների անիւներ և առանցքներ, շոգեմեքենաների և շոգենաւերի կաթսաներ, իսկ գլխաւորապէս՝ թնդանօթներ: Կրուպպի գործարանը մի քաղաքի չափ է. այնտեղ աշխատող բանւորների թիւն է 30 հազար: Կրուպպի գործարանում տարեկան 100 միլիոն փութ քարածուխ է վաւուում: Գործարանը ունի իր սեփական երկաթուղային գիծը, որով անցնում է օրական 50 գնացք: Գործարանը ունի նաև քարածուխի և երկաթի սեփական հանքեր. երկաթահանքեր ունի նոյնիսկ Իսպանիայում, որոնցից հում նիւթը գործարանի տէրերը հասնեն կոխադրում իրենց սեփական շոգենաւերով: Գործարանը ունի 25 վերստ երկայնութեամբ (էմա գետի մօտ) մի դաշտ, որտեղ փորձի համար արձակում են գործարանում պատրաստած թնդանօթները: Կրուպպի գործարանի բաժանմունքում, որ գտնուում է ծովափնեայ Քիլ քաղաքում, պատրաստում են զրահակիր նաւեր, մարտանաւեր, սկաննաւեր և մարդատար շոգենաւեր:

Երկրորդ տեղը, մետաղի արդիւնագործութիւնից յետոյ, բռնում է՝ քամիակի, քրդի և մետաքսի մշակութիւնը:

Երրորդ տեղը բռնում է քիմիական արդիւնագործութիւնը, այսինքն՝ զանազան թթոււտների, աղերի, ներկերի, սապոնի արտադրութիւնը և այլն:

Ապա՝ մեծ չափերով զարգացած է Գերմանիայում շաքարի եւ գարեջրի արտադրութիւնը: Ճակնդեղից շաքար ստանալ,—դա գերմանական գիւտ է: Գարեջուրն էլ գերմանացիների սիրած խմիչքն է:

Արտաքին առևտրի շրջանառութեամբ Գերմանիան յետ է մնում միմիայն Անգլիայից: Գերմանիայից տրտահանւում են գլխաւորապէս գործարանային ապրանքներ, իսկ ներմուծւում են՝ հում նիւթեր և հացահատիկ: Գերմանացիներին չեն բա-

ւականացնում իրենց երկրից ստացուող հացահատիկները, ուստի և մի մասը գնում են Ռուսաստանից և Միացեալ-Նահանգներին:

Գերմանիայի արտաքին առևտրին նպաստում է և այն հանգամանքը, որ նա ունի ծովային բազմաթիւ նաւեր, որոնք կանոնաւոր կերպով երթեկեկում են ոչ միայն Եւրոպայի, այլ և մնացած աշխարհամասերի նշանաւոր նաւահանգիստների մէջ: Գերմանական մարդատար շոգենաւերը, որոնք Եւրոպայի և Հիւսիսային Ամերիկայի մէջ են երթեկեկում, իրենց հսկայական մեծութեամբ և արագընթացութեամբ յետ չեն մնում անգլիական շոգենաւերից:

Ճանապարհների հազորդակցութիւնը Գերմանիայում գերազանց է: Երկաթուղային գծերի ցանցի խտութեամբ Գերմանիան յետ է մնում միայն Բելգիայից և Անգլիայից: Երկաթուղային ճանապարհների երկայնութիւնը (55 հազար վերստ) համարեա այնչափ է, որչափ՝ Եւրոպական Ռուսաստանում, թէպէտ սրանից Գերմանիան տարածութեամբ 10 անգամ փոքր է:

Գերմանիայի գետերը, յատկապէս Հռենոսը, նմանապէս ծառայում են իբրև հազորդակցութեան ընտիր միջոցներ: Այդ գետերի տաշտը շատ անդ խորացրել և հարթել են, ավերն էլ ամրացրել են քարով: Նշանաւոր գետերը միացրած են ջրանցքներով: Այսպէս՝ Օդեր գետի վտակ Վարթան միացած է ջրանցքով Վիսլայի հետ, Էլբայի վտակներ Հաֆելը և Շպլէն—Օդերի հետ, Մայնը—Դանուբի հետ: Ամենից նշանաւորն է՝ Բիլի կամ «Վիլհելմ կայսեր» ջրանցքը, որ միացնում է Գերմանական ծովը Բալտիկ ծովի հետ: Այդ ջրանցքը մատչելի է նոյնիսկ ծովային մեծ նաւերի համար:

Գերմանացիները շատ ըարեկեցիկ ապրուստ ունեն, — թէպէտ նրանք չունեն այնչափ խնայած կարողութիւններ, որչափ Ֆրանսիացիները, որովհետև առևտուրը և արգիւնագործութիւնը Գերմանիայում աւելի ուշ են սկսել զարգանալ, քան Ֆրանսիայում: Գերմանական գիւղացիները մեծ մասով ունեն սեփական հող և բաւականաչափ անասուն: Նրանց աները և միւս շէնքերը հաստահիմն են: Գործարանային բանւորներն էլ ստանում են բաւական լաւ աշխատավարձ:

Փողովորդական կրթութիւնը Գերմանիայում այնպէս ըար-

ճրը է, որպէս և ոչ մի ուրիշ պետութեան մէջ: Տարրական դպրոցներ Գերմանիայում շատ կան: Տարրական ուսումը պարտադիր է բոլոր երեխաների համար—սկսած 6 տարեկանից մինչև 14 տարեկան հասակը: Ժողովրդական դպրոցների ուսուցիչները ամենքի կողմից յարգւած են: Գերմանիայում շատ կան նաև միջնակարգ ու զանազան մասնագիտական դպրոցներ: Գերմանական համալսարանները և տեխնիկական բարձրագոյն դպրոցները համաշխարհային հռչակ են վայելում: Տպագրւած գրքերի քանակով Գերմանիայի հետ չէ կարող համեմատուել և ոչ մի երկիր: Բազմաթիւ գրական աշխատութիւններ, մանաւանդ գիտական գրւածքներ, թարգմանւում են օտար լեզուներով:

Նորակոչ անգրագէտ զինուորների թիւը մի քանի եւրոպական պետ.

Գերմանիա 3000 հոգուց.	1 (1905 թ.)
Դանիա 1000 »	2 (1907 »)
Շւէյցարիա »	5 (1905 »)
Շւէդիա »	6 (1904 »)
Անգլիա »	10 (1905 »)
Հոլլանդիա »	18 (1906 »)
Ֆրանսիա »	35 (1904 »)
Բելգիա »	98 (1906 »)
Յունաստան »	300 (1902 »)
Իտալիա »	306 (1905 »)
Եւր. Ռուսաստան (առանց Ֆինլեանդիայի)	420 (1905 »)
Ռումինիա	690 (1904 »)

ՊԵՏԱԿԱՆ ԿԱԶՄԸ, ՔԱՂԱՔՆԵՐԸ ԵՒ ԳԱՂՈՒԹՆԵՐԸ.—

Գերմանիան 25 պետութիւնների դաշնակցութիւն է: Այդ դաշնակցութեան մէջ մտնում են՝ 4 թագաւորութիւն, 6 մեծ-դքսութիւն, 5 դքսութիւն, 7 իշխանութիւն, 3 ազատ քաղաք: Ամբողջ Գերմանիայի տարածութեան և ազգաբնակչութեան $\frac{3}{5}$ -ից աւելին ընկնում է Գերմանիայի դաշնակցութեան մէջ մտնող ամենամեծ պետութեան՝ Պրուսիայի վրայ: Միւս 3 թագաւորութիւններն են—Բաւարիա և Վիւրտեմբերգ՝ Հարաւային Գերմանիայում, Սաքսոնիա՝ Հիւսիսային Գերմանիայում: Գերմանական միւս պետութիւններից նշանաւոր է՝ Բադեն մեծ դքսութիւնը: Մնացած պետութիւններից իւրաքանչիւրը

ունի ընդամենը մի քանի հարիւր, երբեմն էլ մի քանի տասնեակ հազար բնակիչ, իսկ տարածութեամբ մեր մի նահանգից էլ մի քանի անգամ փոքր է: Բացի 25 պետութիւններից՝ Գերմանիային են պատկանում նաև էլզաս ու Լոթարինգիա երկրամասերը, որոնք 1871 թւին ֆրանս-պրոսական պատերազմից յետոյ Գերմանիային անցան և այժմ պատկանում են ամբողջ պետութեան ու կոչւում են «կայսերական երկիրներ»:

Գերմանական դաշնակցութեան մէջ մտնող 25 պետութիւններից ամեն մէկը անկախ է իր ներքին գործերի մէջ, ունի իր առանձին կառավարութիւնը և սահմանադրութիւնը: Ազատ քաղաքները—Համբուրգ, Բրեմեն և Լիւբեկ—մի-մի փոքրիկ հասարակապետութիւններ են, որոնք կառավարւում են ժողովրդի կողմից ընտրւող պատագամաւորական ժողովով: Պետական ընդհանուր գործերում բոլոր պետութիւններն էլ ենթարկւում են ընդհանուր գերմանական կառավարութեան, այդ ընդհանուր գործերն են—օտար պետութիւնների հետ յարաբերութիւն պահպանել, զօրք, պոստ, հեռագիր, մաքսատուն, և այլն:

Ամբողջ Գերմանիայի կառավարութեան զուխն է Պրուսիայի թագաւորը, որը միևնոյն ժամանակ համարւում է ամբողջ Գերմանիայի կայսրը: Կայսրի իշխանութիւնը սահմանափակւած է պարլամենտով—ռայխստագով և դաշնակցական խորհրդով, որոնք Գերմանիայի ընդհանուր օրէնսդրական հաստատութիւններն են: Ռայխստագը ամբողջ Գերմանիայի ազգաբնակչութեան կողմից ընտրւած ժողովրդական պատգամաւորների ժողովն է, իսկ դաշնակցական խորհուրդը՝ բոլոր 25 պետութիւնների կառավարութիւնների ներկայացուցիչների ժողովը:

Գերմանական կայսրութեան և Պրուսական թագաւորութեան մայրաքաղաքն է—Բեռլին: Սա մի հսկայական քաղաք է, որ իր արւարձանների հետ միասին ունի մօտ 3 միլիոն բնակիչ: Այդտեղ է կայսրի աթոռանիստը, այդտեղ են գտնւում ռայխստագը և դաշնակցական խորհուրդը: Բերլինը գտնւում է Պրուսիայի կենտրոնում, Շպրէ գետի վրայ—ոչ հեռու այդ վրտակի և Հաֆելի խառնարանից և 15 երկաթուղային գծերի հանգոյցում:

Թէպէտ Բերլինը Գերմանիայի համար չունի այն մեծ նշանակու-

Թիւնը, ինչ որ Պարիզը Ֆրանսիայի համար, բայց և այնպէս նա Գերմանիայի լուսաւորութեան, առևտրի և արդիւնագործութեան կենտրոնն է: Բերլինի համալսարանը և բարձրագոյն միւս դպրոցները ամենից աւելի ուսանողներ ունեն: Բերլինի վաճառատները իրենց մեծութեամբ յետ չեն մնում Պարիզի վաճառատներից: Այնքան շատ գործարաններ կան Բերլինում, որ այդ քաղաքի բնակիչների կէսից աւելին գործարաններում է աշխատում և ապրուստի միջոցներ հայթայթում: Առանձնապէս աչքի են ընկնում իրենց մեծութեամբ մետաղաձուլական գործարանները, որտեղ պատրաստում են շոգեկառքեր, էլեքտրական մեքինաներ և այլն:



Նկ. 42. Փողոց Բերլինում:

Բերլինը աշխարհիս ամենաբարեշէն քաղաքներից մէկն է: Նրա փողոցները հրաշալի կերպով սաւայատակւած են ասֆալտով, պահոււմ են շատ մաքուր, Այդ պատճառով էլ փողոցների օդը Բերլինում այնպէս փոշոտ չէ, որպէս ուրիշ մեծ քաղաքներում: Հաղորդակցութիւնը Բերլինում օրինակելի է: Փողոցներով ամեն տեղ անցնում են էլեքտրաքարշի գծեր. բացի դրանից՝ կան նաև էլեքտրաքարշի ստորերկրեայ գծեր: Փողոցներից վեր էլ, երկաթեայ բարձր սիւնների վրայ, կառուցել են երկաթուղու և էլեքտրաքարշի գծեր:

Մագդեբուրգ — արդիւնագործական քաղաք է էլբա գետի վրայ:

Քաղաքից հարաւ տարածւում են ճակնդեղի ընդարձակ տնկարաններ և շաքարի բազմաթիւ գործարաններ: Այս պատճառով էլ Մագդեբուրգը յայտնի է նաև շաքարի առևտրով:

Հաննովեր—արդիւնագործական քաղաք է:

Դորամունդ և Էսսեն—յայտնի են մեքենաներ պատրաստող գործարաններով:

Բարմեն և Էլբերֆելդ, քիմիական նիւթերի, մահուղեղէնի և չթեղէնի գործարաններով:

Ջոլինգեն.—այս քաղաքը յայտնի է դանակներ, մկրատներ, սղոցներ, խարտոցներ և ընդհանրապէս մետաղեայ մանր գործիքներ պատրաստող գործարաններով:

Կրեֆելդ—մետաքսեղէնի գործարաններով և Աախեն—մահուղեղէնի գործարաններով:

Քէօլն—առևտրական և արդիւնագործական քաղաք է Հռենոսի վրայ. գտնւում է Բերլինից դէպի Պարիզ և Լոնդոն տանող ճանապարհի վրայ: Նշանաւոր է Քեօլնի տաճարը:

Վերանկֆուրտ—Մայնի վրայ. առևտրական նշանաւոր քաղաք է և երկաթուղային գծերի հանգույց:

Վիսըադեն—տաք աղբիւրներով հարուստ բուժավայր է. շրջապատւած է խաղողի և պրտղատու այլ ծառերի այգիներով՝ Հռենոսեան լեռների հարաւային ստորոտներում. ամառը այնտեղ են դիմում տասնեակ հազարաւոր հիւանդներ:

Բրեսլաւ (500 հազ. բն.)—արդիւնագործական և առևտրական քաղաք է Օդերի վրայ:

Քէօնիգսբերգ, Դանցիգ և Շտետին—նաւահանգիստներ են Բալտիկ ծովի վրայ. նշանաւոր են Ռուսաստանի հետ ունեցած առևտրով:



Նկ. 43. Քեօլնի տաճար:

Քիլ—նաւահանգիստ է Բալտիկ ծովի վրայ, Քիլի կամ «Վիլ-հելմ կայսեր» ջրանցքի սկզբին:

Վերև յիշատակած բոլոր քաղաքները գտնուում են Պրուսական թագաւորութեան մէջ:

Համբուրգ—ազատ քաղաք է. ունի մօտ 1 միլիոն բնակիչ: Համբուրգը հսկայական նաւահանգիստ է՝ նաւաշինարաններով. իր ունեցած նշանակութեամբ նա յետ է մնում երկրագնդի միայն երկու նաւահանգիստներից—Լոնդոնից և Նիու-Եորկից: Համբուրգը գտնուում է Էլբայի վրայ, գետաբերանից 100 վերստ հեռու:

Գերմանական ծովի մակընթացութեան միջոցին Էլբայով մինչև Համբուրգ են գալիս ովկիանոսային մեծ շոգեհաւեր, որոնք զանազան աշխարհամասերից այդտեղ են բերում հացահատիկներ, սուրճ, բամբակ, բուրգ և այլն: Այս բոլորը նաւերից դատարկուում և տեղաւորուում են ապրանքային մեծ պահեստներում և ուղարկուում Գերմանիայի (նաև Աւստրո-Ունգարիայի) զանազան մասերը—կամ երկաթուղով, կամ գետերով և ջրանցքներով: Էլբայով դէպի վեր երթեկուում են տարեկան 40 հազարից աւելի նաւեր, որոնցից շատերը գնում են Բոհեմիա, մինչև իսկ Պրագա քաղաքը:

Բրեմեն—ազատ քաղաք է, նաւահանգիստ Վեգերի վրայ:

Լիւբեկ—ազատ քաղաք է և նաւահանգիստ՝ Բալտիկ ծովի վրայ:

Դրեզդեն—(500 հազ. աւելի բնակիչ.)—Սաքսոնիայի մայրաքաղաքն է. գտնուում է Էլբայի վրայ: Հռչակւած է իր գեղարւեստական ճեմարանով, պատկերասրահներով և թանգարաններով:

Լայպցիգ (500 հազ. աւելի բն.)—դարձեալ Սաքսոնիայում ունի համալսարան, որ ամենահինն է Գերմանիայում: Լայպցիգը կենտրոն է եւրոպական գրավածառութեան և գերմանական տպագրութեան. այդտեղ կան հսկայական տպարաններ և վրձագրատներ:

Միւնխեն (500 հազ. աւելի բնակիչ.)—Բաւարիա թագաւորութեան մայրաքաղաքն է. գտնուում է Դանուբի վտակ Իզարի վրայ. յայտնի է իր բարձրագոյն դպրոցներով և պատկերասրահներով: Միւնխենը յայտնի է ընտիր գարեջրի գործարաններով:

Նիւրընթերգ—գործարանային մեծ քաղաք է հիւսիսային Բաւարիայում: Այդտեղ պատրաստած հարիւր-միլիոնաւոր խաղալիքներ, մատիտներ և քարետախտակներ ծախւում են աշխարհի բոլոր կողմերում:

Շտուտգարտ—Նեկկար գետի վրայ, Վիւրտեմբերգ թագաւորութեան մայրաքաղաքն է—հարաւային Գերմանիայում:

Մաննհայմ—արդիւնագործական քաղաք է և նաւահանգիստ՝ Հռենոսի վրայ, ուր այդ գետն է թափւում Նեկկարը:

Հայդելբերգ—փոքրիկ քաղաք է Նեկկարի վրայ, յայտնի է Հայդելբերգի համալսարանը:

Շտրասբուրգ—Էլզաս-Լոթարինգիայի գլխաւոր քաղաքը. գտնւում է Հռենոսը Մարնայի և Ռոնայի հետ միացնող ջրանցքների և Պարիզից Վեննա տանող երկաթուղային գծի վրայ:

Միլիտուզեն—Հռենոսեան-Ռոնեան ջրանցքի վրայ, արդիւնագործական քաղաք է. նշանաւոր է բամբակեղէնի մշակութեամբ:

Գերմանիայի գաղութները բաւական ընդարձակ են (5 անգամ աւելի տարածութեամբ, քան բուն Գերմանիան): Գլխաւոր գաղութները գտնւում են Աֆրիկայում: Այստեղ Գերմանիային են պատկանում—Կամբրունը, Հարաւ-Արեւմտեան Աֆրիկայի մի մասը (Օրանժ գետից հիւսիս) և Արևելեան Աֆրիկայի մի մասը (Աֆրիկական մեծ լճերի մօտ):

Ապա՝ Գերմանիային են պատկանում Աւստրալիայում՝ Նոր-Գլինէայի հիւսիս-արևելեան մասը, Բիսմարկի արշիպելագը և Պոլինեզիայի մի քանի ուրիշ կղզիներ: Ասիայում—Կիաօ-Չաու: Այս գաղութները վաղուց չէ ինչ ձեռք են բերել գերմանացիները և առայժմ սրանց ոչ մի օգուտ չեն բերում, որովհետև սակաւ բնակիչներ ունեն և աղքատ են:

Գ Ա Ն Ի Ա

ԸՆԴՀԱՆՈՒՐ ՆԿԱՐԱԳՐՈՒԹԻՒՆ:—Դանիան բռնում է Իւտլանդիա թերակղզու հիւսիսային մասը և գանիական կղզիները, որոնցից նշանաւոր են՝ Չելանդիա և Ֆիլենեն:

Իր բնութեամբ Դանիան նման է Հիւսիսային Գերմանիային: Թէ Իւտլանդիա թերակղզին և թէ դանիական կղզիները հարթ են և ծածկած սառցադաշտային կաւով, աւազով և վալուններով:

Իւտլանդիա թերակղզու արևելեան ծովափի երկայնութեամբ ձգւում են բլրաշարքեր, որոնք ուղղակի շարունակութիւն են կազմում Գերմանական Մերձբալտեան բարձրութեան:

Բլրաշարքերի արևմտեան կողմում ընկած է ամայի աւազոտ շերտ:

Զելանդիա և Ֆիւնեն կղզիները նման են Իւտլանդիային, բայց համեմատաբար աւելի արգաւանդ են, որովհետև այնտեղ աւազ քիչ կայ, այդ պատճառով էլ այդ կղզիները Դանիայի ամենալաւ մասերն են:

Դանիան շրջապատւած է ծովերով, ափերը կտրուած են կլիման էլ բաւական մեղմ, ծովային է:

Դանիայում ապրում են գերմանացիներին (աւելի ևս նորւեգացիներին ու շւեդներին) ցեղակից դանիացիները:

ԴԱՆԻԱՅԻՆԵՐԻ ԶԲԱՂՄՈՒՆՔՆԵՐԸ ԵՒ ԿԵԱՆՔԸ:—Դանիան գիւղատնտեսական երկիր է: Բնակիչների կէսից աւելին զբաղւում է երկրագործութեամբ և անասնաբուծութեամբ:

Դանիայում հողը գիւղացիների սեփականութիւն է կազմում. նրանք իրենց դաշտերը մշակում են, գերմանացիների նման, շատ խնամքով. հողից նրանք ստանում են հացահատիկների լաւ հունձ: Սակայն դանիացիները իրենց գլխաւոր ուշադրութիւնը դարձնում են անասնաբուծութեան վրայ,—պահում են կովեր, խոզեր, և ընտանի թռչուններ: Դանիացիների արտահանութեան գլխաւոր առարկաներն են կազմում՝ իւղը, միսը, և հաւի ձուն (արտահանում են գլխաւորապէս Անգլիա):

Գործարանային արդիւնագործութիւնը Դանիայում զարգացած չէ, որովհետև երկրում չկան քարածուխի հանքեր:

Դանիացիները լիառատ ապրուստ ունեն:

Ժողովրդական կրթութիւնը քարձր է Դանիայում: Բացի փոքրահասակների համար յատկացւած դպրոցներից՝ Դանիայում կան նաև բազմաթիւ դպրոցներ—«Ժողովրդական համալսարան»

ներ»՝ չափահասների համար: Այս վերջին դպրոցներում երեկոները գիւղացիները և բանւորները լրացնում են իրենց կրթութեան թերին:

ՊԵՏԱԿԱՆ ԿԱԶՄԸ ԵՒ ՔԱՂԱՔՆԵՐԸ:—Դանիական պետութիւնը կառավարում է թագաւորը, որի իշխանութիւնը սահմանափակած է պարլամենտի կողմից:

Դանիայի մայրաքաղաքը և միակ մեծ քաղաքն (մօտ 500 հազար բն.) է՝ Կոպենհագեն, — Զելանդիա կղզու վրայ, Զունդ նեղուցի ափին:



Նկ. 44. Զբոսոց եւ փողոց Կոպենհագենում:

Դանիային են պատկանում Եւրոպայում նաև Իսլանդիա և Ֆարերեան կղզիները:

ԻՍԼԱՆԴԻԱՆ երկրագնդի ամենամեծ հրաբխային կղզին է. համարեա 3 անգամ մեծ է Դանիայից: Սա ծովի մակերևոյթից կէս վերստ բարձր է և սարահարթի ձև ունի: Սարահարթի վրայ ամեն տեղ գտնւում են բազմաթիւ հրաբուխներ, որոնցից նշանաւորն է՝ Հեկլա: Բոլոր հրաբուխներն էլ ծածկւած են յաւերժական ձիւնով և սառցով:

Իսլանդիայում յաճախ պատահում են տաք աղբիւրներ, կան նաև հէյզերներ:

Իսլանդիայի կլիման դաժան է: Այնտեղ անտառ չկայ, երկրագործութեամբ էլ պարապել չէ կարելի: Աւելի ցածր տեղերում տարածւում են մարգագետիններ, իսկ բարձր տեղերում—տունդրաներ:

Իսլանդիայի ընակիչների թիւը 100 հազարից պակաս է: Իրենց ծագումով նրանք նորեկացիների յետնորդներ են: Նրանք ապրում են միայն կղզու ծայրերին, ցածր տեղերում, զբաղւում են՝ անասնապահութեամբ և ձկնորսութեամբ, ծովային թռչուններ որսալով, գագայ թռչունի բմբուլ հաւաքելով:

Իսլանդիան համարեա անկախ է, ունի իր յատուկ պարլամենտը, գլխաւոր քաղաքն է Ռէյկիաւիկ, որ ընդամենը 4,000 բնակիչ ունի:

Ֆարերեան կղզիներն ևս (Իսլանդիայից հարաւ) հրաբխային ծագում ունեն: Այս կղզիների վրայ բուն են դնում ծովային միլիոնաւոր թռչուններ, իսկ մարդիկ այնտեղ շատ քիչ թւով են ապրում (15 հազար). որսում են ձուկ, ծովային թռչուններ, հաւաքում են գագայի բմբուլ: Դանիայի գաղութները (Գրենլանդիա, Վեստ-Ինդիայի կղզիներից մի քանիսը) նրա համար համարեա ոչ մի նշանակութիւն չունեն:

ՍԿԱՆԴԻՆԱՒԵԱՆ ԹԵՐԱԿՂԶԻ

ԸՆԿՆԱՆՈՒՐ ՆԿԱՐԱԳՐՈՒԹԻՒՆ:—Սկանդինաւեան թերակղզին Եւրոպայի բոլոր թերակղզիների մէջ ամենամեծն է. նա հաւասար է Պիրենէեան և Ապենինեան թերակղզիներին՝ միասին վերցրած:

Սկանդինաւեան թերակղզու աիხերը շատ կտրտւած են, նրանց մօտ գտնւում են բազմաթիւ ժայռոտ, մանրիկ կղզիներ, որոնք սկեր են կոչւում: Թերակղզու հիւսիս-արեւմտեան կողմում գտնւում է բաւական մեծ կղզիների արշիպելագ՝ Լոֆոտեան անունով:

Սկանդինաւեան թերակղզին լեռնոտ երկիր է. լեռները բաղկացած են բիւրեղացած տեսակներից—գրանիտից և գդաքարից:

Թերակղզու արեւմտեան ափի երկայնութեամբ, բաւական լայն տարածութեան վրայ, ձգւում են Սկանդինաւեան լեռները՝ ծովի մակերևոյթից $1\frac{1}{2}$ — $2\frac{1}{2}$ վերստ բարձրութեամբ:

Սկանդինաւեան լեռները աւելի մեծ տարածութիւն են բռնում, քան Ալպերը, Ապենիններն և Պիրենէեան լեռները՝ միասին։ Այդ լեռները իսկապէս ներկայացնում են մի շարք բարձրաւանդակներ, որոնք Սկանդինաւեայում ֆիելդ են կոչւում։

Մի քանի ֆիելդներ, օրինակ՝ Շօստեղալի ֆիելդը, ծածկւած են յաւերժական ձիւնով և սառցարաններով. սակայն մեծ մասով ֆիելդները ծածկւած են տորֆային ճահիճներով և մացառուտներով։ Միայն տեղ-տեղ, միապաղաղ հարթութիւնների միջում, գտնուում են յաւերժական ձիւնով ծածկւած առանձնակի լեռնագագաթներ. օրինակ՝ երկու և կէս վերստ բարձրութիւն ունեցող Գալդհէօպիզ լեռնագագաթը՝ Շօտուն-Ֆիելդում։ Շատ հնումը ամբողջ Սկանդինաւեան ծածկւած է եղել սառցադաշտերով, որոնք հետզհետէ առաջ են շարժւել դէպի հարաւ, — հիւսիսային Գերմանիա և Ռուսաստան։ Սկանդինաւեան թերակղզու մակերևոյթի կազմութեան ներկայ վիճակը հետևանք է նախնական սառցադաշտերի։

Արեւմտեան կողմում, այսինքն Ատլանտեան ովկիանոսի ափերին, Սկանդինաւեան լեռները կտրւում են ուղղաձիգ կերպով. այդտեղ նրանք կտրուած են բազմաթիւ նեղ և երկայն ծովախորշերով, որոնք ֆիորդ են կոչւում։

Ֆիորդների թիւն է՝ մի քանի հարիւր. նրանցից 30-ը 50 վերստից աւելի երկայնութիւն ունեն, իսկ մէկը՝ Սոգնէ-Ֆիորդը 200 վերստից աւելի (1 վերստ խորութեամբ)։ Ֆիորդները կտրում-մանում են Սկանդինաւեան լեռների մէջ. նրանց ափերը ուղղաձիգ են, պատանման, երբեմն մի քանի հարիւր սաժեն բարձրութեամբ, շատերի վրայից ջրը վէժներ են թափւում։

Որովհետև Սկանդինաւեան թերակղզու արևմտեան երկայնութեամբ անցնում է Գոլֆշտրոմ տաք հոսանքը, ուստի և թերակղզու այդ մասի կլիման մեղմ է, ծովային, և ֆիորդները ամենևին չեն սառչում։

Սկանդինաւեան լեռների արեւելեան լանջերը լծեր են և աննկատելի կերպով միանում են մի ընդարձակ, բլրաշատ հարթութեան հետ, որ աստիճանաբար իջնում է դէպի Բոտնիկ ծոցի ափերը։ Այդ հարթութեամբ հոսում են բազմաթիւ գետեր։ Նշանաւոր են՝ Տորնէօ, Դալ, Գէօտա եւ Գլոմմեն գետերը։

Սկանդինաւեայում շատ կան նաև սառցադաշտային լճեր։ Անթիւ վալուններ, յաճախ հսկայական մեծութեամբ, ցրւած են այս հարթութեան վրայ ամեն տեղ։ Յաճախ պատահում են նաև կտր, գրանիտի բլուր-

ներ՝ ծածկւած հողի բարակ շերտով կամ բոլորովին լերկ: Այդ հարթութեան վրայ աճում են փշտերեկ ծառերի անտառներ, որոնց արանքում տեղ-տեղ կան տորֆային ճահիճներ և լճեր: Բևեռային շրջանից հիւսիս քիչ ծառ է բանում, այն ևս՝ ցածրիկ, աւելի հիւսիս տարածւում են տունդրաներ:

Որովհետև Սկանդինաւեան լեռները արևմտեան քամիների առաջն առնում են, այդ պատճառով էլ այդ լեռներից արևելք կլիման ցամաքային է. ամառը աւելի տաք է, քան արևմտեան մասում՝ Ֆիորդներում, իսկ ձմեռը—ցուրտ, սառնամանիքներով, որոնք 30^0-40^0 -ի են հասնում: Բոսնիկեան ծոցը ամեն ասորի ձմեռը ավերի մօտ սառչում է, երբեմն էլ ամբողջովին ծածկւում է սառոյցով:



Նկ. 45. Շուկա-աղփիկներ:

Մի փոքր ուրիշ է բնութիւնը Սկանդինաւեան թերակղզու հարաւային մասում: Սկագերրակ նեղուցից դէպի արևելք տարածւում է մի ընդարձակ ցածրութիւն, որտեղ գտնւում են հետևեալ մեծ լճերը—Վեններ, Վետտեր և Մելար: Այս լճերը մնացորդներ են մի նեղուցի, որ հնումը միացնում էր Բալտիկ ծովը Սկագերրակի հետ: Այս լճերի շուրջը, նաև աւելի հեռու՝ հարաւ ընկնող երկրամասը այնքան քարքարոտ չէ, ինչքան հիւսիսում. կլիման աւելի տաք է. ուստի և դա թերակղզու ասննարերրի մասն է:

Նկատւած է, որ Սկանդինաւեան թերակղզու ամբողջ գծագրութիւնը երկար ժամանակ անցնելուց յետոյ փոխւում է. մի քանի տեղ ձովափը բարձրանում է, ուրիշ տեղեր՝ ցածրանում: Նկատւած է ընդհանրապէս, որ Սկանդինաւեան թերակղզու ամբողջ բարձրանում են, ձովը հետզհետէ յետ է քաշւում: Նոյնը կատարւում է նաև հարևան Ֆինլանդիայի ձովափերին: Մի քանի քաղաքներ, որ առաջ ձովափին էին գտնւում և նաւահանգիստ էին, ժամանակի ընթացքում ձովափից հեռու են մնացել և կորցրել են իրենց նախկին նշանակութիւնը: Սակայն

ծովափերի այդ բարձրացումը և ցածրացումը տեղի են ունենում շատ դանդաղ, դարերի ընթացքում, ուստի և կոչւում են ցամաքի դարատր տատանումներ:

Սկանդինաւեան թերակղզու ընակիչների թիւն է՝ մօտ 8 միլիոն: Ազգաբնակութեան մեծ մասը կազմում են՝ շւեդները և նորւեգացիները. սրանք դանիացիներին ազգակից են և նրանց հետ կազմում են գերման ժողովուրդների հիւսիսային խումբը: Երկրի հիւսիսային կողմում, բացի նրանցից, ապրում են նաև դեղին ցեղին պատկանող երկու ժողովուրդներ—լապլանդացիներ (լոպարներ) և ֆիններ, որոնց թիւը մեծ չէ այնտեղ:



Նկ. 46. Տեսարան հարաւային Շւեդիայում:

ՇԻԵՂՆԵՐԻ ԵՒ ՆՈՐԻԵԳՍՅՈՒՆԵՐԻ ԶԲԱՂՄՈՒՆՔՆԵՐԸ ԵՒ ԿԵԱՆՔԸ:—Սկանդինաւիայի հարաւային, համեմատաբար արգաւանդ մասում, բնակիչները զբաղւում են գլխաւորապէս երկրագործութեամբ և անասնաբուծութեամբ: Այդ մասում շւեդները և նորւեգացիները խնամքով մշակում են հողը և ցանում են՝ վարսակ, հաճար և նոյն իսկ ցորեն: Բազմացնում են կաթնատու կենդանիներ և արտադրում են շատ իւղ, որ արտահանում են ուրիշ երկիրներ, — գլխաւորապէս Մսկոլիա: Աւելի հիւսիս, Սկանդինաւեան լեռների արևելեան լանջերին և նրանց մօտ տարածւող հարթութեան վրայ երկրագործութիւնը և անասնաբու-

ծուծիւնը շատ չեն զարգացած, որովհետև երկիրը շատ քար-քարոտ է¹⁾: Այդտեղ գլխաւոր նշանակութիւն ունի անտառագործութիւնը: Փայտի մի մասը արտահանում են, միւս մասը գործադրում են՝ լուցկու կոթ, կարտոն, թուղթ պատրաստելու համար. շեղական լուցկին ծախւում է երկրագնդի բոլոր կողմերում: Երկրում եղած սղոցարանները, թղթի և այլ գործարանները բանեցւում են ջրվէժների օգնութեամբ:



Նկ. 47. Չխուրսարան Լաճոսեան կղզիների վրայ:

Սկանդինաւիայի արեւմտեան ափերին, շնորհիւ մեղմ կլիմայի, երկրագործութեամբ պարապել կարելի է մինչև 70-րդ աստիճանը. սակայն դրա համար շատ քիչ հող կայ²⁾: Այդ մասում գլխաւոր զբաղմունքն է՝ ձկնորսութիւնը: Ահագին քանակութեամբ ձուկ են արտահանում նորեգացիները դէպի ուրիշ երկիրներ:

Շեղանների և նորեգացիների համար մեծ նշանակու-

¹⁾ Սկանդինաւեան թերակղզու $\frac{9}{10}$ պէտքական չէ երկրագործութեան համար:

²⁾ Նորեգիայի ամբողջ տարածութեան միայն $\frac{20}{100}$ է հերկւում. 3 տոկոսը մարգագետին է, 24 տոկոսը՝ անտառ, իսկ 71 տոկոսը՝ բոլորովին անպէտք է:

Թիւն ունի հանքագործութիւնը: Սկանդինաւիայի ծովափերին շատ տեղ գրանիտ են կտրում և ծովային նաւերով ուղարկում Գերմանիա, Հոլլանդիա և Անգլիա: Ապա՝ Սկանդինաւեան թերակղզին շատ հարուստ է մանաւանդ երկաթահանքերով:

Երբեմն ամբողջ սարեր բաղկացած են լինում երկաթահանքերից, այն էլ լաւ տեսակի: Հարուստ երկաթահանքեր կան Դաննեմորա քաղաքի մերձակայքում, որտեղից տարեկան մի քանի միլիոն փութ ընտիր երկաթ է ստացւում: Բայց գլխաւոր հանքերը գտնուում են հիւսիսում, Շւեդական Լապլանդիայում: Այնտեղ կան սարեր, որոնք ամբողջապէս բաղկացած են երկաթահանքից, օրինակ՝ Կիրունա սարը:

Շւեդիայում ձեռք է բերւում նաև բաւական քանակութեամբ պղինձ, — դարձեալ ընտիր տեսակից:

Որովհետև քարածուխով Սկանդինաւեան թերակղզին ազքաւ է, ուստի և երկաթի հանքի մեծ մասը անմշակ դրութեան մէջ արտահանւում է Գերմանիա և Անգլիա:

Գործարանային արդիւնագործութիւնը քիչ է զարգացած: Վերջերս միայն՝ շւեդները և նորւեգացիները սկսել են, շւէյցարացիների օրինակով, օգտուել երկրի արագահոս գետերի ոյժից՝ բանեցնելու համար գործարանները:

Ճանապարհների հաղորդակցութիւնը լաւ է թերակղզու հարաւային մասում միայն: Այդտեղ կան երկաթուղային շատ գծեր: Սկանդինաւիայի գետերը նաւարկելի չեն, չնայելով իրենց ջրառատութեան, որովհետև շատ ջրվէժներ և սահանքներ ունեն. այդ պակասը մասամբ լրացնում են թերակղզու հարաւում գտնուող մեծ լճերը:

Ճանապարհների հաղորդակցութեան թերին որոշ չափով լրացնում է հեռախօսը, որ բոլոր քաղաքները և նշանաւոր աւանները միացնում է իրար հետ: Ո՛չ մի ուրիշ երկրում հեռախօսը չունի այն նշանակութիւնը, ինչ Սկանդինաւիայում:

Ծովային նաւագնացութիւնը զարգացած է թերակղզու բոլոր ափերի երկայնութեամբ, — մանաւանդ արեւմտեան կողմում: Նորւեգացիները յայտնի են իբրև առաջնակարգ ծովագնացներ: Նորւեգիայի առևտրական նաւատորմը իր մեծութեամբ յետ է մնում միայն անգլիականից և գերմանականից. նա նոյն իսկ Ֆրանսիական նաւատորմից մեծ է, միայն թէ՛ Նորւեգիա-

յում գործածութեան մէջ են մեծ մասով առաջատանաւեր, որոնք և պատրաստուում են Նորեգիայում:

Շւեդները և նորեգացիները ապրում են բաւական լաւ, թէպէտ ոչ դանիացիների չափ:

Շւեդիայում հողի մեծամասնութիւնը գիւղացիների սեփականութիւն է, բայց կան նաև հողագուրկ գիւղացիներ. սրանք կալածատէրերից կապալով են վերցնում հողը: Հողագուրկ գիւղացիների դուրսութիւնը լաւ չէ, ուստի և ամեն տարի մօտ 20 հազար հոգի գաղթում են դէպի Միացեալ-Նահանգներ և Կանադա: Հողի մի մասը պատկանում է կալածատէր-ազնւականներին, որոնք այժմ էլ դեռ ապրում են իրենց հինաւուրց դղեակներում: Նորեգիայում ազնւականութիւն չկայ ամենևին:

Ժողովրդական կրթութիւնը շատ տարածւած է նրանց մէջ: Բոլոր քաղաքներում և գիւղերում կան ուսումնարաններ: Նորեգացիները և շւեդները շատ ուսումնասէր են, ամենախուլ, յետ ընկած վայրերում ապրող ընտանիքների երեխաներին կրթութիւն տալու համար պաշտօնավարում են շրջիկ ուսուցիչներ: Բացի երեխաների համար յատկացւած ուսումնարաններից՝ շատ կան նաև չափահասների ուսումնարաններ—«ժողովրդական համալսարաններ»: Բարձրագոյն ուսում տալու համար կան համալսարաններ, — թէպէտ ոչ շատ. բայց գիտութիւնները այնտեղ ուսուցանւում են հիմնաւոր կերպով, — համարեա այնպէս, ինչպէս գերմանական համալսարաններում:

Շւեդները շատ մեծ ուշադրութիւն են դարձնում Ֆիզիքական դաստիարակութեան վրայ: Նրանք վաղուց է ինչ հնարել են իրենց յատուկ, «շւեդական» կոչւած մարմնամարզութիւնը. այժմ մարմնամարզութիւնը ոչ միայն պարտադիր առարկայ է բոլոր դպրոցներում, այլ և ամեն տեղ քաղաքներում գոյութիւն ունեն մարմնամարզարաններ, ուր այցելում են բազմաթիւ մարդիկ— թէ տղամարդիկ և թէ կանայք:

Շւեդերէն, մանաւանդ նորեգերէն գրքեր շատ են թարգմանւում օտար լեզուներով:

ՊԵՏՈՒԹԻՒՆՆԵՐԸ ԵՒ ՔԱՂԱՔՆԵՐԸ:— Սկանդինաւեան թերակղզու վրայ գտնւում են երկու սահմանադրական թագաւորութիւններ— Շւեդիա և Նորեգիա: Այս երկու պետութիւնները երկար ժամանակ գտնւում էին մէկ (շւեդական) թագաւորի իշխանութեան տակ. բայց վերջին տարիներս (1905 թ.)

այդ երկու պետութիւնները անջատեցին իրարից: Ներկայումս այդ պետութիւններից ամեն մէկը ունի իր թագաւորը և պարլամենտը:

Թէ Շւեդիայում և թէ Նորւեգիայում ազգաբնակութեան մեծագոյն մասը ապրում է գիւղերում. քաղաքներ քիչ կան:

ՇԻԵԴԻԱՅԻ մայրաքաղաքն է՝ Ստոկհոլմ (300 հազար բն.), նշանաւոր նաւահանգիստ է, գտնւում է Մեւար լճի և Բալտիկ ծովի միացման տեղում: Ստոկհոլմում է նստում շւեդական թագաւորը, այնտեղ է գտնւում պարլամենտը («ռիկսդագ»):

Ուպսալա—Շւեդիայի նախկին մայրաքաղաքը. յայտնի է իր համալսարանով:

Գէօտեբորգ—նշանաւոր նաւահանգիստ է Գէօտա գետի բերանի մօտ. ունի նաւաշինարաններ:

ՆՈՐՒԵԳԻԱՅԻ մայրաքաղաքն է—Քրիստիանիա. նշանաւոր նաւահանգիստ է. այդտեղ է թագաւորի աթոռանիստը, այդտեղ է գտնւում նաև պարլամենտը («ստորտինգ»): Քրիստիանիան Նորւեգիայի լուսաւորութեան կենտրոնն է. ունի համալսարան:

Բերգեն եւ **Տրոնհայմ**—նշանաւոր են ձկան արտահանութեամբ:

Նարւիկ—նաւահանգիստ է. այդտեղով է արտահանւում երկաթ՝ Շւեդական Լապլանդիայից. գտնւում է երկրագնդի ամենահիւսիսային երկաթուղային գծի ծայրին:

Ա Ն Ք Լ Ի Ա

կամ

ՄԵԾ-ԲՐԻՏԱՆԻԱՅԻ ԵՒ ԻՐԼԱՆԴԻԱՅԻ ՄԻՆՅԵԱԼ ԹԱԳԱՌՈՒԹԻՒՆ

ԸՆԴՀԱՆՈՒՐ ՆԿԱՐԱԳՐՈՒԹԻՒՆ:—Անգլիան եւրոպական պետութիւնների թւում միանգամայն առանձին դիրք է գրաւում. Նա ծովային պետութիւն է,—ամբողջապէս կղզիների վրայ է գտնւում: Այդ կղզիներն են՝ **Մեծ Բրիտանիա**,—ամենամեծ

կղզին Եւրոպայում, Իրլանդիա և շատ ուրիշ, մանր կղզիներ, գրանցից նշանաւոր են. հիւսիսում՝ Հեբրիդեան, Շետլանդեան, Օրկադեան կամ Օրկնէյեան կղզիները. իսկ հարաւում՝ Ուալստ և Նորմանդեան կղզիները:

Այս բոլոր կղզիները ցամաքային ծագում ունեն և իրենց բնութեամբ նման են մայր ցամաքի այն մասերին, որոնց մօտ են գտնուում նրանք: Մեծ-Բրիտանիա կղզու հարաւային մասը նման է Ֆրանսիային, իսկ հիւսիսային մասը—Սկանդինաւեան թերակղզուն:

Պաղը-Կալէ նեղուցի խորութիւնը ընդամենը 10 սաժէն է: Եթէ Գերմանական ծովի մակերևոյթը 20—25 սաժէնով իջնէր, այն ժամանակ բրիտանական կղզիները կմիանային հիւսիսային Գերմանիայի և Ֆրանսիայի հետ ու կզառնային մայր ցամաքի մասերը:

Մեծ-Բրիտանիա կղզու հարաւ-արեւելեան կողմում տարածւում է մի դաշտավայր, որի մէջ տեղով հոսում է Անգլիայի ամենամեծ գետը—Թեմզան, իսկ ծայրերով՝ Սևերն և Տրենտ գետերը: Այդ դաշտավայրը բլրաշատ է և արգաւանդ. ամառը տաք է լինում, աշնանը և ձմեռը երկինքը ամպամած է, իսկ երկիրը պատում է թանձր մառախուղ: Այդտեղ ևս, ինչպէս Ֆրանսիական դաշտավայրում, շատ լաւ աճում է ցորենը և բաւական լաւ խնձորենին:

Մեծ-Բրիտանիայի հարաւ-արեւմտեան կողմում գտնուում է Կորնուոլ լեռնախումբը, որ իր կազմութեամբ, կլիմայով և բուսականութեամբ նման է հարեան Բրետանին (Ֆրանսիայում):

Հիւսիսում տարածւում են Շոտլանդական լեռները, որոնք շատ բանով նման են Սկանդինաւեան լեռներին: Շոտլանդական լեռները, մանաւանդ նրանց մէջ ամենաբարձրները, Գրամպեան լեռները, յարմար չեն մարդկային բնակութեան համար: Երկրագործութեամբ պարապել կարելի է այդտեղ միայն լեռնագոգերում:

Մեծ-Բրիտանիայի միջին մասում, աւելի արեւմտեան ասփերի մօտ, բարձրանում են Պեննինեան կամ Պիկ լեռները և Ուէլս. վերջինիս գագաթն է՝ Մոոզոն (1 վերստ բարձր.): Այս լեռներն ևս, Շոտլանդականի նման, լերկ են, բուսականութիւնից համարեա բոլորովին զուրկ:

Իրլանդիան նման է Մեծ-Բրիտանիային միայն իր ծայրերում, որտեղ բարձրանում են լեռնախմբեր: Մնացած ամբողջ տարածութիւնը *մահճոտ դաշտավայր է*,—այնքան հարթ, որ այնտեղով հոսող Շաննոն գետը զժւարութեամբ է առաջ հոսում դէպի ծով եւ իր ճանապարհին գոյացնում է մի քանի լճեր: Իրլանդիայի կլիման ծովային է: Արեւմտեան քամիները Գոլֆշտրոմից բերում են տաք, գոլորշիառատ օդ, որ մի փոքր միայն ցրտելով դառնում է ամպ եւ մառախուղ:

Իրլանդիայի հարաւային կողմում ձմեռը այնպէս մեղմ է լինում, որպէս Ռիվերայում (հարաւ. Ֆրանսիայում, Միջերկրականի ծովափին): Այս պատճառով էլ այնտեղ աճում են մշտադալար մրտենիներ և դափնիներ. բայց ամառն էլ աւելի տաք չէ, քան Բոտնիկ ծոցի ափերին: Իրլանդիայի եղանակը միշտ անձրևային է, ամպոտ. ուստի և յարմար չէ այնտեղ մշակովի բոյսեր ցանել: Հացահատիկները այնտեղ շատ խղճուկ հունձ են տալիս. լաւ աճում է միայն կարտոֆիլը: Սակայն մարգագետինները հիւթաաշտ խոտով են ծածկւած, միշտ էլ մոյգ-կանաչ են. ամբողջ տարին անընդհատ խոտ է բուսնում այնտեղ: Դրա համար է, որ Իրլանդիան «Կանաչ կղզի» անունն է ստացել:

Համեմատելով Անգլիայի բնութիւնը հարևան Ֆրանսիայի բնութեան հետ, մենք տեսնում ենք, որ Ֆրանսիայի կլիման աւելի տաք է, աւելի արևաշատ. բայց դրա փոխարէն՝ Անգլիան վերին աստիճանի հարուստ է հանքերով: Մեծ Բրիտանիայի լեռները լի են քարածուխի և երկաթի հանքերի հաստ շերտերով: Անգլիայի և Ֆրանսիայի աշխարհագրական դիրքերը մօտաւորապէս նոյնն են. այդ երկու երկիրներն ևս գտնւում են Եւրոպայի կենտրոնին մօտ և անմիջական հաղորդակցութիւն ունեն Ամերիկայի հետ: Անգլիան, գտնւելով կղզիների վրայ, աւելի յարմար դիրք ունի՝ առևտրական յարաբերութիւն պահպանելու ուրիշ երկիրներին հետ. այդ դիրքը աւելի անվտանգ է պետութեան համար:

Անգլիայի ընակիչների թիւն է՝ 45 միլիոն: Միմիայն Մեծ-Բրիտանիան այնքան ընակիչ ունի, որքան՝ ամբողջ Ֆրանսիան, որ իր տարածութեամբ Անգլիայից երկու անգամ մեծ է: Ազգաբնակչութեան խտութեան նայելով՝ Անգլիան յետ է մնում միայն Բելգիայից և Հոլլանդիայից: Բնակիչների մեծ մասը—⁸/₁₀-ը կազմում են անգլիացիները, որոնք պատկանում են գեր-

ման ժողովուրդների անգլօ-սաքսոն ճիւղին: Ազգաբնակութեան $\frac{1}{10}$ -ը շոտլանդացիներ են, $\frac{1}{10}$ -ն էլ՝ իրլանդացիներ:

Այս վերջին ազգութիւնները ֆնացորդ են կելտ ժողովրդի, որ հընումը ապրում էր Մեծ-Բրիտանիա և Իրլանդիա կղզիների վրայ. բայց նրանք յետագայում խառնեցին մայր ցամաքից եկած գերմանների հետ: Այժմեան շոտլանդացիները և իրլանդացիները մեծ մասով խօսում են անգլիերէն լեզուով: Կելտերէն բարբառներ պահել են քիչ տեղերում միայն—Շոտլանդիայի հիւսիսային և Իրլանդիայի հիւսիս-արեւելեան կողմում, նաև Ուէլսի լեռներում:


Ազգաբնակութեան մեծ մասը—60 տոկոս, հետևում է անգլիական եկեղեցու. *) զաւանութեան: Իրլանդացիները կաթոլիկ են: Անգլիայում կան նաև բազմաթիւ մանր աղանդներ, որոնք միւս զաւանութիւններին հաւասար ազատութիւն են վայելում:

ԱՆԳԼԻԱՅԻՆՆԵՐԻ ԶԲԱՂՄՈՒՆՔՆԵՐԸ ԵՒ ԿԵԱՆՔԸ:—Անգլիացիների գլխաւոր զբաղմունքներն են՝ հանքագործութիւնը և գործարանային արդիւնագործութիւնը:

Հանքագործութիւնը Անգլիայում ունի այն նշանակութիւնը, ինչ որ Գերմանիայում: Քարածուխի արտադրութեամբ Անգլիան յետ է մնում միայն Միացեալ-Նահանգներից, իսկ երկաթի արտադրութեամբ—Միացեալ-Նահանգներից և Գերմանիայից:

Ուէլսի, Պեննինեան և Շոտլանդեան լեռների ստորոտներում փորած կան մինչև 1 վերստ խորութիւն ունեցող հանքահորեր, ստորերկրեայ սրահներ, որտեղ օր ու գիշեր աշխատում են հարիւր-հազարաւոր բանւորներ: Նոյն վայրերում կան բազմաթիւ ձուլարաններ, որտեղ երկաթահանքը խառնում են ածուխի հետ և մետաղ ստանում: Քարածուխի և երկաթի հանքերի իրար մօտ լինելը հեշտացնում է երկաթ արտադրելը. բայց Անգլիայի երկաթահանքերը սկսել են սպառել, ուստի անգլիացիները պակասը լրացնելու նպատակով հում նիւթ են բերում ուրիշ երկիրներից—Շեդդական Լապլանդիայից, Իսպանիայից, և նոյն իսկ Հարաւային Ռուսաստանից: Իսկ քարածուխ Անգլիայում դեռ ևս շատ կայ. այդտեղից մեծ քանակութեամբ քարածուխ է արտահանւում ուրիշ երկիրներ, իսկ մեծ մասը գործ է ածւում հենց Անգլիայում:

*) Անգլիական կամ եպիսկոպոսական եկեղեցին բողոքական և կաթոլիկ եկեղեցիների միջին տեղն է բռնում. զաւանութեամբ նա բողոքականութեան է մօտ, իսկ ծիսակատարութեամբ և եկեղեցական պաշտօնէութեամբ—կաթոլիկութեան:



Նկ. 48. Արդիւնագործութեան համեմատական մեծութիւնը եւրոպական պետութիւններում եւ Միացեալ-Նահանգներում:

չիայում: Քարածուխով եւ տաքացնում բնակարանները, քարածուխ եւ բանեցնում նաև գործարաններում:

Գործարանային արդիւնագործութեան զարգացման կողմից Անգլիան եւրոպայի առաջին պետութիւնն է: Այդ արդիւնագործութիւնը սկիզբ է առել Անգլիայում: Անգլիացիներն են եղել, որ գտել են շոգեմեքենան, նրանք են գտել նաև մանելու, ոստայնանկութեան և ուրիշ տեսակ մեքենաներ: Անգլիացիները ոչ միայն գտան այդ մեքենաները, այլ և հենց իրենց ամենից առաջ սկսեցին գործնական նպատակների ծառայեցնել նրանց, — հիմնեցին առաջին գործարանները: Ներկայումս անգլիական գործարաններում է արդիւնագործում երկրիս վրայ ստացւող ամբողջ բամբակի կէսից աւելին. Անգլիական գործարաններում պատրաստած չիթ է բանեցնում ամբողջ մարդկութեան կէսից աւելին:


Անգլիայում մեծ քանակութեամբ պատրաստում են նաև բրդէ ու կտավէ կտորներ, որոնք աչքի են ընկնում իրենց նըրքութեամբ ու ամրութեամբ:

Ճոթեղէնի արդիւնագործութիւնից յետոյ երկրորդ տեղը բռնում է մետաղագործութիւնը, — շոգեմեքենաներ, վագոններ, ծովային նաւեր և զանազան մեքենաներ պատրաստելը: Անգլիական մեքենաները, զանազան գործիքները և մետաղեայ մանր ապրանքները (ասեղ, գրիչ, դանակ և այլն) լաւ հռչակ ունեն և արտահանում են դէպի եւրոպական բոլոր երկիրները և ուրիշ աշխարհամասեր:

Անգլիական շոգեմեքենաներ են բանեցնում ոչ միայն Անգլիայում, այլ և Եգիպտոսում, Հնդկաստանում և Հարաւային Աֆրիկայում, յաճախ նաև Ռուսաստանում: Անգլիական նաւաշինարաններում է

պատրաստած աշխարհում եղած ծովային բոլոր նաւերի ³/₄-ը: Ամեն տարի Անգլիայում պատրաստում են ծովային նաւեր աւելի թւով, քան մնացած բոլոր երկիրներում միասին:

Գործարանային արդիւնագործութեան մէջ է աշխատում Անգլիայի ամբողջ ազգաբնակչութեան կէսից աւելին, որն և այդ պատճառով կենտրոնացած է քաղաքներում: Անգլիայում քիչ կան զիւղեր և աւաններ. այդտեղ ապրում է ամբողջ ազգաբնակչութեան ընդամենը ¹/₈-ը: Գիւղատնտեսութիւնը Անգլիայում երկրորդական նշանակութիւն ունի: Երկրագործութիւնից աւելի նշանակութիւն ունի Անգլիայում անասնաբուծութիւնը, որ աւելի օգուտ է բերում այնտեղ:



Նկ. 49. Աւելի համեմատական մեծութիւնը եւրոպ. պետութիւններում և Միացեալ-Նահանգներում:

Երկրագործութիւնը ծաղկում է միայն Մեծ-Բրիտանիայի Հարաւարեւելեան դաշտավայրում. այդտեղ ցանում են՝ ցորեն, գարի, խոտաբոյսեր, և այլն: Տեղ-տեղ կան նաև աճարի դարաւոր անտառների մընացորդներ: Անգլիացիները շատ խնամքով են մշակում իրենց դաշտերը, հողը լաւ պարարտացնում են, բանեցնում են զիւղատնտեսական նորագոյն գործիքներ, ուստի և նրանք հողից նոյնիսկ աւելի հունձ են վերցնում, քան Ֆրանսիացիները: Երկրագործութիւնը Անգլիայում տարէցտարի կրճատւում է և տեղի է տալիս անասնաբուծութեան, որ աւելի օգուտ է բերում: Հինց Անգլիայում ձեռք բերւած ցորենը այդ երկրում ծախւում է այն գնով, ինչ գնով ամերիկական և ուսական ցորենը նոյն երկրում—Անգլիայում. իսկ անգլիական թարմ միսը շատ աւելի թանգ արժէ իր տեղում, քան ամերիկականը կամ աւստրալիականը, որ ստոցբաժ կամ աղի մէջ դրած՝ Անգլիա են բերում ծախելու: Թանգ են նաև կաթն ու թարմ իւղը: Ահա թէ ինչու անգլիացի զիւղատնտեսները իրենց զխաւոր ուշադրութիւնը դարձնում են կով ու ոչխար պահելու և բազմացնելու վրայ: Անգլիացիները բազմացնում են նաև ընտիր խոզ և ձի: Անգլիական ձին և խոզը նոյնիսկ արտահանւում են եւրոպական ուրիշ երկիրներ:

Ծովափնեայ բնակիչներին համար, մանաւանդ Մեծ-Բրիտանիայի հիւսիսային ծովափերին, մեծ նշանակութիւն ունի ձկնորսութիւնը. այդ նպատակին են ծառայում հազարաւոր առազաստանաւեր և շոգենաւեր: Անգլիացիները բռնած ձկան մի մասը արտահանում են ուրիշ երկիրներ:

Երկրագործութիւնը, անասնաբուծութիւնը և ձկնորսութիւնը Անգլիայի ամբողջ ազգաբնակչութեան համար միայն փոքր չափով են սնունդի միջոցներ հայթայթում. օրինակ՝ Անգլիայում ստացւած հացահատիկները հազիւ 2 ամիս բաւականութիւն տան այդ երկրի ազգաբնակչութեան. այդ պատճառով էլ ուրիշ երկիրներից են Անգլիա ներմուծում՝ մեծ քանակութեամբ սննդի միջոցներ:

Արտաքին առեւտրի շրջանառութեամբ Անգլիան առաջին պետութիւնն է երկրագնդի վրայ: Բացի սննդի միջոցներից՝ ներմուծւում են գլխաւորապէս հում նիւթեր արդիւնագործութեան համար, իսկ արտահանւում են՝ գործարանային ապրանքներ:

Անգլիայի առեւտրի զարգացմանը նպաստում է նրա ծովային նաւատորմը, որ բաղկացած է 20,000 շոգենաւերից և 10,000 առազաստանաւերից: Անգլիացիները շատ լաւ ծովագնացներ են. անգլիական նաւերը երթեւեկում են երկրագնդի բոլոր ծովերով և այնքան բեռ են փոխադրում, որքան՝ եւրոպական մնացած բոլոր պետութիւններին պատկանող նաւերը՝ միասին:

Ժամապարհների հազորդակցութիւնը Անգլիայում օրինակելի է: Երկաթուղին ամենից առաջ Անգլիայում կառուցւեց:

Երկաթուղային գծերի ցանցի խտութեամբ Անգլիան յետ է մնում միայն Բելգիայից. սակայն Անգլիայում կան վայրեր, որտեղ երկաթուղիներ չեն ցանցը աւելի նօսք չէ, քան Բելգիայում. իսկ այդպիսի վայրերը իրենց տարածութեամբ աւելի տեղ են բռնում, քան Բելգիայի թափաւորութիւնը: Անգլիայում երկաթուղային գնացքները շատ արագ են երթեւեկում. նրանց հետ մրցել կարող են միայն ամերիկական երկաթուղային գնացքները¹⁾:

¹⁾ Բայց Անգլիայում երկաթուղով գնալը թանկ արժէ—3-րդ կարգը այնտեղ աւելի թանկ է, քան Ռուսաստանում—2-րդ կարգը: Ռուսական երկաթուղին ամենաէժանն է Եւրոպայում:

Անգլիական գետերը թէպէտ կարճ են, բայց ջրառատ են և նաւարկելի: Անգլիական գետաբերանները, շնորհիւ ծովային մակընթացութեան, մատչելի են ծովային մեծ նաւերի համար: Գետերի վերին հոսանքները միացած են իրար հետ ջրանցքներով: Երջապատւած լինելով ծովով, Անգլիան ունի մի շարք յարմարաւոր նաւահանգիստներ, որոնք ամենեւին չեն սառչում:

Ենորհիւ արգիւնագործութեան, ճանապարհների հազորդակցութեան և առևտրի զարգացման՝ Անգլիան ներկայումս Եւրոպայի ամենահարուստ երկիրն է. միայն թէ՛ երկրի հարըստութիւնները բաժանւած են այնպէս անհամաչափ կերպով, որպէս և ոչ մի ուրիշ պետութեան մէջ: Գործարանների և առևտրական ձեռնարկութիւնների մեծ մասը գտնուում է միլիոնատէրերի ձեռքում. միլիոնատէրերին է պատկանում Անգլիայում նաև հողի մեծ մասը: Հողատէր գիւղացիներ Անգլիայում քիչ կան. իսկ հողը կապալով վերցնողները (Ֆերմերները) միանգամայն կախում ունեն խոշոր կալւածատէր-լորդերից: Լորդերը ճնշում են կապալառուներին մանաւանդ Իրլանդիայում: Համեմատաբար աւելի լաւ դրութեան մէջ են գտնուում գործարանային բանւորները, որովհետև աշխատավարձը Անգլիայում աւելի բարձր է, քան Եւրոպայի մայր ցամաքում. ապրուստի միջոցներն էլ էժան են:

Աշխատանքը գործարաններում և հանքահորերում ծանր է, բայց շատ երկար չէ տևում, — օրւայ մէջ 8—9 ժամ: Կիրակնօրեայ հանգիստը ոչ մի երկրում այնպէս խստութեամբ չէ պահուում, որպէս Անգլիացում:

Կիրակի օրերը բոլոր գործարանները, խանութները և նոյնիսկ թատրոնները Անգլիայում փակում են. պոստն ևս փակւած է լինում, նամակները չեն հանւում տուփերից. նոյնիսկ երկաթուղային երթևեկութիւնը համարեա ընդհատուում է. երթևեկում են միայն արագընթաց գնացքները: Կիրակի օրերը բոլոր անգլիացիները օգտուում են հանգստից. առաւօտները սովորաբար եկեղեցի են գնում, յետոյ երեխաների հետ միասին գնում են մի բացօթեայ տեղ թարմ օդ ծծելու, — մի պարկ կամ քաղաքից դուրս, այդտեղ նրանք ժամանակ են անցկացնում խոտերի վրայ, գնդակ կամ այլ բան խաղալով, մակույկ նրստելով և այլն:

Ժողովրդական կրթութիւնը Մեծ-Բրիտանիայում շատ է

զարգացած, իսկ Իրլանդիայում— ոչ բաւարար չափով: Բացի տարրական դպրոցներից՝ այնտեղ ամեն մի վայրում հիմնել են երեկոյեան դասընթացներ չափահասների համար: Միջնակարգ և տեխնիկական դպրոցներ շատ կան: Անգլիացիները առանձին ուշադրութիւն են դարձնում ֆիզիքական դաստիարակութեան վրայ. մարմնամարզական խաղերը դպրոցներում պարտադիր են: Անգլիական գրողները և գիտնականները համաշխարհային հռչակ են վայելում, — ինչպէս գերմանական և ֆրանսիական գրողները և գիտնականները:

ՊԵՏԱԿԱՆ ԿԱԶՄԸ ԵՒ ՔԱՂԱՔՆԵՐԸ:— Մեծ-Բրիտանիայի և Իրլանդիայի Միացեալ Թագաւորութիւնը բաղկացած է երեք գլխաւոր մասերից— Բուն Անգլիա, Շոտլանդիա և Իրլանդիա: Առաջ սրանք առանձին-առանձին պետութիւններ են եղել, իսկ այժմ միևնոյն թագաւորութեան մասերն են կազմում: Նրանց մէջ ամենանշանաւորն է Բուն Անգլիան, որի անունով էլ կոչւում է ամբողջ Միացեալ Թագաւորութիւնը:

Անգլիայի թագաւորութեան գլուխ են կանգնած՝ թագաւորը և պարլամենտը: Անգլիայի թագաւորը չունի աւելի իշխանութիւն, քան Ֆրանսիայի հասարակապետութեան նախագահը. նա մինիստրներ է նշանակում, որոնք սակայն իշխանութիւնը պահում են իրենց ձեռքում մինչ այն ժամանակ, քանի զեռ պարլամենտը վստահութիւն է տածում դէպի նրանց. հակառակ դէպքում մինիստրները պարտաւոր են հրաժարել: Անգլիական պարլամենտը բաղկացած է երկու պալատից— Վերին կամ լորդերի պալատ, և Ստորին կամ համայնքների պալատ: Համայնքների պալատը ժողովրդի կողմից ընտրւած պատգամաւորների օրէնսդրական ժողովն է. նա աւելի նշանակութիւն ունի, քան լորդերի պալատը, որ բաղկացած է ազնւականների— լորդերի և բարձր հոգևորականութեան ներկայացուցիչներից: Անգլիական պարլամենտը ամենահինն է Ներոպայում. նա ծագել է 13-րդ դարում, մինչդեռ եւրոպական միւս պետութիւնների պարլամենտները ծագել են 19-րդ դարում:

Անգլիայի մայրաքաղաքն է՝ ԼՈՆԴՈՆ, որ գտնւում է Թեմ-

պա գետի վրայ: Լոնդոնը երկրագնդի ամենամեծ քաղաքն է. միմիայն այդ քաղաքը, արւարձանների հետ միասին, բնակիչները թւով (7 միլիոնից աւելի) եւրոպական շատ պետու-



Նկ. 50. Պարլամենտի շէնքը Լոնդոնում:

թիւններից անց է: Լոնդոնը համաշխարհային առևտրի կենտրոնն է և երկրագնդի ամենանշանաւոր նաւահանգիստը: Թէպէտ նա Թեմզայի գետաբերանից 75 վերստ հեռու է գտնուում, բայց ծովի մակընթացութեան միջոցին մինչև այնտեղ են հասնում ովկիանոսային նաւեր: Այս մեծ նաւերից տարեկան 10.000 հատ, իսկ ծովային փոքր նաւերից 35.000 հատ գալիս են Լոնդոն և բերում են ամեն տեսակ ապրանքներ: Նաւերի կանգնելու, բեռ վերցնելու կամ դատարկելու համար Թեմզայի երկու կողմերում շինել են դոկեր, այսինքն՝ մեծ, արւեստական կերպով փորած աւազաններ, որոնց մօտ գտնուում են ապրանքի ահագին պահեստներ: Գլխաւորապէս առևտրական քաղաք և նաւահանգիստ լինելով՝ Լոնդոնը մեծ նշանակութիւն ունի նաև իբրև արդիւնազործական կենտրոն: Այնտեղ շատ կան գործարաններ և նաւաշինարաններ: Վերջապէս, Լոնդոնը նշանաւոր է նաև ժողովրդական լուսաւորութեան տեսակէտից. այնտեղ է տրպազւելում անգլիական գրքերի, լրագիրների և հանդէսների մեծ

մասը, այնտեղ են գտնուում ամենալու գրադարանները և թանգարանները: Նշանաւոր է մանաւանդ Բրիտանական թանգարանը (մուզէյ), որ պարունակուում է գրքերի, ձեռագիրների, գեղարեստական հին երկերի ամենահարուստ ժողովածուներ և այլն:



Նկ. 51. Վիլհաւոր հրապարակը Սիսիւում՝ «անգլիական բանկի» մօտ:

Լոնդոնը բաժանուում է մի քանի մասի, որոնցից նշանաւոր են երեքը.—1. Սիտի, որ հին քաղաքամասն է. 2. Արեւմտեան Լոնդոն և 3. Արեւելեան Լոնդոն: Սիտիում է կենտրոնացած առևտուրը: Այդտեղ գտնուում են՝ բանկեր—որոնց թւում նաև աշխարհիս ամենահարուստ «Անգլիական բանկը»—առևտրական գրասենեակներ և խանութներ: Մասնաւոր տներ այդտեղ շատ քիչ կան: Առաւօտները Սիտի են թափուում հարիւր-հազարաւոր մարդիկ, իսկ գիշերները այնտեղ միայն պահապաններն են մնում: Արեւմտեան Լոնդոնում են գտնուում՝ պարլամենտը, Վեստմինստերի վանքը (Անգլիայի ամենաշքեղ տաճարը), Բրիտանական թանգարանը, արքայական պալատը և լորդերի բազմաթիւ փառայեղ տներ: Այդտեղ են գտնուում Լոնդոնի ամենալու պարկերը, որոնց թւում նաև՝ հսկայական «Հայդ-պարկը»: Արեւելեան Լոնդոնում են գտնուում գործարանները, այդտեղ ապրում են մեծ մասով բանուորներ, արհեստաւորներ և մանր առևտրականներ:

Լոնդոնը մարդու վրայ ազդում է նախ և առաջ իր մեծութեամբ:

Նա բռնում 300 քառ. վ. տարածութիւն: Արևմուտքից արևելք, Թեմզայի երկայնութեամբ, քաղաքը տարածւում է 25 վերստ, իսկ հիւսիսից հարաւ՝ 18 վերստ: Լոնդոնի բոլոր փողոցները միասին 11 հազար վերստ երկայնութիւն ունեն. քաղաքում կան մօտ 900 հազար տներ: Տների մեծամասնութիւնը երկյարկանի է, իւրաքանչիւր յարկ 2—4 պատուհանով և ուղղակի փողոցից մտնող դռնով: Ամեն մի այդպիսի տան մէջ ապրում է սովորաբար միայն մէկ ընտանիք: Փողոցների երթևեկութիւնը Լոնդոնում շատ եռուն է,—մանաւանդ առաւօտները, երբ քաղաքի արևարձաններից դէպի կենտրոն են դիմում ահազին թւով մարդիկ, և երեկոները,—երբ ամենքը գործից տուն են վերադառնում: Բաղմաթիւ հանրակառքեր, աւտոմոբիլներ, կերեր (երկանիւ կառքեր), ստորերկրեայ և վերերկրեայ երկաթուղու գնացքներ, շոգենաւեր Թեմզայի վրայ,—այս բոլորը լիքն են լինում երթևեկողներով. բացի դրանից՝ փողոցներում էլ խմբերով բազմաթիւ անցորդներ են երթևեկում ոտքով:

Բարեշէն լինելու կողմից Լոնդոնը յետ է մնում Բերլինից և Պարիզից: Լոնդոնի փողոցները նեղ են, մանաւանդ Սիտիում և աչքի չեն ընկնում մաքրութեամբ: Օդը շնչել դժւար է: Չմեռը յաճախ խիտ մառախուղ է պատում քաղաքը, որ խառնւում է շոգենաւերից, երկաթուղուց, գործարաններից և վառարաններից բարձրացող ծխի հետ: Թանձր մառախուղի միջոցին Լոնդոնի փողոցներում ամբողջ օրը լապտերները վառւում են. պատահում է, որ մառախուղից լապտերները նոյնիսկ լոյս չեն տալիս. այդ ժամանակ արդէն փողոցների երթևեկութիւնը բոլորովին դադարում է:

Երկրագնդի վրայ ոչ մի ուրիշ քաղաքում աչքի չէ ընկնում այն սուր հակադրութիւնը, որ կայ Լոնդոնում՝ հակայական հարստութիւնների և անծայր թշուառութեան մէջ. հարիւր-միլիոնների արժէք պարունակող զանազան պահեստների կողքին, պատահում է, որ քաղցից մեռնում են թշուառ մարդիկ:

Լոնդոնի արևելեան կողմում գտնւում է Գրինիչը, որ առաջ առանձին քաղաք էր, իսկ այժմ միացած է Լոնդոնի հետ: Գրինիչում գտնւում է աստղադիտարան: Զանազան երկիրների աշխարհագրագէտներ համաձայնութեան գալով՝ Գրինիչի վրայով անցնող միջօրէականը ընդունել են իբրև գլխաւոր միջօրէական:

Օքսֆորդ և Քեմբրիջ—մեծ քաղաքներ չեն, բայց յայտնի են իրենց հին և առաջնակարգ համալսարաններով:

Քենտրրբրի—անգլիական եկեղեցու պետի,— արքեպիսկոպոսի աթոռանիսար:

Դուվր—նաւահանգիստ է. այդտեղով է պահպանւում երթեկեւութիւնը մայր ցամաքի հետ: Պորտսմութ — պատերազմական նաւահանգիստ է. Պլիմութ — առևտրական նաւահանգիստ է:

Բրիստոլ և Կտրդիֆ—նշանաւոր նաւահանգիստներ են Բրիստոլեան ծոցի վրայ. Կարդիֆից արտահանւում է մեծ քանակութեամբ քարածուխ:

Լիւերպոլ (800 հազար բն.)—Անգլիայի երկրորդ նաւահանգիստն է. այդտեղով են ներմուծւում ահագին քանակութեամբ բամբակ և բուրգ. արտահանւում են՝ ճոթեղէն և գործարանային ուրիշ տեսակ ապրանքներ:

Մանչեստեր (900 հազար բնակիչ)—Պեննինեան լեռների արևմտեան ստորոտների մօտ. աշխարհիս ամենանշանաւոր քաղաքն է՝ բամբակի արդիւնագործութեամբ: Մանչեստրի շուրջը գտնւում են գործարանային փոքր քաղաքներ, որտեղ ևս բամբակ է արդիւնագործւում: «Այստեղ է թագաւոր-բամբակը», ասում են անգլիացիները: Մանչեստրի առաջադիմութեանը նըպաստում են շրջակայքի քարածուխի հարուստ հանքերը և խոնաւ կլիման, որ յարմար է բամբակից ճոթեղէն պատրաստելու համար: Լիդս—Պեննինեան լեռների արևելեան ստորոտների մօտ. կենտրոն է բրդեղէնի արդիւնագործութեան:

Շեֆֆիլդ և Բիրմինգհամ—արդիւնագործական մեծ քաղաքներ են. նշանաւոր են մետաղի արդիւնագործութեամբ: Այդ քաղաքներում պատրաստւում են՝ ասեղ, գրիչ, դանակ, ատաղձագործական և փականագործական զանազան գործիքներ, մեքենաներ, շոգեմեքենաներ, թնդանօթներ և այլն: Այդ քաղաքների շրջակայքում ևս, ինչպէս Մանչեստրի մօտ, գտնւում են շատ ուրիշ, աւելի փոքր քաղաքներ, որոնք կարծէք օգնականներ լինեն մեծ քաղաքների համար: Քաղաքների այդպիսի կուտակում ամբողջ երկրագնդի վրայ մէկ էլ Գերմանիայում միայն կայ, — Հոենոսեան լեռների հիւսիսային ստորոտների մօտ: **Հուլլ**—նշանաւոր նաւահանգիստ է Գերմանական ծովի

վրայ: Նիու-Կասլ—մեծ նաւաշինարաններ ունեցող նաւահանագիստ է. նշանաւոր է քարածուխի արտահանութեամբ:

Գլազգօ—նաւահանագիստ է Կլայդ գետի վրայ, Շոտլանդիայի ամենամեծ քաղաքն է (800 հազար բն.), այդտեղ կան հսկայական նաւաշինարաններ, որոնց մէջ կառուցոււմ են աւելի թւով ծովային նաւեր, քան որևէ տեղ երկրագնդի վրայ:

Էդլինբուրգ—Շոտլանդիայի նախկին մայրաքաղաքը, այժմ այդ երկրի լուսաւորութեան կենտրոնն է, հին համալսարանով:

Գուբլին—Իռլանդիայի նախկին մայրաքաղաքը, իսկ այժմ՝ նրա առևտրական գլխաւոր քաղաքը: Բելֆաստ—նշանաւոր է արդիւնագործութեամբ: Գործարանային արդիւնագործութեանը այդտեղ նպաստում է այն հանգամանքը, որ Շոտլանդիայի քարածուխի հանքերը մօտ են գտնուում:



Նկ. 52. Անգլո-սաքսոն գեղի եւ նրանց գաղութների տարածումը:

ԱՆԳՂԻԱՅԻ ԳԱՂՈՒԹՆԵՐԸ:—Անգլիան բոլոր աշխարհամասերում ընդարձակ գաղութներ ունի: Իր գաղութների հետ միասին Անգլիան աշխարհիս ամենամեծ պետութիւնն է, որ բնութւն է ցամաքի $\frac{1}{5}$ մասից աւելին: Այդ պետութեան բնակիչների թիւն է մօտ 400 միլիոն, այսինքն՝ ամբողջ մարդկութեան $\frac{1}{4}$ մասը: Անգլիերէնը ամենատարածւած լեզուն է երկրագնդի վրայ:

Անգլիայի բոլոր գաղութները կարելի է երեք կարգի բաժանել: Առաջին կարգին են պատկանում այն գաղութները, որոնք իրենց կլիմայի և բնական հարստութիւնների պատճառով յարմար են եւրոպացիների վերաբնակութեան համար: Դրանք են՝ Կանադա, Կապի-Երկիր, Աւստրալիայի հարաւ-արեւելեան մասը, Տասմանիա և Նոր-Զելանդիա: Երկրորդ կարգին պատկանում են այն գաղութները, որոնց բնական հարստութիւնները մեծ են, իսկ կլիման վատառողջ է եւրոպացիների համար. դրանք են՝ Բրիտանական Հնդկաստան, Արևադարձային Աֆրիկայի և Արևադարձային Ամերիկայի (Գլխանա, Եամայկա և ուր.) գաղութները: Այս գաղութները նշանաւոր են միայն առևտրական տեսակէտից: Վերջապէս, երրորդ կարգին պատկանում են այն գաղութները, որոնք զուրկ են բնական հարստութիւններից և անյարմար են եւրոպացիների վերաբնակութեան համար, բայց դրա փոխարէն նշանաւոր են իրենց աշխարհագրական դիրքով: Դրանք են՝ Ադեն—Արաբիայում, որ գտնւում է Բաբ-էլ-Մանդեբ նեղուցի ծայրին, Սինգապուր—Մալակկայի նեղուցի մօտ, Հոնգ-Կոնգ կղզին—Չինաստանի ափերին, Համբարձման կղզին—Ատլանտեան ովկիանոսում: Սրանց թւին են պատկանում նաև Զիբրալտարը և Մալտան:

Անգլիայի տիրապետութեան տակ գտնւող բոլոր երկիրներում արտադրւում է այն ամենը, ինչ որ անհրաժեշտ է մարդու համար. այդ գաղութներից շատ ապրանք է բերւում Անգլիա. Կանադայից—ցորեն, փայտեղէն, մորթի. Գլխանայից և Եամայկայից—շաքար, սուրճ, կակաօ. արևադարձային Աֆրիկայի կալւածներից—կաուչուկ, արմաւի ձէթ. Հնդկաստանից—ցորեն, բրինձ, բամբակ. Յէյլոն կղզուց—թէյ. Աւստրալիայից—միս, բուրդ, ոսկի և այլն: Այս ամեն տեսակ ապրանքներով բեռնած՝ անգլիական նաւերը լողում են ծովերով և ովկիանոսներով դէպի Անգլիայի ափերը և այդտեղից վերադառնում են՝ բեռնած քարածուխ և գործարանային ապրանքներ: Այս պատճառով անհա՛ Անգլիայի համար անագին նշանակութիւն ունեն նրա գաղութները—արտաքին առևտրի և սեփական արդիւնագործութեան տեսակէտից:

Անգլիացիները գիտեն գնահատել իրենց գաղութները. սը-
րանց հետ նրանք պահպանում են խաղաղ, գլխաւորապէս ա-
ռետորական յարաբերութիւն: Այդ գաղութներից շատերը, զըլ-
խաւորապէս նրանք, որտեղ ապրում են հւրոպացի վերաբնակ-
ներ, կառավարւում են ինքնուրոյն կերպով, ունեն նոյնիսկ
իրենց պարլամենտները: Գաղութների և բուն Անգլիայի պաշտ-
պանութեանն է ծառայում պատերազմական ահագին նաս-
տորմը, որ իր ոյժով շատ բարձր է մնացած պետութիւնների
նաւատորմից: Անգլիան ծովային պետութիւն է, ուստի և ծո-
վի վրայ են կենտրոնացած նրա գլխաւոր ոյժերը:

Յ Ա Ն Կ

	երես		երես
Ընդհանուր նկարագրութիւն	5	Իտալիա	73
Բալկանեան թերակղզի (ընդ- նկարագր.)	35	Պիրենէեան թերակղզի (Իս- պանիա և Պորտուգալիա)	83
Եւրոպական Թիւրքիա	39	Իելզիա	105
Բուլղարիա	43	Հոլլանդիա	109
Սերբիա	44	Գերմանիա	113
Չերնօգորիա	46	Դանիա	127
Յունաստան	48	Սկանդինաւեան թերակղզի (Շւեդիա և Նորւեգիա)	130
Ռումինիա	51	Անգլիա	137
Աւստրո-Ունգարիա	52		
Շէէյցարիա	65		



